



6

Symbolum I. A. V. G.
2. Cor: 12. v. 9.
Sufficiat mihi gratia Domini.

I. 46.45

II. 101

383

40

Sum Achillis Sigismundi
von Blauburg.

2. Einleitung

1. Die Bedeutung der

des

in

von

bei

dem

zu

in

von

bei

dem

zu

in

von

bei

dem

zu

ROLI
IARI
V. 13

Die Gartengesellschaft.

Das ander theil
des Kollwagens / darinn
mancherley frölich gsprech/schimpf
reden / spenwerck / vnnnd sonst kurtweilige
schwenck vnnnd bossen/von Historien vnnnd fa-
beln/ zů finden/ in Gärten/ Zechen/ vnnnd auff
dem feld / sehr lustig zů lesen / jetzt widerumb
von newem mit fleiß vbersehen/ gemehrt/
vnd mit schönen figuren geziert/ sampt
einem ordenlichen Register.

Durch Jacobum Freyen / Stattschreibern zů
Maurshünster/ zůsamen bracht vnd an
tag geben.



Getruckt zů Franckfurt am Meyn / Anno 1565.

An den gütigen Leser.

In der zeitten vnn
noch / seind / freundt
licher / günstiger / lie
ber Leser / vil kurtzwei
liger büchlin / vō aller hand gesprā
che / darinnen schimpff vnd ernst bos
sen / gebraucht worden / die den ge
sellshaften ihre lange zeit vnd weil
gefürkt / vñ etwa geringert haben /
außgangen / wie dann vil geschickte
vnn gelerte Männer / dieselbigen
zierlich vnd wol beschrieben haben.
Vnd dieweil nūn jüngst durch den
Ehrnhafften / Weisen Herrn / Jōr
gen Wickram / Stattschreiber zu
Burckhaim / meinem günstigen lie
ben herren / das Kollwagen Büch
lin

Vorred

lin sehr kurtzweilig / erbar vnnnd luttig
zu lesen an tag kommen vnd gemacht
worden / welches mir nit ein geringen
anmüt gebracht vnnnd gegeben hat /
So dan ich nun mehr gar schier / weder
zu Schiff / zu Ross / zu Wagen noch
sonst / weite reysen zu thun / tauglich
oder vermöglich bin / sonder mein
gröster lust nu für hin in den schönen
Gärten vnd für in ortē / bey der edlen
Music / oder sonst kurtzweiligen ehrlichen
gesellschafften zu bleiben sein wirdt. Zu
dem dann auch solche Gärten gesellschafften
allenthalben / in Teutsch vnnnd Welschen
landen / in grossen vnnnd kleinen Stedten
mit herrlichem / zierlichem triumph / als
fechten / ringen / springen / singen / pfeis-
sen /

Vorred.

fen/geigen / lauten schlagen / vñnd
andern mehr Musicalischen instru-
menten / darzu mit tadel schiessen/
leglen/tanken/vñd sonst allerhand
kurzweil / durch die ganze zeit des
Jars auß/frölich gehalten werden.
So hab ich gedacht / auch meinen
theil darzu zuthun / vñd ein kleines
Büchlin / mit kurzweiligen reden/
schimpflichem gespräch vñd bossen/
denselbigen allein / welche sich der
oberwelden kurzweilen / nit gebräu-
chen oder vermögen / oder sonst züs-
zeiten schwermütig vñnd Melan-
colisch seind / züsamen colligieren
vñ an zustellen/ vñ mit mir in die ge-
sellschaft zübringen/damit dan sol-
che unlustige gemüter / neben der
Musica vñnd frölichkeiten / mit sol-

Voired.

chen schimpffreden / recreation emp-
pfahen möchten / vnnnd etwas erlu-
stiget / vnd geleichtert würden. Da-
rumb / so ist gütiger freundtlichen
Leser / mein günstigs bitten / du wöl-
lest dir dieses Büchlin (die Gartens-
gesellschaft genant) also gefallen
lassen / dan ob gleichwol etwan gü-
te schwereck darinnen seind / so der
warheit vngleich / so ist doch mög-
lich / das solches oder dergleichen be-
schehen sein mag / oder noch besche-
hen möchte / Wie sich dann noch
heut bey tag etwan seltsame ding /
mit Worten oder wercken / auff die
ban schicket / welches man sonst nit
geglaubt noch vermeynt hett. Dan
es ist nit wol züuermäßen / wo furz-
weilige

Vorred:

weilige leut / vnnnd die gern bey ein-
nander seind / zusamen komen / da
locket se ein argument das ander
herfür / damit die Gesellschaft des
ster mehr lustig vnnnd leichtsinnig
ist / ja das inen ein halber tag kaum
zweyer stunden lang gesehen wirt.
Ich hab auch nichts / so vngeschick-
liches oder vngedürliches vor Er-
baren Frauen oder Jungfrauen
zureden were / hieher setzen noch an-
ziehen wollen / dann se Frauen vnd
Jungfrauen / alle Ehre / Zucht
vnnnd Erbarkeit in allweg züerbies-
ten ist / vnnnd auch erbotten werden
solle. Bierwol ich aber von etlichen /
doch mit vilen / die eben desselben
gleichen Volcks / kleine Schimpff-
liche meldung / allein zu guter war-
nung

Vorred.

nung gethan haben. Darumb ich
auch gedencck / ob ich schon etwan
die Geistlichen oder Weltlichen an
getast / so ist es doch mir zu schimpff /
vnnnd niemandt zu nachtheil oder
schmaach beschehen / Man kompt
doch sonst je zu zeiten mit deren glei-
chen wendsprüchen vnnnd scherzli-
chen materien / so wercklich herfür
vnd gehet so glat vnnnd wol ab / das
man sein billich lachen / vnnnd nit
darumb zürnen soll. Derhalben
bitte ich / das mir von niemandts
nichts in argem auffgenommen /
oder also gegen mir verstandē wer-
de. Wer wensß es / ob ich mich auch
etwan in dieser Garten gesellschaft
wirdt finden lassen / dann ich mich
vor langen jaren darein zuschrei-
ben

Vorred.

ben angeben / vnnnd mit fleiß befol-
hen habe. Hiemit freuntlicher lie-
ber Leser / beware dich der All-
mechtig Gott / Amen.

Dein
allzeit
williger /

Jacob Frey / Statte-
schreiber zu Maurß-
münster.

A v Bon

Die Garten
Von einem gro-
ßen Nârrischen Bawren /
der wolt junge Genß auß-
brütlen.



In Geblinger thal da
wonet ein fast Reiche
Wittfraw / die hette ei-
nen einigen Son / & was
einer groben vnd tollern
verständnuß / er was
auch der aller nârrische Mensch vnder
allen einwonern desselbigen thals. Der
selbig

selbig geck sahe auff ein zeit zu Sara
brücken / eins wolgeachten Herlichen
Manns tochter / die ein schöne / wolge
achte / verstendige juncfraw was. Der
narr ward ihr gleich hold / vnnnd lag der
Mütter an / das sie im dieselbe zu einer
Frawen schaffen wolte / wo nit / so wolt
er öfen vnnnd fenster einschlagen / vnnnd
alle stiegen im hauß abbrechē. Die müt
ter wußt vnnnd sahe wol ihrs nârischen
sons kopff / vñ forcht / weñ sie im gleich
wol umb die jungfrawen werben liesse /
vnd im ein groß güt darzu gebe / so wer
er doch so ein ungehobleter Esel / das
nichts mit ihm außzurichten / oder ver
sehen were. Wiewol aber der jungfraw
en Eltern herliche leut / vnnnd von gü
tem geschlecht / so waren sie doch also
gar arm / das sie armüt halben die tochter
irem stand nach / nit wußten züuer
sorgen / derhalben diese werbung deſter
leichter statt gewā. Die mütter forcht
nür auch / dieweil ihr son also ein unge
schickter götz were / das ihn villeicht die
jungfraw nit wölle haben / gab ihm da
rum allerhand leren / damit er sich bey d
Braut

Die Garten

Braut fein höflich züthün/ vnd hurtig
machen kōndt. Vnnd als der Klotz erst-
lich mit d̄ jungfrawē redt / da schanckte
sie ihm ein hüpsch par hendtschüch / auß
weychem Corduran leder gemacher.
Lawel thet sie an / zohe heim / so kompt
ein grosser regen / er behielt die hendts-
schüch an / galt gleich ob sie nass wū-
den oder nicht. Wie er vber ein steg will
gehn / so glitschet er / vnd fellt ins was-
ser vnd Rath / betrept sich wie ein Mor.
Er kompt heim / was wol besudelt / die
hendtschüch waren eytel fleisch / klagt
der Mütter. Die gūt alt Mütter schalt
ihn / vnnd sagt / er solts ins farzenetlin
gewicklet / vnnd in büsen gestossen ha-
ben. Bald darnach zeucht der gūe löf-
fel wider zū der Juncfrawen / sie frage
nach den hendtschüchen / er sagt jr / wie
es ihm mit gangen were / sie lacht vnnd
mercket das erst stuck seiner weißheit /
vnnd schanckt ihm ein Zabich / er name
jn / gieng heim / gedacht an der Mütter
red / würgt den Zabich / wicklet ihn inn
sein brustschüch / vnd stieß jn in den bü-
sen / kam heim / wolt den hüpschen vor-
gel

gesellschaft

3

gel der Mütter zeigen/zohe ihn auß dem
 büßen. Die Mütter für ihm wider vber
 den kam/ sagt: Er solt ihn fein auff der
 hand getragen haben. Zum dritten mal
 kompt Jockel wider zu d juncfrawen/
 sie fragt in/wie es vñ den Habich stün-
 de/er sagt jr / wie es im mit gangē was.
 Sie gedacht/ Er ist ein lebendiger nar/
 sahe wol dz im nichts seuberlichs noch
 herilichs gebürte/ vñ schanck̃t ihm ein
 Egge/die er brauchen solt/ wenn er ge-
 seet hette. Er nam der Mütter wort zu
 herten / vñ trüg sie auff den henden
 embor/ wie ein anderer löffel/biß heim.
 Die Mütter was aber vbel zufriden /
 sprach: Er solt sie an ein pferd gebun-
 den haben/ vñ heim geschleyff. Letzt-
 lich sahe die juncfraw das Crisam vñ
 tauß an im verloren was/ dann es was
 weder vernunft / zucht noch weißheit
 in im/ wußt nicht wie sie des Narren le-
 dig werden solt/ vñ gab ihm ein groß
 stuck speck / vñ stieß im in den büßen/
 er was wol zufridē. Er wolt heim / vñ
 forcht er würde es im büßen verlieren/
 gedacht an der Mütter reden / nam es
 auß

Die Garten

auß dem büsen/ vnd bands ein Roß an
den schwantz/saß darauff/vñ reit heim.
Da lieffen die hund hinten nach / vñd
rissen den speck dem pferd vñ schwantz/
vñ frassen in. Er kompt heim/der speck
war auch hinweg. Zindenach sahe die
mütter ihres sons weißheit / forcht die
heyrat würd nit für sich gehen / für zu
der jungfrawē Eltern/begeret den tag
der beredung zu wissen mit ihrem Son.
Vnd wie sie hinweg will gehn / besilcht
sie im ernstlich/dz er wol haußhalt/vnd
kein großwesen mach/ dann sie hab ein
gansß vber eyern sizē. Als nūn die müt-
ter auß dem hauß w3 / so zeucht der son
kein in dē Keller / saufft sich voll weins/
vnd verleurt den zapffen zum faß / wie
er den sücht / so laufft der wein aller in
den Keller. Der gūt vetter nimpt sein
sack mit meel/ vñ schütt es in den wein/
das es die mütter nit sehe wenn sie kō-
me/demnach laufft er hinauff ins hauß
vnd hat ein wildes geprecht / so sitzt die
gansß da/vñ brütlet/die erschrickt / vnd
schreyt/gaga/gaga. Den narren kompt
ein forcht an / vnd meynt die Gansß bes-
gesagt:

Gesagt: ich wils sagen / vnnnd forcht sie
 schwezt / wie er im Keller hauffgehal-
 ten / nam die Gans / vnnnd hewe ihr den
 kopff ab. Nun forcht er / wo die Eyer
 auch verdürben / so wer er in Tausent
 lusten / bedacht sich vnnnd wolt die Ey-
 er außbrütlen / meynet doch es würde
 sich nit wol schicken / dieweil er nit
 auch vol federn were wie die Gans / be-
 dacht sich bald / zeucht sich gar nackent
 auß / vnnnd schmiert den ganzen leib
 zu rings vmb mit honig / den hat die
 Mütter erst newlich gemacht / vnnnd
 schüttet darnach ein beth auß / vnnnd
 walgert sich allenthalben in den federn
 / das er sahe wie ein hanffburz / vnd
 satzte sich also vber die Gänßeyer / vnd
 was gar still / das er die jungen Gänß
 nit erschreckte. Wie Hans Wurst also
 brütlet / so kompt die mütter vnd klop-
 fet an der thüren. Lawel sitzt vber den
 Eyern / vnnnd will kein antwort geben.
 Sie klopffet noch mehr / so schreyet er:
 Gaga / Gaga / vnnnd meynet / dieweil er
 junge Gänß (oder Narren) brütlet /
 so köndte er auch kein andere sprach.

Die Garten

Zuletzt drawet jm die Mütter so fast/
das er auß dem näst kroch/ vnnnd jr auff
thet. Als sie ihn sahe/da meynt sie es we
re der lebendig teuffel/ fragt was das
were? Er sagt jr alle ding nach der ord
nung. Der Mütter was angst mit dem
tippelnarren/ dann die braut solt bald
nachfolgen/vnd sagt zû ihm/ sie wolts
ihm gern verzeihen/ er solt sich nûr jetzt
züchtig halten/ dan die braut kem/ das
er sie fein freundtlich empfahen vnnnd
grüssen solte/vnd die augen also höflich
vñ fleissig in sie werffen. Der Narz sa
get ja/ er wolts alles thun/ weschet die
federn ab/vnd thet sich wider an/gehet
in den stall/vnd sticht den schaaffen ala
len die augen auß/stößt sie in büsen. So
bald die braut kompt/ so gehet er jr ent
gegen/wirfft ihr die augen alle/so vil er
hat/ins angesicht/ meynt es müßt also
sein. Die güt Jungfraw schämet sich/
das er sie also beschissen vnnnd verwüßt
hat/sahe des narren grobheit/ das er zu
allen dingen verderbt war/ zohe wider
heim/sagt ihm ab. Also blib er ein Narz
noch als vor/ vund brütlet die jungen
Genß

gesellschaft.

5

Gänß noch auff diesen tag auß. Ich besorg aber / wenn sie außschliessen werden / so solten es wol junge Narren sein. Gott behütuns.

Von den Bauren die ein lebendigen Herigott haben wolten.



Die bauren von Wintershausen / hatten ein alten zerbrochene Herigott / wurden rathig / dz sie zum Bildhauer zwen auß dem Gericht schickten in der Fasten / das er ihnen

Die Garten

nen auff den Palntag vnd Karwoch/
ein andern Herigott machen wölt/ wel
chen sie dann fürtan in der Kirchen zu
gebrauchen hetten. Die zwen güten bi
dermänner kamen ghen Straßburg zu
einem Bildhawer / welcher ein rechter
satzman was/ sie zeigten jm iren befehl
an. Da sprach er/ Ob sie lieber ein leben
digen oder todten Herigott haben wol
ten / so wolt er ihnen einen machen der
ihnen gefiel. Der ein vnder den Bauren
vermeynt / man solt die Gemeind da
heim vor darumb befragen. Der ander
sagt/ es were nit von nöten / allein das
sie wüßten in welchē gelt ein jeder Heri
gott were. Der Meister sagt: Der todt
neme mehr arbeit / vnd were köstlicher
dann der lebendig / darumb so were der
lebendig am gelt desten geringer. Die
zwen wurden rätzig vnd sagten dar
auff: so solt er jnen ein lebendigen Heri
gott machen / wenn sie ihn heim brech
ten/ vnd er der Gemeind nit gefiel/ oder
wo er sich sonst krautig mit jhnē halten
würde / so wolten sie in gleichwol selbs
todt schlagen / es were on das eben die
Marters

gesellschaft.

Warterwoch/das er sich leiden müßte/
vnnnd man selzam mit ihm vmbgienge.

Ein Jüdin hielt vil mehr
vom Tauff/ dann von der
Beschneidung.



In Landaw woz ein schöne junge
Jüdin / derẽ ward eins mals durch
ein fromen alten burger gerathen/
sie solte sich Tauffen lassen / vnnnd den
Christen glauben annemmen / so wolte
B ij er je

Die Garten

er jr seiten son geben. Sie fragt den gū-
ten altē Vatter/ warauff doch der Chri-
sten glauben berūhet / dann sie was zū
speyen wol gelert. Der alt Chremes sa-
get: Auff dem heiligen Tauff. Antwort
die Jüdin: Wie hoch wol die Christen
den Tauffhielten vnd achten/ vnd was
er jnen fürstendig were? Der alt Pater
antwort/ vnd sagt: O gar vil/ dann on
den Tauff ist dem menschen der Himel
beschlossen/ vñ versperit. Darauff sagt
die Jüdin: Ich hielt auch mehr vō dem
Tauff/ weder von vnser beschneidung/
dann es kan den Christen souil nit ab-
gewaschen werden / als den Juden ab-
geschnitten / fürwar stünd die sach bey
vns armen weibern/ so müste man jeg-
lichem Juden zwey mal souil dran se-
zen / dan etwas darvon schneiden. Es
müssens leyder vnser vil mit gedult lei-
den / wir sehen aber nit deßer baß zūm
handel/ das vns vnser nechsten freund
vñd gūnner / vnser beste vñd liebste
leibs narung berauben / deren wir dar-
nach mit der zeit schwerlich mangeln
müssen. Der fromm alte Mann befand
wol

wol dz sie sein spottet/ schwig still/ vnd
zoh heim.

Von einem Schuhmacher/
der einem Bauren die fuß
beschneiden wolt.



In Baur kam zu Elßazabe-
ren zu einem Schumacher / ließ
ihm ein par schuch machen. Der
Schumacher hieß ihn auff ein bestimmte
zeit seine schuch holen. Der Baur kam
darnach / vnd wolt seine schuch anle-
gen/

Die Garten

gen/da waren sie jm viel zu klein. Er sahe wol drein/ Konde sie aber nie anbringen. Er ward zornig vber den Schühmacher/ wolte die schüch nit/balget mit ihm/vnnd sagt: Warumb er sie ihm nit nach seiner füß art gemacht hett? der schühmacher bedacht sich bald/ besicht die füß/vnnd spricht: Ich hab all mein tag nie keinem menschen kein vnrecht per schüch gemacht/ vnd die seind auch nit vnrecht / wie du selbst siehest. Der mangel aber merck ich wol/ der ist allein an deinen füßen/ die seind also vngereinpt vn knollechtig (wie du dann one das selbs ein feins trollen Männel bist) das die schüch nit hinüber mögen/ der sachen ist aber gut zuthun. Behend vnd bald so erwünscht der Schuster ein kneippen / vn dem bauren vber die füß/ vnd will sie jm beschneiden / dz sie recht in die schüch werden. So das der Baur ersicht/so schreit er laut/vnd spricht: O blüts willen lieber Meister/ es bedarff des beschneidens gar nichts/ muß ihme je also geholffen sein/ so laßt mich recht also klozrechtig mit meinen füßen heim ziehen/

gesellschaft.

8

ziehen/ich will euch danoch die schüch
gern vnnd wol bezalen. Also empfien
der Schuster das gelt / vnnd zohe der
Baur mit seinen schühen heim / vnnd
blieben ihm die füß vnbeschnitten.

Von einem Türcken/der
in der Christen Kirchen zu
opffer gieng.



Vff ein zeit hat Amurates
der Türckische Keyser/einen Wa-
scha in Italien gesandt/der Chri-
B iij sten

Die Garten

sten Glauben vnnnd Ceremonien / züer-
kündigen. Vnnnd als er ghen Pisa kom-
men / da ist er auff aller Heiligē tag (wel-
ches ein hoher opffer tag ist) in die recht
Pfarckirchen gangen / vñ der Christen
andacht vnd Ceremonien wol warge-
nommen. Als aber der Wascha mit sei-
nen Türcken vnnnd knechten den Pfar-
herren in seiner priesterlichen Kleidung
an dem Altar sicht angethon / die Mess
halten (der was ein Münch) vnnnd die
pfarckinder / jung vnd alt / alle zü opffer
gehen / da gieng der Wascha mit seinen
Türcken auch züm opffer / auff das er
die warheit erfaren köndt / was sie bey
dem Altar theten. Demnach er nün die
weise vnd alle ding / darumb er außge-
schickt was / mit warheit wol erfaren /
zohe er widerumb in die Türckey zü sei-
nem Keyser. Als nun der Türck ihn fra-
get / was er für ein art des glaubens bey
den Christen gesehen hette? Antwort
der Wascha vnd sagt: Ich gieng zü Pi-
sa in ihre kirchen / vnd sahe ein beschor-
nen narren in Seiden vnd Sammet be-
kleidet / vor einem steinhaußen stehen /
darüber

darüber warē thücher gespreit/der hett
 groß gemümel vnd langs gefecht mit
 im selbs/ vnd thet im niemands nichts.
 Da er lang also mit ihm selbs hadert/so
 keret er sich herumb/vnd rüfft dē volck/
 so lauffen die Christen all die in der kir-
 chen waren/eilendts zū im/ vnd bringt
 ihm ein jeder gelt/vnd wer im gab/dem
 gab er zū lon ein lumpen / den het er an
 arm gebunden/zū küssen / vnd grumpte
 doch für vnd für/gab niemands kein
 güt wort. Ich gieng auch herzū/brachte
 ihm ein ducat/ vnd küßt den lumpen/
 allein darū/ dz ich der narheit möch-
 te genüg zūsehen. Am letzten zeucht er
 ein stecken auß dem wasser / vñ schlecht
 vmb sich / da laufft jederman auß der
 kirchen/vnd lassen ihn allein darinnen/
 Ich gieng auch herauß / vnd hab mich
 demnach also wider hieher gefügt/vnd
 damit ihrs glaubens genüg / dann ich
 merck wol / würd ich ein Christ / vnd
 dieses solt ires glaubens ein stuck sein/ich
 het nit gelts genüg den beschornen nar-
 ren zū zutragen. Der Türckisch Keyser
 gab ihm antwort / vnd sagt: Du wensst
 B v du

Die Garten

du habest ein Narren mit einem bschornen kopff gesehen / das gelt also gedultig von den leuten zunemen / vnd ihn dargegen den lumpen zu küssen geben / Ich sag dir warlich / das er kein Narr ist / sonder der aller witzigst gewesen / ja auch weiser weder du selbst / dann als du sagst / so hat er dich auch umb dein gelt betrogen. Ich sage dir / es ist ein weißheit / dz sich vnterweilen einer zum Narren machen laßt / das er von andern das gelt mit geschicklichkeit (Gott geb sie leiden mangel oder nicht) bringe / deshalben bist du ein grösserer Narr dann er / das es dir nit gefallen / vnd du auch nit weißt warum sie es thun / dich nit dester weniger umb dein gelt hast bescheissen vnd betriegen lassen.

Ein Jungfraw ward zu
Kosten vom Concilio eines
Kindlins schwanger.

D V Kosten auff dem Concilio /
da was ein Goldschmid / der hett
ein Schwester bey ihm / welche nun
auff

auff 13. jar alt war / vñ wiewol sie mehr
malē werber gehabt / so wolt er sie doch
niemands geben / auff das er nit mit ihr
theilen dörffte. Nun auff dem Concilio
daselbst / da straucht sie / vnnd fiel in
ein heppen / ward wund / sieng an zū ro-
gen / vnd mit ein kind zū gehn. So bald
der brüder das gewar ward / erwünscht
er ein bloß schwert / vnnd sagt es ihr an
die brust / sie solt jm sagen wes das kind
were. Die güt Jungfraw was erschro-
cken / vnd sagt: Es wer ein werck vnnd
geschafft des h. Concilij / das Concilio
um hett jr den schaden gethon / dann sie
hett im Concilio handeln lassen / vñ we-
re also daruon schwanger worden. Als
der Brüder dz vernā / kam in ein forcht
an / gedacht wo er hand an sie legte / so
würde in dz Conciliū verdamen / vnd so
dā das Concilium ein solch heilig ding
were / das es jederman freyheit gebe / so
ließ er d̄ Schwester freywillig zū / dessen
so lang das weret nach ihrem willen /
vnnd des Conciliums rath sich zū ge-
brauchen / verhofft durch diese gütige
Zeit / es solte ihnen beyden an der seelen
genießlich

Die Garten

genießlich sein / wenn aber das Conci-
lium vergieng / so sollte sie als denn wi-
der sein wie vor / dieses würd jr des Con-
ciliū halben kein schaden bringen mö-
gen. Diesem befelch vnd erlaubnuß hat
sie hernach gelebt vnnnd fleißig außge-
wartet.

Es wolt einer auff dem
Seil gehen / vnnnd fiel
herab.

In lotters büb kã gen Franck-
fort in die Meß / der thet sich auß
er wolt auff dem Seil gehen. Es
ward jm zūgelassen / das Seil ward ge-
spannen / wie er mit den füßen drauff
tritt / so fählet jm der tritt / fällt herab /
vñ fällt ein arm entzwey / jederman las-
chet / vnd ließen in ligen. So laufft aber
ein nar: herzū / ders gesehen hett / vnnnd
wüschet mit feusten vber den armen lot-
ters büben / schmiert vnnnd schlecht ihn
vñ das maul vnd kopff / wo er in traff /
vnanges

vnangesehen/das ihm der arm entzwey
was / vnnnd sagt: Ich hab gemeynt ich
sey ein Narr / so bin ich witziger weder
du / blibest du ins Teuffels namen auff
der erdē / wie ich jm thū / so werstu lang
mit so vbel gefallen. Es ist nit lang ich
fiel vber ein bandt herab / vnnnd müßt
mich mit rüthen streichen lassen. Du
werest wert das man dir mit einem hä-
rinen seil in der Kerben geiget / daß dir
das Klimmen vergieng / also müßt man
den Narren hinweg / vñ den Seilgeher
zum Scherer führen.

Von einem vngelerten
Schulmeister/der das A-
gnus Dei außlegt.

In dē Particular zu Erffurt/
was ein vngelerter schulmeister/
der ward durch die Schulherren
auff ein zeit befragt / wie er dē schülern
das Agnus Dei exponiert? Er sagt: A-
gnus Dei / O jr lieben Herren. Qui tol-
lis /

Die Garten

lis/ Die jr hinneimen vñ auffhebē. Peccata mundi/ Das gelt der welt. Miserere nobis/ Ach gebt vns auch ein theil. Der güt Ksel ward weiter gefragt/ wie er den versß im psalmen verstünde/ Sacerdotes tui induantur iusticia et sancti tui exultent. Der Schülmeister sagt: Er hett solches auff der Lauaten das selbst zū Erffurt gelert/ Nemlich/ Sacerdotes tui/ Deine gelerten vñnd priester. Induantur iusticia/ Sollen gute feiße belgröck anlegen. Et sancti tui exultent/ Vñnd demnach mit Creutzen gehen/ vñnd mit ihren mägden frölich danczen. Die Schülherren zogen heim vñnd fragten ihn nichts mehr/ dann es betraff sie auch zūm theil/ ihrer mägden halben.

Von einem verdorbenen

Müller/der bettlen
gieng.

Zu Sempach im Schweitzerland/da was ein Müller/der so gar verdarb/ das er müßt betlen gehn/ sich

Ich acht ihn für der Müller heiligen)
 man frönt in/vñ trüg im auß alles was
 er hette. Der kam eins mals für eines
 Becken hauß zů Zofingen / vñ bat vmb
 ein alnügen vmb Gott vnd des handt-
 wercks willen. Der beck fragt in/was er
 für ein handtwerck kōndte? Der betler
 sagt: Er wer ein Müller gewesen. Sa-
 get d̄ beck: Wieuil hastu wol Baurē ge-
 habt die bey dir gemalen haben? Ant-
 wort der betler/Neunzehē. Oho sagt
 der brotbeck/du vnſletiger mann/ kan-
 ſtu nit ſouil ſtelens / dz du betlen gehſt/
 ich wolt mich mit dem mülzer dermaſ-
 ſen vereiniget haben / es hettē die bau-
 ren alle neunzehē ehe müſſen betlen ge-
 hen weder ich/ Hastu ſo ein gūten raum
 vñnd zeit (dieweil man dirs als ſelber
 heim bracht) dein ſelbs zūwarten oder
 warzūnemen gehabt/ vñd ander leuten
 müſſen wachen/ vñd haſt dein ſelbs ver-
 geſſen / ſo geb ich dir nit die abſcherren
 auff meiner würck bancck/ich geſchweig
 ein ſtück brots. Weiſtu nit dz man ſich
 zū zeitē neeren müß/wie man mag vñd
 kan / wil mā anderſt im alter nit betlen
 gehn/vñd gab im nichts.

Von

Die Garten
 Von einem gar altē Mann
 der eines jungen Meidlings
 zur Ehe begert.



In Schwabenlandt was ein
 alter Mann/der saß mit hauß zu
 Landßberg/ sechs meil von Aug
 spurg/ Der hūlet vmb ein schöns jungs
 Meidlein / Tūn ihr freund waren des
 gar wol zūfrieden / redeten also vil mit
 dem Medlin / das sie jren willen darein
 gab/doch mit der Condition/ wo es ihr
 mißling/so wiß sie wem sie solt die schul
 de geben/also ward d̄ Heirath beschlos
 sen/

sen/Vnnd der güt alt Patron hielt sein
junges Meidlein gar wol / doch kondt
er nichts weitters mit ihr außrichten/
dann er pflegt alle morgen sein bardt
vnd haar zükemmen/ also für er jr auch
alle mal mit dē Kam oder bürsten / vber
das jung desche/vnd das güt Medlein
meynt es müßt also sein / vnd ward gar
wol darmit züfriden / vnnd lebten wol
miteinander biß in das 4. jar. Nün die
zeit kam dz der güt alt Patron von die-
ser Welt verschied/ vnnd doch züuor er
seinē lieben jungen weib / jr all sein hab
vnnd güt verordnet / nach seinem todt
solt mans jr alles vberantworten / das
dann geschach. Nün diß güt jung meid
lein gehüb sich gar vbel vmb den alten/
Da kamen ihre freund vnnd trösteten
sie mit solchen worten/ sie solt züfriden
sein vnnd vnserm Herigott die sach be-
uelhen / dann da giengs auff der Welt
nit anderst zü/sie versehē sich/ wan nün
die zeit keme / wolten sie wider sehen/
dz man sie versorget mit einem jungen
gesellē / dieweil sie vor ein alten Mann
bett gehabt / müßt sie es nün auch ver-
suchen

Die Garten

suchen mit dē jungen. Nun die güt Wirt
fraw ward gar vbel betrübt / lebet also
gar Gottsförchtig in ihrem Witwen
standt. Ober etlich Monat kamen die
freund vnnd zeigten jr an / Es wer mit
güt dz sie so lang solt on ein Man sein/
dan sie wer jung/vnd würd jr vbel auß
gelegt werden / also ergab sie es ihren
freunden/wz sie theten / were sie wol zū
friden/ wañ sie nūr wißt dz jr so wol ge
riethe/wie es jr vor gerathen wer. Nun
die freundschaft thaten das best / vnd
bestatten sie wider mit einem jungen
gesellen/dan da war grosse narung auff
beiden seiten. Da man aber die hochzeit
machte/ kamen ire freundschaft wider
vnuerzogen/ vnnd wolten erfahren/wie
sich der jung Breutgam hett gehalten.
Da sie nū zur Braut kamen / hūb sie bit
terlich an zū weynen vnnd sagt: Ja ich
meyn jr habt es wol troffen/vnnd mich
gar wol versehen. Die freundschaft
erschracken / wußten nit was bedeut/
oder wie sie es solten verstehen/fragten
warumb sie also hertzlich weynet? Sie
sagt: Ja solt ich nit weynen/der Teuffel
geb euch den lon / also wol habt jr mich

versorgt. In summa die freund sagte: liebe Basß habē wir euch dan nit wol versehen/ ist's vns leyd/ dann w3 wir thun/ dz haben wir des besten halben gethan/ hettē auch gentzlich verhofft/ jr würdt vns darūm dancken. Sagt die Braut: sie dancket in gar nichts/wolt Gott/dz sie jren alten mann noch het. Die gūten freund waren betrübt der rede/ vñ sprachē: Liebe basß sagt vns doch die vrsach warum jr euch so vbel gehebt? Sagt sie auff's lezt/ ja solt ich nit weynē/ mein alter heri selig het im brauch alle morgen vñ abend pflegt er sein bart vñ haar zū kēnē/ so nā er ein bürstlin vñ kēit mein Kleins Ketterle auch / Aber d' groß vngeschickt düppel als bald wir zū bet kēnē/ nā die bürst kert sie vñ / stieß mir dē stil hinein solt ich nit weynē/ die freund verstundē dē handel wol wie es zūgangen war/ lachtē vñ sprachē: O liebe Basß ist kein andere klag vorhanden dan die/ so seind wir wol zūfridē / doch müstu also auff diese zeit gedult habē biß die hochzeit ein end hat/wollen wir mit ihm reden/warte ein tag oder acht/ ist es sach

C ij Das

Die Garten

das dirs dann nit gefällt / wöllen wir
sehen wie der sach zůthun ist / damit wir
nit also grossen vndanck bey dir verdien
nen. Da nūn etlich zeit herumb ward /
die freundschaft wart also biß sie kem
vnd die sach mit Recht solt fůrnemen /
wie sie es dann erstlich schwur / als bald
die Hochzeit ein end hett / wolte sie all
ire freund verklagen / Die aber soll kom
men / ist bißher noch nit geschehen / kan
auch wolgedencken sie wirdts bey die
sem verheissen auch bleiben lassen / vnd
sein die freund wol zůfriden / damit sie
nit in zanck vnd hader gerathen.

Von einem Bauren der
sterben wolt / vnd klagt sich das
er ziehen müß / vnd hett noch
vier güter pferd.

Bey Uraw im Schweitzer
land / auff einem Meyerhof / da
saß ein Baur d hieß Cleuwebert
schy / ein wunderbarlicher speyuogel /
der ward auff ein zeit krank / vnnd fast
schwach /

schwach / das jederman meynt er wolt
sterben. Sein fraw fragt ihn / ob er den
pfaffen haben vnd beichten / auch sich
verrichten lassen wolt? Er sagt: Ich
bin doch mit niemandt vneins / mit
wem wolt man mich dann verrichten?
Ich möcht aber wol leiden / dz der pfaff
hie an meiner statt lege / so wolt ich ihn
lieber beicht hören / dann das ich ihm
beichten solte / ließ ihn doch holen. Der
Pfarherz kam / vnd sagt: Clewe ein
guten tag. Clewe sagt: Ir habt ein gū
ten tag / aber ich hab ein bösen. Der
Pfarherz sprach: Clewe mir ist dein
Franchheit leyd. Der Baur sagt: Sie ist
mir noch viel leyder / dann ich habs an
halß. Der Pfarherz sagt: Wo klagstu
dich? Sagt Clewe: Hie im beth. Der
Pfarherz spricht: Wo ist dir weh? Cle
we sagt: Hie zwischen den wenden. Der
Pfarherz: Ich sihe wol du bist nit fast
starck. Ja sagt der baur / Wer ich starck
so wolt ich mit euch ringen / mir ist ich
wolts euch abgewinnen. Wolan / sagt
der Herz / Wilt du dich zu Gott bekerē /
so müßt ihm anderst thun. Sprach der
C iij Baur:

Die Garten

Baur: Wo ist er? Darauff Antwort der
Pfarriher: Ich hab in mit mir her getra-
gen. O / sprach der Baur / ist er also
schwach das man in tragen muß / so ist
er wol kräncker dan ich bin / zwen Kran-
cke helffen seltē einander / ich wil nichts
mit im zūschaffen haben / biß er oder ich
starck werd. Also gieng der Pfarriher
sein sträß / was wol geueriert / vnd hett
nichts außgerichte. Nichts destweniger
aber was der Baur mit dem speywerck
vnd vnnützen geschweiz also blöd vnd
schwach wordē / das sich jederman sei-
nes todts versahē / wie auch geschahē.
Da sprachen die Frawen zū ihm: Cleu-
we / sollen wir dir ein Kertzen anzünden?
Neyn / sprach er / es ist heiter / ich gesihe
noch genüg. Wie er aber noch schwea-
cher wirt / sagt er zū jnen: Wolan / zün-
det rechte die Kertzen an / es will doch am
letzten S. Vix tanz han. Also lieff man
bald / zündt die Kertzen an / vnnnd gab sie
ihm in die hand. So kompt sein nach-
baur Vincenz / als der sihet das er so
schwach ist / spricht er zū den Frawen:
Er zeucht schon / Gott helff im. Das hō
ret

ret Cleuwe/wie schwach er was / vñnd
sagt: Nun muß es Gott treulich erbar
men/ das ich noch so vier güter starcker
gerühter roß im stall hab stehen / vñ ist
deren keins / es möcht baß ziehen dann
ich / vñd wirt mir als dem schwächsten
die größte bürde auffgelegt/ also das ich
allein ziehen muß. Ich gedenc ich wer-
de am ziehen ersticken / das geschach/
dann er starb gleich.

Ein Jud ward ein Christ/
verdarb vñd ward wider reich.

Dobias hieß ein Jud / der saß
zu obern Berckheim der hett ein
grausam groß güt mit wüchern
vberkomen/ & ließ sich auff ein zeit bere-
den / dz er dē Christen glaubē annemen
solt / vñ wiewol er nit gern darhind kā/
od sein groß gewonnen güt verließ/ war-
de er doch dahin bethādinget / dz er ge-
taufft ward/ da sagt man jm/ dz er alles
sein güt vñ Gottes willē armen leuten
geben solte/ so würde jm Gott hundert-
feltig sonil dargegen wider bescheren
C iij vñd

Die Garten

vnd geben. Als er nūn getaufft/vñ Bonifacius genannt ward / auch sein hab vñd gūt vmb Gottes willen hinweg gegeben hette/ward er ein zeitlang von den Burgern vmbher zū gast geladen/vnd jm von wegen der bekerung vñd annemung des Christlichen glaubens/viel ehr vnd gūtthat bewisen. Da man aber lezlich anfieng müd zū werdē/vnd abzūkeren/vnd der gūt Bonifacius nit mehr geladen ward/ nit mehr wūchern dorffte/auch nichts mehr zūleihen oder zūgeben hette / fieng er an dūrfftig vnd krank zū werden / das man ihn in den Spital nemen müßt / da gewan er die rote rūr / oder außlauffen so starck / das er sich seins lebens ganz vñd gar ver- wegen hette. Demnach aber er sich all- zeit auff die hundertfeltige widergel- tung seines gūts / dzer so frey vñ Gottes willen geben hette / als er getaufft ward / vergebens vñ vñ sonst gehofft/ des seinen damit nū auch beraubt war/ vnd ein solche schwere tödeliche krank- heit darzū vberkommen hett / dann jes- derman ließ ihn das seine schaffen / nies- mand

mand nam sich sein nicht mehr an. Da
kam er in ein solche verzweiflung / dz er
auß dem spital gehn oder kriechen wol-
te / so weit / lang vnd viel / das niemandt
wüßt wo er hin keme. Also zeucht er je-
derman vnwissent auß dem spital. Vnd
dieweil er also vngeheb mit dem hinde-
ren bogen was / der roten rür halben /
kame er auff ein wisen / da müßt er sich
reuspern / vnnd als er ein schermesser /
oder wie mans nennt / sücht / so findt er
ongefehrlich ein secklin vol Edelgestei-
nes / welchs einem Joylierer empfallen
war. Er was fro / nam das / vnnd ward
wider reich / leget sich an die ärtzt / vnnd
ward gesund / kaufte heuser / äcker / mat-
ten / vnd was er bedorfft / lebt darnach
in grosser reichthumb. Aber als sich die
leut wider sein annemen vnnd gesell-
schafft zu ihm suchen wolten / mocht
doch niemand einichen willen bey ihm
wider erholen / das er sich der leut oder
gesellschaften mehr annemen wolt.
In dem warde er auch gefragt / ob nit
das Euangelium war were / das ihm
Gott sein außgetheilt güt in die armē /

Die Garten

hundertfeltig wider geben hette? Ja
sagt Bonifacius/er hat mirs wider ge-
ben/ vnd wol gehalten / aber die sporen
wol ertrieffen lassen/ dann er mirs also
saur vnnnd versalzen gemacht / auch so
lang verzogen / das ich mich darüber
schier zu todt gehosieret hett. Ehe ich
mein güt mit solchē gefährlichē scheis-
sen mehr vberkommen wolt / auch er
mit der widergeltung mirs also lang
verziehen/ vnd ich mein leib vnnnd leben
in ein solchen zweiffel stellen/ ehe wolte
ich mich des Christen glaubens wider
verleugnē/ also hat mich der new Chris-
tus biß auff das hinderst mit meinem
arß außgemergert vñ abgericht. Ein al-
ter Jud gibt selten ein gütten Chris-
ten / wie die alten hund / die
lassen sich selten bens-
dig mach-
en.

Die Bauren von Garburg
wolten einem Nußbaum zu-
trinken geben.

Der

DEr zeit / als die Baurfleut /
 vnnnd nemlich die in dem gebirg /
 noch also from / schlecht / einfaltig
 vñ gerecht waren / da stund außwen
 dig eines dorffs geheissen Garburg / ein
 grosser nußbau / an ein reyn / bey einem
 wasser / dem hieng ein grosser Ast vber
 dz wasser / vnd senckt sich schier biß auff
 den fluß hinab. Die gute freund waren
 liebe / einfeltige / frome leut / hetten ein
 mitleiden mit dem baum / vnd giengen
 zu rath / zübedencken woz doch dē Fluß
 baum angelegen möcht sein / das er sich
 also zum wasser neigte. Als nun man
 cher hand rathschleg fürgiengen / sagt
 zum letzten der Meyer / ob sie nit nār
 risch leut weren / sie sehen doch wol / das
 der Baum an einem reyen vnd durren
 stünde / vnd sich darumb auff das was
 ser senckte / das er gern trincken wolte /
 er gedechte auch nicht anderst / dann
 das derselbig Ast / des Baums schna
 bel were. Also wurden die Bauren zu
 rath / legten ein grosses seyl oben an den
 baum / stelten sich jenseit des wassers /
 vnd

Die Garten

vnd zogen den baum mit gewalt herab/vermeynten ihm trincken zugeben. Wie sie ihn nün schier bey dem wasser hetten/ befalhe sie dem botten auff den baum zusteigen/ vnd den kopff oder dolden vollen in dz wasser trucken. Der bott steig hinauff/ vnd truckt den dolden hinab/ so bricht de bauren das seil/ vnd schnellt der baum vbersich/ vnd schlecht ein harter ast dem botten den kopff ab/ der fiel in ein dicke hecken. Er fellt von dem baum herab/ vñ hett kein kopff. Die bauren waren erschrocken/ das er kein kopff hett/ giengen zu rath vnd fragten vmb/ ob er auch ein kopff gehabt hett/ da er auff den baum gestiegen were/ es kundts aber keiner wissen. Der Meyer sagt: Er glaubte sicherlich er hette kein kopff gehabt/ da er mit ihnen hinauß were gangen/ dann er hette ihm wol drey mal geruffen/ hette ihm aber nie antworten wollen/ doch hette er nit eigentlich acht darauff genommen. Also ward mit gemeiner vrtheil er Pandt/ mā solt jemandts heim zu seiner frauen schicken/ vnd die fragen lassen/ ob

ob jr Mann auch heut am morgen den
kopff hab gehabt da er auffgestanden/
vnd mit ihnen hinaus gangen sey. Also
kan noch heut bey tag niemands im
gantzē Dorff eigentlich daruon sagen/
ob der Bort den kopff daheim gelassen/
oder mit ihm hinaus getragen habe.

Von einem Bannwart/
der forcht wenn er in den Weizen
gieng/so thet er schaden/aber vier
müßten ihn darein tra-
gen.

Dummerstatt da hetten die
Baurē ein vberaus hübsches Wey-
zenfeld geseet/vnnd als man schier
schneiden solt/ da waren wol 12. pferd
in den Weyzen gangen / die zechten
güts müts darin. Der Bannwart ersaa-
he es / was im zweiffel ob er sie solt her-
aus treiben/er forcht er würde den wey-
zen zertretten vñ schaden thun. Gieng
heim vnnd zeigts dem Meyer vnnd der
Gemeind an/ die wüßten auch nit/wie
ihm

Die Garten

ihm züthün were / damit dem Weytzen
nit schaden beschehe / vnnnd der Bann-
wart dannocht die pferdt herauß treis-
ben kōndt. Da sie schier sechs stund ges-
rathschlagt hetten / vnnnd nit destweni-
ger die pferdt für vnd für den Weytzen
abāgten / da erkandten sie zūletst ges-
meynlich / es solten vier vom Gericht
den Bannwarten auff ein hurt setzen /
vnd ihm ein lange gerth in die hand ge-
ben / vnd in zū den pferden in den wey-
tzen vmbher tragē / biß er sie allgemach
herauß getribe / vñ solt der Bannwart
nit in weytzen gehn / damit er kein scha-
den thete / das geschach. Also ist dem
Weytzen mit den vieren / so den Bann-
wart darinn vmbher getragen / auch
mit dē langen rathschlagen / kein scha-
den begegnet / Aber d Bannwart het
ihm grossen schaden zūgefügt / wo er
die pferd allein herauß getrieben wū-
de haben.

Ein vngelerter Pfarher
verkündt seinen bauren weder Fast-
nacht / Fasten noch Ostern.

Ein

In dorff ligt zwischen Genß
 vnd Losanna/ das heist Grun-
 ge/ daselbst hetten die bauren ein
 pfarrherz/ der wußt weniger weder sei-
 ne pfarrkinder/ ja weniger dann d̄ teut-
 sche Michel. Dieweil derselb pfarrherz/
 weder der zeit noch des jars Warname
 noch wußte/ so verkünd er auch dē bau-
 ren weder Fastnacht/ Fasten/ Ostern/
 noch andere festtag des jars. Als er aber
 auff ein zeit/ nemlich/ auff den Palm-
 abend ghen Losanna auff den marckē
 geht/ sieht daselbst etliche so Palmē feyl
 habē/ fragt er/ woz das bedeut? Da man
 jm aber sagt/ es wer der Palmabend/ er
 kantz er erst dz er seinen baurē noch kein
 Fasten verkündt hett. Er kauft auch
 palmen/ zeucht heim. Des andern tags
 ließ er dē volck in die kirchen zusamē leu-
 ten/ vñ sagt jnē: Lieben kinder Christi/
 ich muß euch sagen dz mir bottschafter
 kōmen/ euch anzūzeygen/ das heut der
 Palmtag ist/ damit man Gott die ehre/
 nach alter gewonheit mit den palmen
 vnd ölbäumen thūn soll/ vnd wirt heut
 vber

Die Garten

vber acht tag der Ostertag sein / da richtet sich ein jedes / das es in seinem hauss mit jungen Lemern vnnnd fladen versehen sey / damit mir / als ewerem Pfaris herren / mein theil auch gebüre. Diese wochen aber sollen ihr beichten vnnnd büß würcken / dann wir haben fürhin diß jar kein Fasten mehr / das solt jr dar bey erkennen. Die Bapstlich heiligkeit hat mir zugeschriben / es sey die Fastnacht diß jar so gemächlich vnnnd langsam vō Rom auß Italia gezogen / das sie vor grosser kelt / schnee vnd eiß / vber den Gotthart vnd S. Bernhart / auch vber den Genffer see / herüber zū vns nit kommen mögen. Deshalbenn dann auch die Fasten so spat vnnnd langsam herüber gestrichen / also das sie nicht mehr dann die Karwochen / vnnnd sonst keine mit ihr bringt. Sie klagt / es seind ihr die andern fünff wochen / als Inuocauit / Reminiscere / Oculi / Letare / Iudica / auff dem Gotthart / vnd S. Bernhart zūm theil erfrore. Das ander theil hat sie vor schwache auff dem weg / erst vō Genff auß verzettelt / will also recht diese

diese woch / von wegen der grossen mü-
de bey euch haushalten. Darum so lang
sie bey vns hie ist / so beichtet / vnd wer-
det fromme kinder / wenn demnach die
woch vergangen / wo sie alsdā lenger
bey vns haushalten / vnnnd nit weichen
wolt / so soll jr der Castellen od Schults
heiß bey des Babsts bann hinweg ghen
Frezburg in Vchtland gebieten. Wolt
sie es auch nit thun / so soll er sie greif-
sen / vnd am leib straffen. Ich will euch
alle darüber als meine pfarrkind anze-
lieren. Allein vergesset der Osterlän-
der vnd fladen nicht.

Ein Koch begert das ihn
sein Herz zu einem Esel
machte.

Aleatius Maria / der Herli-
che Fürst vnd Hertzog zu Mey-
land / hielte stätigs ein grossen
Fürstlichen hof / vnnnd was gar ein mila-
ter Fürst / so er vmb etwas gebeten war-
de. Auff ein zeit kamen an einem abend
D vil

Die Garten

vil frembder Herren / da eben der Fürst
essen wolt / vnnnd baten vmb allerhand
lehen vñ sonst herrlichkeiten. Der Fürst
hette gern zū nacht gessen / vñ morgens
ihnen ein antwort geben / aber sie wol-
tens nit verstehen / sonder hiengen für
vnd für an / das er er sie (wolt er zū frie-
den sein) ihrer bitt geweren müßt. Da
tratt des Fürsten Mundkoch herfür /
sagt zū inen / ob sie auch menschen oder
Eiſel weren / ob sie nit wüßten welche
zeit morgens oder abends ein solcher
mechtiger Herr angesprochen werden
solte / es verwundert ihn / dʒ sie der Fürst
so gnedig hörte / vnnnd das sie in dieser
molestierung / damit sie den Fürsten wi-
der abends also bemüheten / souil von
im impetrierten / vnnnd dessen gewehrt
würde. So spricht der Fürst zū dem Koch:
Du vermeynst sie bitten vngereumbte
ding (wiewol es war) warumb bittest
du nit auch ein mal vmb etwas? du bit-
test weder morgens noch abends. Ja
sprach der Koch / so ist mir genüg / das
ich also ein gnedigen Fürsten vnd Her-
ren hab. So ich aber bitten wolte / so
wolt

wolt ich anderst nichts begeren / dann
das mich K. F. G. zu einem Esel mach-
te. Der Fürst verwundert sich dieser re-
de/dz er lieber ein Esel / dan ein mensch
zu sein begert / fragt ihn wie er das ge-
meynt? So sihe ich wol/sprach d. Koch/
all die so K. F. G. so hoch erhebt / ihnen
ehr / würde / ämpter vnnnd grosse Her-
schaften gelihen / die seind also gar zu
groben/stolzen/grossen/tollen vñ hof-
fertigen Eseln worden/ also das sie gar
nit achten/ob sie K. F. G. tag vñ nacht/
mit geylen vnd gurglen molestieren vnd
bekümmern / wie es dann jertzunder ge-
schehen/vnnnd noch kein auffhörens da
ist. Weren sie nit Esel / solten sie billich
K. F. G. vn bekümmert zu nacht essen/
vnnnd rühwig lassen. Desßhalb begerte
ich auch ein Esel zu werden / so würde
ich auch ein grosser Herz/mit wenig ver-
nunfft vnnnd weißheit / wie auch diese
seind/begabt vnd vberladen.

Von einem der sich beflagt/
er wer beraubt/vnd behielt noch
den besten rock.

D ij Matiasco

Die Garten

MAltiasco der König in Hun-
gern / der fürte vil grosser krieg
wider den Türcken / vnd die O-
sterreicher / der hett ein obersten Ritt-
meister / ein gar grausamen Mann / Ja-
cobitzgi geheissen / welcher vil Reuter



vnder jm hett / die hielten sich mit rau-
ben / brennen / verwüsten / gantz vbel/
was niemandt gedencen dorfft / das
griffen sie an. Zu diesem Jacobitzgi ka-
me eins mals einer / der klagt / es hetten
ihn seine reuter beraubt / ihm seine klei-
der / gelt / vnnnd was er bey ihm gehabt/
alles genomen / auch jm gar nichts ge-
lassen /

lassen / als nur den einzigen rock so er
noch an hette (derselbig rock was von
dem besten Hungerischen thuch.) Der
Jacobitzgi hört die klag / sahe den rock
an / vnnnd fragt ihn / ob er auch den rock
hett angehabt / da er des andern seines
güts beraubt wer worden? Ja sagt der
güt gesell / sie hetten ihm sonst nichts
mehr gelassen / als denselben rock. Da
rauff antwort der Rittmeister / vnnnd
sagt: Oho gesell zeuch hin / vñ klag dich
nit / du thüß meinen reutern vnrecht /
die so dich beraubt haben / seind nit von
den meinen gewesen / dann ich hab die
meinen abgericht / sie hetten dir nit das
niderkleyd / ich geschweig das hembd
angelassen / der rock hette züm ersten
müssen außgezogen sein. Darumb rath
ich dir / klag dich nit / wilt ächter diesen
rock vnnnd was du vbrigs hast / nit auch
verlieren. Damit zog der güt Mann
hin. Vnnnd were gar nahe mit sei-
ner klag auch vmb den gü-
ten rock kom-

men.

D iij Lin

Die Garten
Ein Curtisan sagt zum
Papst/er hett ein bösen
kopff.

Der Papst Urban dem sechsten/
kam eins mals ein Curtisan vō Ho-
stia / begeret noch mehr expectan-
zen vnd Bullen/ vnd lag dem Papst so
hefftig an/dz er ihn vnwillig macht/sa-
get:er hett on das mehr dan er versehen
kōnde / (dann es kamen stetigs vil klā-
gen seinethalben für den Papst.) Der
Curtisan wolt nit nachlassen / so wolt
der Papst ihm nichts verwilligen. Der
Curtisan fieng an mit dem Papst zu-
hadern vnnnd balgen. Der Papst sagt:
Er solt sich hinweg machen / er were
ein böser büb/vñ hette einen bösen halß
starrigen kopff. Gleich facht der Cur-
tisan an/vnd saget: Allerheiligster Vat-
ter / dasselbig sagt meniglich in ganz
Italia vnnnd Teutschlanden von ewer
heiligkeit / vñ ich habs nie wöllen ver-
antworten / vnd noch nit/ vnd zohe da-
mit sein straff darvon vnnnd ward ihm
nichts.

Ein

Ein Baur gab seinem nach
bauren ein rath/der güt für
alles fallen war.



Vede Vogelneſt/ein Baur im
Entlibüch / im Schweizerland/
ſteig eins mals auff einen hohen
Thaſenbaum/etwas daran zu einem ſpei
cher zubesehen/ vnnnd es fehlt ihm aller
oberſt auff dē baum ein tritt/fallt vber
den baum abher/zerfällt etliche rippen
im leib / vnnnd ſonſt auch vbel. Dierweil
er ſich nūn ſo vbel gehüb / ſo kompt ſein
D iij Nachbaur

Die Garten

Nachbaur Heyne Klöpffgeißel genant
zū jm gangen / klagt in vnd erzeigt sich /
das es ihm sehr leyd were. Sagt weiter /
wo er ihme volgen wolt / so wolt er ihm
ein rath geben / das er sein lebtage von
keim baum mehr fallen möcht. Darzū
sagt Rude Vogelnest. Ich hett wol lei-
den mögen / du hettest mir diesen rath
hieuor geben / ehe vñ ich gefallen were /
jegunder aber ist es versaumpt / doch
möcht dannocht der rath in künfftigen
zeiten nit vnnützlich sein / fragt in / was
es für ein rath were? Darauff sprach
Heyne Klöpffgeißel: Zinsfürter thū ihm
also / sihe vnd schick dich darzū / das du
nit schneller oder behender seyest im her-
rab steigen von dem baum / weder im
hinauff steigen / vñ mit der gūten lang-
samen weilen / wie du hinauff steigest
also steig auch wider herab. Mit dieser
Kunst wūrstu dein lebenlang ab kei-
nem baum nimmer mehr fallen /
vnd gieng damit wider heim /
hett ihm ein gūte
lehr geben.

Von

Von einem Gauckler/
der fliegen wolt.

Es ließ ein loser kunds / ein
Gauckler (wie man in nennt) zu
Bononien brieff anschlahen vnd
außkünden / wie das er von einem ho-
hen thurn / gegen S. Raphaels bruck
zu / wol ein welsche meil wegs / von der
Statt außwendig gelegen / fliegen wol-
te. Wie nun auff den angesetzten tag /
ein groß volck von Bononien / hinauß
für die Statt zusamen kamen / sich mit
langem warten / der Sonnenhitze vnd
hunger / schier biß zu vndergang der
Sonnen außgemerglet hetten / vnd der
loß kantz nit came / ward jederman ver-
drossen. Also gar nahe an der nacht / da
die Sonn vndergangen / zohe er daher
ließ sich aller oberst in der höhe auff
dem thurn sehen / rüst sich mit seinē flü-
glen / jertz hinder sich / jertz fürsich zu dent
fliegen / machet damit das alles volck
mit auffgesperrtem maul ihn stetigs an-
sah / vnd des fliegens warname. Die
Sonn

Die Garten

Sonn was zů gnaden gangen / es was
schier nacht / vñnd auff das eben dassel
big Judas kind / nit vñgethā abschied /
d3 volck den tag nit vergebens genārit
vñnd warten hett lassen / so kert er sich
vmb / zeucht das gesēß hinden abhin /
sperrēt das muckēkensterlin von ein
ander / vñd laßt jedermann in das fin
ster gewelb sehen. So bald das volck
solch heßlich angesicht / sampt den flū
geln die darbey hiengē / erblickte / marck
ten sie wol das sie betrogen waren / zo
gen also matt / schwach / hitzig / hun
gers todt / vñd mit dem frōlichen
anblick desselbigen spiegels wie
der gen Bononien / vñd het
ten ein schön fliegens
gesehen.

Ein Mann vñnd ein Fraw
wurden eins / sie solt Mann mit der
arbeit / so wolt er Fraw mit haußhal
ten sein / damit jedes die geschēft
beyde ein andermal kōndte
aufrichten.

Zwent

Zwen Höf stehen bey dē Stock-
weyer neben einander / auff dem ei-
nen was ein Hofman / der mit sei-
nem Weib nit gestellen kondt / sie wiß-
ten sich gegen einander in ihrem hauß-
halten nit züuer gleichen / es was alle



zeit ein rauffen vnd schlagen bey ihnen.
In summa / Sie hielten selzam hauß.
Eins mals gedacht der hofman (der
hieß Lorentz / vnnnd die frau Adelheit)
wie doch der sachen zühün were / da-
mit so vil zancfens / haderns / balgens /
vnnnd vnruh zwischen ihnen vermittren
würde /

Die Garten

würde/saget zur frawen / sie müßt nun
an/fürhin an seiner statt der Mann sein/
so wolte er die frawen arbeit versehen/
sie solt zu acker fare/treschen/seen/ vnd
andere Manns arbeit thun / so wolt er
daheim haushalten / des jungen kints
warten / hünern / gensen / enten / den
schweinen / vnd dem fülle im stall zu es-
sen geben/kochen vnd fegen/ıc. Damit
kündt jedes des andern haushalten er-
faren vnnnd lernen. Es gesiel der rath-
schlag der frawen (die doch on das be-
giriger seind / nach dem zaum zugreif-
fen/vnd die bruch anzuthun) wol. Sie
gieng in stall / rüst die pferdt vnnnd den
pflüg / fuhr ins feld/befalh dem mann
(der jeczund fraw woz) er solt jr zu mit-
tag zuessen bringen / das kind versor-
gen das die wiegnit umbfiel / vñ dapf-
fer kochen. Ja sprach der mann/ ich wil
es recht versehen / ist gar geschestig/
raumpt auff/ fegt das hauß / singt fein
klein / wie die weiber / das man hören
solt/dz ein fraw in dem hauß were / Er
ist gar ernstlich in seinen sachen / vnnnd
verschütt ein grossen hafen mit milch/
darauff

darauff er ancken gemacht / vnnnd dem
 kind ein brey solt gekocht habē / in dem
 hauß / daß was das erst glück / Ab wel-
 chem er gar sehr erschrack / gedacht da-
 mit / das der meister gesagt hett / er solt
 gut sorg zum kind vnnnd der wiegen ha-
 ben / daß das kind nicht umbfiel. Nam
 ein grossen breyten stein / legt ihn auff
 das kind / da müßt die wieg wol still ste-
 hen / vnnnd kondt noch mocht nit fallen.
 In siele dem gute Lentzen ein / er müßt
 auch kochen / es würde schier mittag /
 vnnnd nimbt 12. eyer / schlecht die in ein
 pfann mit ancken / vnnnd stellt sie vber
 das feur zu bachen / dieweil geht er in
 den Keller vnnnd gewint wein / vnnnd vor
 dē faßlin gedacht er an die eyer ob dem
 feur / laufft bald / wil darzu sehen / be-
 helt dē zapffen zum faßlin in der hand.
 Da er in die kuchen kompt / so ligt der
 leiden aller im feur / vnnnd sitzt ein katz
 darüber / die frist die eyer. Da gedacht
 er auch an das kind ob es schlieff / ligt /
 so ist es vnder dem stein ertruckt / vnnnd
 todt. Almechtiger Gott / er was gar ley-
 dig vnnnd das kind / bedenckt sich / wie er
 der

Die Garten

der sachen thün wolt. In dem schlechten
er die hend von ime/ so felt im der zapf-
fen züm fäslin auß dē fingern. Der güt
Lentz gedacht an seinen wein/ lauffet
eilendts in den Keller/ so ist der wein al-
ler außgelauffen/ vnnnd das fäslin lähr.
Wie er schnell das kentlin erwünschen
will/ so stößt er daran/ vnnnd schütt es
auch vmb/ da schwam der Wein aller
mit einander. Wer was leydiger dann
der güt Vetter? bedacht sich hin vnnnd
her/sprach zū ihm selbs: Du wilt Fraw
sein/hast die milch verschütt/kanst kein
Ancken mehr machen/ das kind ist er-
stickt/ das heist ein Wiegen versehen/
die eyer vnd ancken ligen im fexer/ vnd
habens die Katzen gefressen/ der Wein
schwimbt im Keller/die Kan̄t ist vmb ge-
stossen/wie wil das zūgehen/ wenn der
mann vom feld heim kompt/ hungerig
vnd durstig ist/ vñ den hübschen hauß-
halt sieht. Dieweil ich mich dan̄ d̄ fraw
en geschafft/ vñ sie sich der manßarbeit
vnderwunden/ sie mir also mit einem
freyen bengel vber die lenden wüschet/
vnnnd mir den balg vol schlecht/so ges-
chicht

schicht mir doch recht/ich habes also ge-
wölt haben / warum bin ich nit Mann
blieben? In dem bedacht sich der güt
from Lenz/wie er jm thun wolt/das
me ihm in sin das er des füllins im stall
vergessen hett. Nimbt bald ein sichel/
zeucht hinauß/vnd wie er an dē Stock-
weyer abhin gehet / so sicht er ein gros-
sen hecht an dem staden halten/er was
fro/nimpt die sichel/vnd wirfft sie nach
dem hecht / vermeynt ihn zütreffen/ so
fert er darvon / vnnnd bleib die sichel im
mür ligen. Der arm Lenz zohe sich auß
vñ steig inß wasser/sucht sein sichel/bu-
cket sich / vnd griblet also lang im mür.
In solchē griblen vnd suchen/so kome
einer vnd stilt jm die kleyder. Als er nün
nach langē suchen die sichel nit bekom-
men mocht/ so richtet er sich auff/sucht
sein hembd am stadē/befindt er dz jm al-
le seine kleid gestolen sind. Vñ als er sol-
ches befindt / steigt er also trawrig vnd
nackent auß dē wasser/vnd raufft so vil
gras mit den fingern auß/ dz er ein arm
voll vberkã/ demnach ein grosse handt
voll/ damit er den knabenbüben decken
kündt/

Die Garten

Kunde / laufft eylends heim hinten zum
hof ein (das ihn niemand also nackend
sehe) dem stall zu / will dem fülle dz grass
bringen. So bald er zum stall einget
vnd sein nit war nimpt / so ist das füllin
vast hungerig / felt den nechsten vnden
in das grass / erwünscht das grass / vnd
alles miteinander / beißt damit dem ar
men teuffel den gottsbößwicht / vnd
den element allen mit dem grass am leib
hinweg. Wer was da in größern lästen
dann der arm Lenz? Er wüßt weder
aus noch ein / kam in ein solch verzweif
flung / das er sich also verwundet vnd
nackend in den ofen verbarg / stellt sich
aller hinderst aufrecht darein / vñ war
tet recht der gnaden. In dem so kompt
die Frau o / der der zeit Ackermeister /
vom feld gefaren / vermeynt ihr Mann
hett wol haußgehaltē. So bald sie aber
sah wie es umb das kind stund / im kel
ler / kuchen / vñ mit der milch zügangen
was / erschrack sie fast / vnd rufft allent
halben im hauß umb sich / Lenz / Lenz
go / es wolt ihr aber niemands erstlich
antwort geben / der güt Lenz forchte
sich.

sich. Bald schreyt sie wider: Lenz. Da
gab er in dem ofen antwort/ sagt: Ho-
ho. Der Ackermeister rufft wider/ Wo
bistu? Hie im ofen/sprach Lenz. Was
teuffels/sagt die Fraw/thustu im ofen?
Kom herfür. O neyn/sprach Lenz/ lie-
ber meister/ich hab vbel hauffgehalten.
Die Fraw sagt: Was hastu dann ge-
than? Ja/sagt Lenz/ich hab das kind
ersteckt/ hab gemeynt ich wolt die wies-
gen also steiff gestelt haben. Ach lieber
Lenz/sagt die Fraw/ dz schadt nichts/
wir wollen wol andere kinder machen/
Kom nur auß dē ofen/ ich will dir nichts
thun. Ja lieber meister/ ich hab mehr
gethā. Was hastu mehr gethan? Lenz
sprach: Ich hab den wein im Keller las-
sen außlauffen/ die kantz umbgestossen/
vnnnd auch verschütt. Es schadt nichts
lieber Lenz/sprach die fraw/ Wir wol-
len wasser trincken/Kom nur herfür. Ja
lieber meister ich hab mehr gethā. Was
hastu dann mehr gethan? Ich hab die
milch/die eyer/ vñ dē ancken verschütt/
vnnnd habens die katzten gefressen. Es
schadt nichts lieber Lenz/ Kom nur her-
für/

Die Gärten

für/wir wollen kass vn brodt essen. Ich
hab mehr gethan. Was hastu mehr ge-
than? Ich hab dē Süllin wöllē grasen/
hab die sichel verloren / vnd sind mir al-
le meine kleyder gestolen worden. Es
schadt nit / sagt die fraw / lieber Lenz/
wir wollen dz grass mit dem messer ab-
schneiden/vn andere kleyder zū Widers-
dorff aufnehmen/kom̄ nur herfür. Ja lie-
ber meister / ich hab noch mehr gethan.
welchs das aller gröst vnd bösest ist. Die
fraw sagt: dz wer nit güt/wz hastu dan
mehr gethan? Ja lieber meister/ich hab
dem süllin wöllē grass in die reyßwerf-
fen/wie ich nackent bin/fellt es in mich/
vn erwünscht mir den Knabenbüben/hat
mir denselben am leib abgebissen / dar-
rum darff ich nit hinaus kommen. Da die
fraw das erhört / erwünscht sie ganz ge-
schwind ein ofengabel/sieng an vnd sa-
get: Ja ich hab wol gedacht/es sey etwz
anders im handel dann die eyer / milch/
wein/kleyder vnd kind. Wiltu haushal-
ten/ vnd alle ding verderben / verlieren
vnnd verwüsten/vnnd laßt dir erst vn-
seren fridenmacher darzū am leib hina-
weg

weg reißen? Halt ich wil dir deins hauß
haltens geben/ stößt gleich bald mit der
ofengabel den armen Teuffel in dem
ofen/ dz er von not wegen mit den elen-
bogen vnd dem kopff die kacheln müß
außstossen/ vnnnd durch den ofen in die
stuben empfliehen/ springt also nackent
vnnnd blütig ganz geschwind zu dem
fenster auß. Die Fraw ihm mit der gab-
len hinnach/ er schreyet/ sie flüchet. Die
Nachbeurin neben ihr erhört solches
geschrey vnnnd wesen/ verwundert sich/
siehet was es sey/ ongefährlich sieht sie
ihren lieben Nachbahren Lenzgen da
lauffen/ vnnnd die Fraw vbel thun/ sie
hett ein Nachbeurlichs mitleiden mit
ihm/ vnd spricht: Ey gefatter Adelheit/
was zeucht jr mein lieben gefatter Len-
zen/ Er ist doch allzeit ein guter from-
mer Mann gewesen/ lasset den zorn fal-
len/ vnnnd gebt ihm doch ein Hembd an.
Ja/ sagt Fraw Adelheit/ ich geb ihm
S. Gallen Kraut/ allen Teuffel im hauß
hat er mir verwüßt/ vnd das kind ertrug
cket mit ein stein/ noch wer es als züuer
zeihen/ dann allein das lest vnd bösest/

Die Gärten

Solich euch nit sagen/er hat ihm vnser
jung fülle im stall / all sein haußgeschir
vnden am bauch gar vnd ganz abbeis
sen lassen/ darumb mag ich sein kein ge
nad mehr haben / das ander wer alles
güt züuerzeihē. Alßbald die Nachbeu
rin das erhört/das er seines scharwech
ters beraubt war/da ward sie ihm auch
feindt/vnd hett ein kleins hündlin/dem
lockt sie behend vnd bald/schläg die hen
de züsamen / sprach: Hurß hurß bäglin/
hurß/ dapffer an ihne / er ist doch nichts
mehr werth. Der güt Lenz was außge
than / hett kein sichern platz mehr / lieff
daruō also nackent. Da sagt die Nach
beurin: Wolan liebe gefatter Adelheit/
setzet ewer hertz zü rühen/ich hab ein gü
ten/starcken/gerühnten knecht/ der wirt
für euch sein / ich weyß euch werschafft
züttragen / denn ich hab mich wol sechs
oder sibem jar mit im gelitten / ja so wol
dz ich weyß was er für ein gesell ist. Al
so müßt der güt Lenz vmb seines hauß
haltens willen seinen besten degen ver
lieren/vnd gar von dem büch der leben
digen außgethan sein. Ein ander mal
versehe

versehe der Man das sein / vñ die Frau
ihr werck / so hat keins dē andern nichts
züuerweisen / damit behelt der Mann
seinen gūten scharwechter frisch vñnd
gesund / vñd bleibt die Frau deſter baß
mit ihm zūfriden / das er nicht mit dem
kopff durch den ofen / vñnd zūletst gar
ſchandelich / nackent vñd vbel verwun-
det entlauffen muß.

Ein Pfaffenmagt wolt lera-
nen auff dem rucken auff die
Kirchweyhe gehn.

Du Toll in Franckreich / was ein
reicher Thumber / der hat ein schön-
ne Magdt / die allein auff ihn war-
tet / die hieß Joanna. Auff ein zeit bath
ſie den Herren / er ſolte ihr ein new bar-
schüch machen laſſen / ſie wolt am Son-
tag hernach auff ein Kirchweyh gehen.
Der gūt alt Herz ſagt: Sie ſoles thūn /
(ſie was on dz her vñ meister im hauß)
Sontags früe kompt der schühknecht /
bracht ihr die schüch / er vberkam be-
z in ſcheid /

Die Garten

scheyd / vber eine stundt oder zwö w
der zükommen (dann er was ein hüps
scher junger gsell.) Der Herz sagt zu der
magdt / sie solt ein gute henn zusezen/
dennacht möcht sie auff die Kirchwey
gehen. Der Herz zohe in die Kirchen/
vber ein weil kompt der Schühknecht
seinem beuelch nach / die Magdt em
pfieng in freundtlich. Von stundan leg
ten sie sich strack's in dē hauß nider / vnd
theten ich weiß nicht woz. Der güt Herz
gedachte aber in der Kirchen / so die
Magdt auff der Kirchweyh were / so
würde der hennen mit dem feur anma
chen vbel gewart werden / geht auß der
Kirchen heim. Auff dem weg / findt er den
schümacher / den meister / den ledt er zu
gast / sagt: er solt mit ihm heim gehn / er
wöll im die schüch bezalen / sein Magdt
sey auff die Kirchweyh gangen / vnd hab
die neuen schüch an / er gedencke wol /
sie werde sie mit danczen vnd lauffen
abfertigen / das er ihr morgen ein new
par muß machen lassen. In denen reden
kōmen sie zu dē hauß / der Herz schleußt
auff / sie gehen hinein / so sehen sie / wie
der

Der schütnecht vnnnd die Magdt ein
 ander im hauß vmb das geseß ropffen.
 Es was ein wunderbarlicher kampff/
 dann ihr keins dem andern nichts ver-
 tragen oder nachlassen wolt/ darneben
 was inen auch so güter ernst/ das sie we-
 der den Herren noch den Schuster hör-
 ten. Wie aber der Herz das gauckelspil
 ersicht / so spricht er: Vor donder/ vor
 blitz/ Joanna Joanna/ das ist ein wun-
 derbarlicher gang / wenn du also wilt
 auff die Kirchweyh gehen / so wirst du
 diese newe schüch dein lebtage nit zubre-
 chen. Die Magdt vnnnd der schütnecht
 wüschten in dem schrecken auff/ damit
 wendt sich der güt Herz vmb / vnd sagt
 zu dē schütnecht: Wolan ziehe du heim/
 vnd wen du meiner magdt mehr schüch
 machst / so sag mirs / ich wil dir allezeit
 dein trinckgelt auß dē seckel schencken/
 du solts jr nit also grob auß Kerbholz an-
 schneiden / es würde mich sonst wol ein
 jar/ wen sie wolt auff dem rucken lernen
 auff die Kirchweyh gehen/ zween oder
 drey rōck kosten. O lieber meister sehet
 selber / zu gleicher weyß / wir beyde sie
 E iij haben

Die Garten

haben sehen gehen/ so bedörffte sie auch
wol kein solen in den schühen / aber ein
groß breyt starck leder auff dem rucken/
das thüch würde zü schwach sein/ vnnnd
diese schimpff nit alle erleiden mügen.
Demnach zohe der güt schüh knecht das
hin. Die Magdt gieng mit den neuen
schühen wol angelegt auff die kirchwey
he. Der Herz vnd der schühmacher assen
die henn/ waren alle vier wol content/
es hat auch niemands am leben keinen
schaden oder nachteil bracht/ so ist auch
jhr keinem kein ripp zerbrochen.

Ein karger Haußschaffner trancß brunk für Gardobenes dicten Wein.

Es hett ein Edelmann auff
dem Gōw ein grosses hauß stehn/
vil knecht/vil mägdt/vnd nehret
sich zū zeiten des sattels von dē Franck
furtischen Kaufleuten. Wenn er aber
daheimen was / so gab er seinen knech
ten auß beschloßnen zinnen kântlein/
jeglichem

jeglichem sein besondere portz (doch genug/ das kein klag da war) zutrincen. Nun hett er einen alten/ kargen/neidigen / vngetrewen Hausschaffner / der was Lucio genant / der allzeit sahe/ das er dem gesind / es wer den reutern oder andern dienstvolck jr portz abbrache/ den seursten wein/ vnd das hertest brodt/ ihnen zugeben pflag / Aber er behielt ihm selbst die besten bißlin in seiner kamern. Die Reuter marcÿten den bossen/ wurden rathig/ wie sie jm thun wolten / das sie ihn bezalen möchten / auff das er ihnen auch mit der zeit ein keltz wasser holte. Nun hett Lucio der alt Marz ein art / wenn man aß / so zohe er von ein tisch zum andern / fragt / was sie für wein hetten/ ob er auch gut wer/ nam denn ein kântlein / trancÿs etwan halber auß/ also/ das darnach ein anderer manglen müßt. Das thet er nun offte vnd dick. Da was einer vnder den Reutern / hieß Peter von Halberstatt/ ein Sachs/ ein Judas kind/ dem nichts zuwil was / der sahe eins mals das er zwey kântlein vberkam / das ein bronzet er

E v voll

Die Garten

voll / das ander ließ er ihm voll weins
schencken. Das Kētlein mit dem wein
behielt er hinder sich / vnnnd das mit dem
brunz das stellt er für sich auff dē tisch /
als ob es das Kētlein mit dem wein we
re. Die knecht wußten den bossen / ließ
sen sich vnder einander hören / der Jun
cker hett sie ein mal selbs mit ein beson
deren trunck begabet / sie müßten lang
gewart haben / ehe in der alt Lucio ein
solchen trunck mitgetheilt hett. Der alt
hörts / gedacht ob ihm auch ein trunck
werden möcht / das er in versucht / kam
zū jnen / fragt / wie jnen der wein schme
cket / wolt nach dem Kētlin mit brunz
greiffen / das im zur fallen daher gestellt
wz. Aber der güt Peter von Halberstat
zuckt es im / sagt er solt ihm das Kētlein
stehen lassen / es were Cardobenedicten
wein darinnen / auch wer der wein nit
für in / dann er were bitter / der Juncker
hett sie selbs damit versorget / darumb
wolten sie in auch jnen selbst behalten.
Der güt Lucio erdacht einen andern
sün / sprach / man solt im den wein zūuer
suchen geben / wenn er ein mal in den
selben

selbē Keller kē/da die kreuterwein in we-
ren / wolt er jnen wider mittheilen. Sie
schlügens jm auch ab/ stellten doch das
vollgebrunzt kēntlin auff die wart. Er
erwünscht bald dz kēntlin vō tisch/ vnnd
sauffts in d eil gar schier gantz auß. So
bald hett ers nit getruncken/ er will zür
thür auß/ so stoffet ihm der wein auff/er
speyt den Saal voll/ vñ dem Juncfern
für sein tisch/ vermeynt nit anderst/ dan
der Cardobenedicten wein wolt jm das
hertz abstoßen. Jederman erschrack/ die
Reuter aber / als die solcher schalckheit
ursach warē/ vñ dessen wissens hetten/
lachten. Der Edelman fragt/ Was das
für ein handel wer? Die Reuter erzelten
den handel/ wie er jnen vñ dem anderen
gesind/ gewohnt wer zürhün / wenn sie
am tisch werē/ so wer jr wein nit frey/er
schmeichlet sich herzū / vñ trünck ihnen
denselben auß/ darūn hetten sie jm den
trunck gemacht vñ gebisst/ auch jn vber
redt/es were Cardobenedicten wein. Al
so hett er die bon funden. Der Edelman
was wol zūfriden/ fragt jn/ Wie jm der
Cardobenedictē wein geschmeckt hett?
Sagt

Die Garten

Sagt er: Es were jm nit anderst gewesen / dann er eytel klaren bruntz getruckten / vnd jm noch nit anderst. Der Edelmann sprach: Ein ander mal solt er jendem sein trinckgeschir zu friden / vnnnd sich mit dem seinen benügen lassen / dan dieser Cardobenedicten wein sey ihm zu starck / wenn er so vngedürlich dauon speisen wolt / vnnnd ihn darnach verachten / sagen / er schmeckt wie bruntz.

Von einem Arzet / der mit
sechs Pillulen einen verlornen
Esel wider fand.

Auff der Kirchweyhe zu Tring
im Breyßgaw / was ein Zambrescher / Triackermann / mit wurmsamen / pillulen / puluer fürs zanwehe / purgazen / Enzian / Reubarbaren / ic. vnnnd anderem vil geschmeiß / hat vnnnd für den gantzen tag ein groß vñ vbel geschrey vñ vnnütz geschwetz / wie danderer landbescheisser gebrauch vnd gewonheit ist. Sagt er hett etliche pillulen /

len / die weren für allen besten güt / die
einen vber 20. jar ankommen solten. Er
löst vil gelts / betrog das volck dapffer.
Wie also vil leut vmb ihn stunden / sein
geschweiz vñ liegen zühörten / so kompt
auch ein güter deyger Brüder / der seine



fünffsinn het biß auff sibben / dan er war
zwo hinder sich schuldig / der sagt: O lie-
ber meister / ich wolt euch bittē / ich hab
nün wol 14. tag ein Esel / so ein fromes /
hübsches thier verloren gehabt / hab in
lang gesucht / vñd kan ihn nicht wider
finden / ob ihr etwas hetten / das ihr mir
geben

Die Gärten

geben köndten / damit ich den armen
Esel wider vberkomme / ich wolts euch
wol bezalen. Der leutbescheisser sagt:
Ja freilich / lieber freunt / ich kan euch
wol helffen / da hab ich gute bewarte
Pillulen / die kommen von Arsenica / al-
ler hinderst in der Welt herfür / haben
Krafft die augen zu öffnen / die sinn zu
scherpffen / vnnnd wann ein ding verlo-
ren ist / so findet mans wider / deren Pil-
lulen müssen ihr hinnach zu abend sechs
schlucken / darauff zu nacht essen / vnnnd
ein gut maß starcks firmen Weins dar-
auff trincken / so nimpts den Pillulen
ihren geschmack / darnach nider legen /
das Beth voll schwitzen / morgens frü
auffstehen / vnnnd eweren Esel suchen /
so werdet ihr ihn ohne zweiffel finden.
Der gut Jockel ließ sich bereden / bezalt
ihm die sechs Pillulen / nam sie abends
ein / soffe den firmen Wein drauff / legte
sich nider / ward also schwach / dz er mey-
net die Esels Pillulen würden ihm den
garauß machen / ehe sie in die würckung
kemen. Darnach schwitzet er die vber-
gehenden nacht / das beth / die kammer /
vnd

vnd die küssen also voll / das die Frau
morgens genüg auß zu fegen vnd zu
waschen hette / (das was ein starcker
schweyß.) Wie schwach er danoch wa
re / so stund er morgens auff / vnd sucht
seinen Esel / wie ihm der kelberarzt ge
sagt hett. Wie er also auff einer grünen
wiesen ist / so kompt ihm das puttelwehe
vnd die vnuernunft im leib wider an /
also das er sich reuspern müßt / lauffet
bald hinder ein hecken / so sieht er on ge
ferde seinen lieben Esel daselbst wey
den gehen. Er behend zum Esel / sitzt
darauff / reytet gar frölich heim / vnd
sagt jederman von dises Arztes kunst /
der ihm also starcke pillulen geben / die
ihm die augen geöffnet / die sinn gescher
pfer haben / also dz er seinen lieben Esel
den er also lang gesucht / nit sehen kön
nen / biß auff denselben tag. Sie seyen
auch also bewert / das sie solche ver
lorne Esel wider finden vnd brin
gen können / die in vierzeh
tagen nie gesehen wor
den seind.

Die Garten

Es wolt einer tausent gul-
den geben/das man in in al-
ler Welt kandte.

In sehr reicher / aber stolzer
hoffertiger mensch / was zu Flo-
renz / der alles thet was in gelust
vnd im wol gefiel / kein schand noch la-
ster vbersahe er. Der sprach eins mals
zu einem seiner nahen verwandten vnd
freunden / er wolt Tausent gulden das
rumb geben / dz man ihn in der ganzen
Welt kandte. Darauff gab ihm derselb
sein freund zu antwort: Es were (sagt
er) besser / das du dich zwey tausent gul-
den nit dauren lieffest / vnnnd guten fleiß
ankertest / mit deiner weiß die du fürst /
das dich gar niemands kenne. Dann so
bald man dich kennen lernet / wirst du
vil mehr schand vnd laster / dann rühms
vnd lobs erholen vnnnd erjagen werden.
Es ist nit allzeit güt / das man einen zu
wol kennt / man kaufft ihn deker wenis-
ger. Ja warlich / dann es wolt auff ein
zeit einer das man ihn lernet kennen /
vnd

vnd von im vil zusagen wüste / der schiff
zu Bern im Schweizerlād in alle sprin-
gende brunnen / vnnnd beschiff die rören
dazü. Er ward begriffen vnd ertrencke /
bedorfft gar kein tausent guldē geben /
das man in kennen lernte.

Von einer tochter / die ihrer
Mutter in allweg nach-
schlug.

In Straubing im Beyerlandt /
gab ein Bader einem jungen gesel-
len seine tochter zu der Ehe / die wol-
te nicht schneiden / sie tratt täglich mit
dem hindern auß dem gestell. Wenn sie
dann der Mann niendert zu finden wu-
ste / so sucht er sie im Pfarthof / dann der
Pfariher hatte zween Junger starcker
Caplan / daselbst sandt er sie. Der gute
Mann kunds vnnnd mochts in die hant
nicht mehr leiden oder gedulden / kla-
gets seinem schweher / bath ihn / er solte
die tochter wider zu ihm nehmen / oder
er wolt sich von ir scheiden lassen / es we-
re jr

Die Garten

re ihr mißhandlung zu vil am tag vnn
offenbar/das er sich sein schämen muß
te/10. Der güt fromm schwerer tröstet
in mit gantz freundlichen worten: Lie
ber mein Son saget er zu ihm/ sey gutes
müts/ vbersehe noch zu diser zeit deiner
Frawen/ laß sie etwan ein zeitlang ih
rem gebrauch nach / güt Leben haben/
du findest doch eben dein theil noch vber
rig gnüg. Es wirdt aber die zeit kom
men / das sie sich dessen alles wider ab
thün / vnd zu weiblicher zucht vnn er
barkeit sich richten wirdt. Zu gleicher
weiß ire Mütter auch gethan hat/mei
ne liebe haußfraw/ welche / als sie noch
jung/ vnd in ihrem blüenden alter war/
da hat sie solche hendel alle vollbracht/
vnn hat mir auch nichts geschadet/
dann ich was lieb vnn werdt bey den
Edlen vnn der Priesterschaft gehal
ten/ allein darumb das ich vbersehē mo
chte / vnn hett ich dannoch genüg für
mich. Jetzund nün sie alt worden/ ist sie
vnder die frömmsten frawē gezelt die hie
sind/man thüt jr auch zucht vñ ehr an.
Dise hoffnung sollest du gewiß von deia

mer

ner frauen auch habē/so du noch etlich
jar gedultig bleibst/ dann griff schlechte
gern gramen nach.

Von zweyen bösen zänck-
echten weibern.

Zwo böser hadernieken / vnnnd
zänckischer Vetteln/warē zū Straß
burg im dommenloch daheim/ die
kamen auff ein zeit von wegen etlicher
wollen/ so eine der andern solt genom-
men haben/ aneinander/vnd breunten
einander auff den kernen auß. Die/ so
die Woll verloren/ saget zū der andern:
Du bist ein verlorne hür/ ein diebin das
zū/du hast mir mein woll gestoln. Spra-
che die ander: Du bist ein Diebin/ ein
landts hür/ ein pfaffen hür/ vnd ein
münchs hür/ du hast mer man gehabt/
dan die pfaffen in der fastē biß Ostern
miserere betten. Darauff die erst wider
sagt: Du bist ein solche miserere hür/ du
hast mehr Erztappen/ bloßbrüder/
kämmerfäger/ vnnnd bippaper gehabt/
dann die pfaffen zwischen Ostern vnd
S ij Pfingsten/

Die Garten

pfingsten/ Alleluia singen. Vnnd sichst
du es/ wenn du noch also ein grosse Hür
vnd Diebin werest/ so binn ich dannoch
eben als ehrlich/ vnd als güt als du bist.
Darumb so richt dich darnach/ du müst
mir die Woll bezalen/ oder ich will dich
an dem Stockgericht fürnemmen. Also
was vnd bleib eine eben als güt als die
ander / hetten alle beyd einander nichts
zū verweissen. Ich gedenc̃ der Richter
am Stockgericht habe die Woll selbs
bezalet.

Von ein der seiner gemein
gauch erhielt/ vnn̄d ihm der
wolff ein pferdt dar
über fraß.

Nicht weit von Zusingen/ ligt
ein Dorff/ das wirt Mündingen
genannt/ darinn waren vorzeit
ten gar güte/ fromme / einfeltige Leut/
(jetzunder sind sie baß abgerieben) des
ren Burger einer ritt auff eine zeit gen
Ehingen auff ein marckt/ vnd im heym
her

her reitten/sicht er im Mündiger bahn/
 ein frembden gauch auff einem Baum/
 mit irem gemeinen gauch ein scharmü-
 gel halten / dann sie vor ein gute weil
 von zweyen beumen/wider einander ge-
 guckt hetten. Wie aber der gut einfel-
 tig Baur vonn Mündigen sahe/das je-
 ner frembder Gauch dem Mündiger
 Gauch mit dem gucken vberlegē was/
 zu zeitē 15. oder 16. guck guck mer guckt
 dann jr gemeiner gauch zu Mündigen/
 warde der Baur zornig/ von seim pferd
 ab/stiege auff den baum zu seim gauch/
 vnd halff im gucken/also lang vnd viel/
 biß der frembde gauch weichen müste/
 vnd überwunden was. In der zeit die-
 weil Hans wurst von Mündigen / auff
 dem baum sitzt/vnnd dapffer mit ihrem
 gauch hilfft gucken. So kom̃t ein wolff
 vnnd frist ihme sein pferdt vnder dem
 baum/noch wolt er nicht herab/so lang
 vnd viel/ biß der frembd gauch gar ver-
 jaget was / Darumb müßt er darnach
 zu fuß heym gehen / So balde er heym
 kompt läßt er der Gemeine zusamment
 klopffen/erzelt ihnen / was er vonn we-

S iij gen des

Die Garten.

gen des gemeinen nutz für ehr vñ rüm/
mit deren von Justingen gauch began-
gen hett/nemlich/das er irem gemeinen
gauch / gegen deren vonn Justingen
gauch hilff vñnd beystand gethon. Her-
gegen aber/hab er nit ein kleinen scha-
den erlitten/dann dieweil er in dem grö-
sten ernst vñnd handel mit dem fremb-
den gauch gewesen / so seye jm sein gü-
ter graman von einem Wolff gefressen/
das wolte er ihnen also angezeigt ha-
ben./Ob sie/die gemein/jm zñ ein ande-
ren pferdt / wider zñ steuerer kommen
wolten. Da nñn der Schultheyß/ ge-
richt vñd gemeinde zñ Mündigen / ires
mitburgers rede vernommen/ haben sie
vñbillich geachtet/das einer der so fleis-
sig vñnd ernstlich der ganzen gemeinde
wolfart/ehr vñd freyheit bedencet/ des-
sen schaden leiden solt. Haben darauff
mit einhelliger stñ beschlossen / das jm
auff den gemeinen gefallen/ (dieweil er
sich der gemein halben / so streng vñnd
wol gehalten /) ein ander pferdt ge-
kauffet werden solle. Also ist derselbe
strenge Bawer hernach sehr hoch bey
ihnen

ihnen gehalten / vnnnd der gauchritter
genannt worden

Von einem der niemands
dann seines Vatters Narz
wolt sein.

In der Stadt Kenserßperg / was
ein Schülmeister / in den künsten
ein freyer / geschickter / gelehrter
Mann / In weiß / geberden / wörten /
vnd wercken aber grob / wüßt vnnnd vn-
flätig / also / das mann im Wüßt den na-
men gab / was sonst Paulus geheysen.
Dieser Paulus Wüßt / warde auff eine
zeit von wegen seiner Narrischen zoten
vnnnd bossen / die er morgens / abends
vnnnd alle zeit reissen thet / auch zu wei-
len sehr vnflätig was / vonn einem Für-
sten angeredt / er solt sein hofgesind vnd
diener werden / solte alle mal also gute
Narrische bossen zu tag bringen. Neyn
sprach Paulus Wüßt / Genediger Herz /
mein Vatter hat ihm selbs ein eigenen
Narren gemacht / will Ewer S. G.

S. iiii auch

Die Garten

auch einen haben/ so mache sie ihr selbs
auch einē eignen narren / wie er gethon
hat. Glaubte L. S. G. das es on schnauf-
fen sey zū gangen / da ich gemacht bin
worden / das würde ich nimmer mehr
glauben / dann jederman saget / ich sey
wol als ein grosser vnflat/ Ist damit ab-
gescheiden.

Von einem reichen Pfar-
hern / der sagt / man solte
Gott nicht zū viel
vertrauen.

DB Zwickaw im Land zū Meiss-
sen was eins mals ein Pfarhern /
ein fast geiziger/reicher Mann. Zū
dē ein Magister von Leipzig kam/ lag
bey ihm vber nacht. Der Pfarhern lud
dē Magistro gest zū gefallen/ Also vber
dem nacht imbis disputierten die zweē
mit einander/ vnd was das die disputa-
tion / Das geizigkeit vnd reichthumb/
ein grosse hindernuß des ewigen lebens
seye / wie dann Christus allwegen/die
reich-

reichtumb der Welt veracht vnnnd ver-
schmäht hat/jren allezeit hoch zu wider
gewesen. Dañ er sagt/ welcher wolt sein
Diener sein/ der solt alle ding verlassen/
vnd jm nachuolgen/2c. Dēnach aber vil
der gest dem Magistro zustimpten/ So
wirt der Pfarher bewegt/ sprechende:
Ja lieber Herz/jr sagt recht dauō/ Chri-
stus hat die Reichthumb güt zu ver-
schmehen vnnnd zu verachten gehabt/er
hat ihr nicht bedörfft/ hett er aber auch
alle ding dermassen müssen kauffen/ als
ich alle tag thün müß /er hette gewiß-
lich diese wort nicht geredet. Der Ma-
gister antwortet vnnnd saget: Man soll
Gott wol vertrauen/ vnnnd alle steiffe
hoffnung in ihn haben/ wie die heiligen
Apostel vnd Martirer gethon / so wür-
de er niemands verlassen / die er auch
allen Menschen thut so ihn anruffen /
vnnnd jr vertrauen in in setzen. Ja frey-
lich / sagt der Pfarher/ ich bin mit sol-
chem wol vertrauen oft vnnnd dick be-
trogen worden/ also / das ich mich viel-
malen nicht gewußt habe des bitteren
hungers zu erwerben/ biß ich mich dahin

S v schickt/

Die Garten

schickt/das ich für mich selbs zins/gült/
acker/matten/hauß/hof/ vnd ein zimli-
liche narung von barē gelt gehabt/vnd
zūwegen bracht habe. Des güten vera-
trawens halben/dauon ihr Heri Magis-
ter reden/were ich zehen mal hungers
gestorben. Darum sagt er weiter/so soll
gar niemands mit einem rath / Gott zū
viel vertrauen / ich wils auch selbs nit
thūn / dann er hat deßhalben manchen
bedürgt. Ob er schon gleich zū zeiten ein-
auß nöten (der jm so wol vertraut) hilf-
fet / so kompt er doch also spat darmit/
das ein zeit vnd weil zūlang wirt/brin-
gets ein eben zū lieb / es schlugs einer
senffter auß einem herten Eißlingstein.
Derhalben vertrau jm wer da wöll/ ich
bin gewiziget worden/vnd vertrau jm
so vil als ich mag. Damit hat die dispu-
tation ein ende genommen / vnnnd wolt
der pfarrheri Gott nit zū viel vertrau-
en/warnet auch andere leut dauor.

Von einem Langknecht der
einem alten Mönch beicht.

Zū Cölln

Bey Kölln beicht ein Lantz knecht/
 bey Keyser Maximiliani zeitten /
 einem gar Alten Barfüßer Mönch/
 vñnd bekant vnder anderem / er were
 mit einer Tunnen zu acker gefaren.
 Der güt Herz erschrack dessen vbel/mei-
 net nicht anders / dann es were ein vers-
 schnittene Mor oder Schwein / warde
 entrüst / redet dem Lantz knecht vbel / er
 were ein Käzer / er wolt vñnd köndt ihn
 nicht absoluieren. Herz saget der Lantz-
 knecht / jr irret euch / es ist kein thier / es
 ist ein Christē Mensch vñd ein Kloster-
 frau gewesen / etwan auff 22. Jar alt/
 in meinem heymat nennet man sie nicht
 anders dan Tunnen. Bald das der güt
 alt Herz hört / sagt er in Latein: Fortia-
 ter in eam / vñd hüb an hertzlich zu wey-
 nen. Der Lantz knecht sagt: Herz war-
 um weynt jr / last mich klage / ich bin der
 so dz gethon hat / vñ ist dazü vilmaln be-
 schehen? Zy sagt der güt Alt Vatter / so
 es ein weib ist gewesen / so ist es recht / vñd
 nit vbel gehandelt. Ich aber muß kla-
 ge / erbarm mich auch selber dz ich so gar
 nichts nutz darzu bin / es hat mir nün
 mehr

Die Garten

mehr dann 30. Jar gefehlet / darumb
wollen sie mich zu keinē Confessor mehr
haben. Also hat der güt Alte Herz den
Lanzknecht absoluiert vñnd ziehen
lassen.

Von einem Bauren/

der ein schwein wolte
mesten.

Ein armer bawer wonet bey
Villingē auff dē Schwarzwald/
der was nicht gar durch einhin
wizig. Dieser Bawer überkam einmal
ein junge saw / die er mit arbeitē gewun
nen hatte / die wolte er mesten / gabe ihr
doch ein tag nit mehr dann zweymal /
vñnd dannoch nicht viel zu essen / dann
er hett leyder nit vil. Die saw wolte nit
feyßt werden / oder zulegen / sonder war
de je lenger je mägerer / vñ ellender. Der
Bawer warde vnlustig vber die saw /
Elagets seinem nachbawern der neben
im auffeim hof saß. Der nachbawer sahe
die saw / sagt / er müßt ihr ander essen /
auch

auch besser vnnnd öffter im tag geben/oder er würde sein lebtage kein feiste saw darauff erziehen mögen. Das ist mir / sprach der Bawer / nit gelegen / das ich ihr anders dann wie bißher / oder mehr dan zweymal im tag zu essen geben wil. Ich bin ein mensch / thû ein ganzen tage grosse arbeit / vnnnd is nicht mehr als zweymal im tage. Die saw aber / thût nichts dann fressen vnd schlaaffen / ist auch zweymal im tag darzu. Vnnnd ich solt ihr noch mehr vnnnd öffter zu essen gebē? Ich merck wol / ich solt oder müst sie müßig gehn laß halten / das sie nûr zu fressen vnd zu schlaaffen hette / dann mich selbs / vnd bin ich ein mensch / vnd das ein vnuernünfftig viehe / dessen bin ich noch vnbedacht. Inn einem solchen grimmen erwüsch der Bawer ein art / vnd schlug die saw an kopff / vnnnd fraß sie also dürr vnd mager.

Von einem Stationierer
mit S. Sebastians brü
derschafft.
Von

Die Garten

IN wegen S. Sebastians
Brüderschaft zohe ein mal ein
Questionierer von Worms den
Rein ab in alle flecken vnnnd dörffer/ da
geilt vnd stationiert er nach seinem be-
sten vermögen. Demnach ist er gen Op-
penheim komen daselbs hüb er vil gelts
auff/ dan er thet ein lang predig vñ stri-
che S. Sebastia sehr wol herauß. Nach
essens fraget in ein Geistlicher Herz gar
freundlich/ dē sein predigen so wol gefal-
lē hett/ woz doch sein jar besoldung wer/
mit der Quest also vmb zū ziehen? Der
Questionierer antwort: Die brüder-
schaft zū Worms geb jm 20. gulden zū
lohn/ sampt essen vnd trincken/ vnd das
pferd. Sagt der güt Herz: Es nē vil reit-
tens/ predigens/ vnd mancher hand her-
bergē durch dz jar / es wer vil zū wenig/
er wüß sich nit mit einē sochen schlech-
ten lon/ zū betragen. Darauff sprach der
Questionierer: Wolā lieber Herz es sind
mancherhand begangen schafften auff
erdtrich/ es müß sich mancher auch wū-
derbarlich erneren/ ich behilff mich also
mit den 20. gulden/ vnd woz ich mir selbs
dazū

dazü behalt/ abtrag vnd stil/dz ist auch
mein. Es ist warlich ein gütiger freund
licher heilig S. Sebastian/so offte ich im
jarmit im rechne / vnd zwischen beyden
vns abteile/ ich stel oder neme von seinẽ
teil als vil ich wöll / so nimpt er für güt/
vñ schweigt. Kündt ich mit dẽ pflegern
der brüderschafft zů Wormbs / als wol
als mit ihm naher komen/ich wölte kein
Goldschmit dafür sein. Doch aber ver-
giss ich mein auch nicht gar/ıc. Ich ge-
denck alle Questionierer haben den sin/
wil doch niemand im verdacht haben.

Ein Pfaff zeret zu abend/
vñnd schiffe hinder den
Ofen.

Wen tag vor Wenhenachten
kam zů strassburg/ein grober/toller
Pfaff / genannt Pfaff Holch / zůr
Lungen/ins Würtshauß/wolt ein halb
mäßlin weins trincken/ vnd sich werm-
en (dan er hielt nit selber hauß.) Er zech-
te allgemach/so nimt der würt ein haß/
vnd

Die Garten

vnd brunzt ihn hinder dem offen in der stuben vor dem pfaffen gar voll / vnnnd stellt in bey dē pfaffen vnder die bank / das der rauch fein vbersich dem pfaffen in die nasen gieng. Der pfaff fragt / Was der vnlust bedeuete? Der Wirt sagt: Er wölt ein leze hinder ihm lassen / er müß auff den morgendē tag außziehen / er würde in die Wangenaw kommen / vnd da wirtschafft halten. Pfaff Holch schweig / gedachte / ich will dich mit gleicher Münz bezalen. So bald der Wirt auß der stuben kompt / so hofiert der pfaff am aller warmesten hinder den ofen / da der Wirt in den hasen gebrunzt hett / setzet sich wider nider / nam sich nichts an. In dem kompt der Wirt wider inn die stub gegangen / schmacket den braten hinder dem ofen / (dann es stancke sehr bitterlich vbel in der stuben.) Er was schellig vber den pfaffen / fraget / warumb er ihm inn die stuben geschissen hett / vnd dazu hinder den ofen an das aller wermist orth / ein solchen gestanc gemacht? Der pfaff sagt: Darumb das du morgen wilt weichen /

chen/so hastu dein hafen hinder dem Ofen voll gebrunzt/ vnnnd mir für die naß gestellt / das ich ihn schmecken sol. Darumb aber das ich nicht wil mit meinem weichen warten biß morgen/sonder wil jezunder weichen/ so hab ich gar hinder den Ofen gehosiert/ schmeckt er dir nit/ so trag ihn herauß/ vnnnd zeuch darnach auß/ wenn du wilt / hiemit gieng Pfaff Holch seine straass (es hette ihm gleich goltten/ob er sich mit dem Würt hett sol len hauten oder nicht/) vnnnd ließ den dreck hinder dem Ofen am warmen liegen. Das ist korn vmb saltz geben.

Ein vngelerter Pfaff/ gab

den Bawren ein Bein von

einem todten Esel für

heilthumb zu küssen

für die pestia

leng.

In Bückburger Bistumb
 saß ein vngelchrter verweneter
 Pfaff/auff dem Odenwald/bey
 G Hala

Die Garten

Halbrunn auff einem Dorff / der hette
ein gar kleins pfründlin / daraußer sich
mit seiner Schwester basen / nicht wol er
neren mocht. Er was auch so gelehrt o=
der geschickt / das man jm kein andere
pfarr vertrauen dorfft / müßte sich das
mit benügen lassen (wolte er nicht gar
betteleu gehn.) Eben in der selben zeit
da kam ein grosser sterben in das Dorff.
Das güt einfältig Pecus / oder Dorff=
pfarr / nam ein bein von einē geschundē
alten Esel / ließ es jm in ein Monstranz
fassen vnd verglasen / fürte das mit ihm
in die Dörffer vnd Flecken herumher /
prediget es wer ein Heilthumb von S.
Rochus / vnnnd welches Mensch das
Heilthumb küste / das were dasselbige
jar der Pestilenz frey / ob es sie schon v=
berkam / so stürbe es doch nicht daran.
Mit solchem liegen / betriegen vnd bes=
scheisserey / derselbige pfarr inn kurtzer
zeit von den einfeltigen bawren gar vil
gelts zusamen bracht / vnnnd gesamlet
hat. Zulezt ward die sach dem Offici=
al fürgebracht / der beschicket in / strafft
vnnnd warnet ihn / zeigt ihm an / das
solche

solche vnd dergleichen ding abgöttisch
 weren / fürten das einfeltige volck inn
 ein falschen glauben / derhalben solte er
 von dem schändlichen wesen abstehen /
 oder er / der Official / würde diese hand-
 lung für den Bischoff vonn Würzburg
 selbs bringen müssen. Der Pfarherr
 was vnerschrocken / gab Kurtz antwort /
 sprach: Ich hab den Bawren recht ge-
 sagt / welcher das Heilthumb küsse / der
 sey diß Jar vor der Pestilentz sicher. Es
 haben auch die Bawren nür das glaß
 gelectet vnnnd geküßet / vnnnd nicht das
 Heilthumb / Ich wolte sie ehe alle den
 Teuffel züm newen Jar schencken / ehe
 ich sie mir mein Heilthumb liesse küssen.
 Wenn sie mich im hindern vierteil küs-
 sen wolten / ich wolt ihnen nicht heben.
 Aber euch Her: Official will ich folgen /
 ich hab sie auff das mal genüg beschis-
 sen / gieng wider heym / schütt das Heils-
 thumb vonn dem alten geschun-
 denen Esel wider auß / hett sich
 bey dem Ablass wol ge-
 wermet.

Die Garten
Von einem Bawren/
der seinen Pfarhern
vber studiert.

EIN grosser Spenvogel wo-
net im Westerreich zu Sarbruck-
en/ der saget eins mals / zu dem
Pfarhern oder Kirchhern daselbst: Er
hette einen Esel daheym/ der wer witz-
iger dann er der Pfarhern. Item/ Gott
der Herr thet alles das ihenige / das er
(der burger) wolte. So hette er auch
das Himelreich bey ihm in seinem hauss
daheym. Da der Kirchhern diese reden
hört / ward er erzürnt vber den burger/
sprach / er were ein Ketzer / vnnd ein ab-
trünniger abglauben / vermeynet auch/
es were ein grosse verletzung seiner Eh-
ren / das er ein Esel ein vnuernünfftig
thier / weiser vnnd verstendiger sagte/
dann ein Mensch / nemlich ihn / so sein
Pfarhern were / verklaget ihn also vor
des Grafen von Nassaws rächen. Der
burger ward für gefordert. Der Pfar-
hern klaget in an/ dieser solt antworten.

Kurz

Kurtz bedacht/ saget er: Die drey stück/
 gnedigen Herrn/ so ich gesaget / die sind
 waar/ darüber solt ihr vrtheil sprechen.
 Ist im nicht also/ lieben Herrn? Ich hab
 daheym in meinem hauß/ Vatter vnnd
 Mütter/ die erziehe vnnd erhalte ich /
 dann sie sind beyde blinde/ hören auch
 nicht wol. Nun bin ich je ihr Son/ dar-
 umb sage ich billich / nach der heiligen
 geschriffte/ das ich das Himmelreich in
 meinem hauß hab/ dann thete ichs nit/
 so hett ich die Hell vnd den Teufel dar-
 umb/ vnnd thet dazu wider das gebott
 GOTTes. Am andern das ich gesaget
 hab / das Gott alles das thut/ das ich
 will/ hoff ich wol geredt haben. Ich bet-
 te ihu im Vatter vnser/ sein will sol auff
 Erden wie in den Himmeln beschehen/
 darbey laß ichs bleiben / vnnd alles das
 erschafft vnnd thut/ das will ich/ vnnd
 soll es auch wollen / es dunckt mich da-
 zu alle zeit das aller beste sein. Den drit-
 ten puncten / der vnsern Pfarrer in so
 hoch bemühet/ vermeynet damit seiner
 ehren verlegt zu sein / den hab ich gered-
 et/ aber gar keins wegs zum nachtheil
 G iij seiner

Die Garten

seiner Priesterlichen würd / nicht seines
lobs geschicklichkeit oder ehren / dan wie
ich geredet hab / mein Esel sey witziger
dan vnser Pfarher / ist war. Wenn ich
meinen Esel vber die trencke füre oder
treib / so trinckt er nit mer / dann eben so
vil in düst / zeucht wider heym / darüber
ließ er sich ehe todtschlagen / ehe er ein
trück mehr thet. Vnser Pfarher aber /
wirdt zu zeiten also truncken / das er nit
gehn kan / er weysß auch sein eigen hauß
nit / etwan muß man ihn heym führen /
zu zeiten muß man in gar heym tragen /
vnd in sonderheit wen er bey L. G. meis
nen G. Herrn zu zeiten ist / desselben wer
den mir L. G. gute zeugen sein. Darum
beger vnd bitte ich seiner klag ledig er
kannt zu werden / ich hab im besten ge
redet / vnd niemands zum nachtheil sei
nes lobs / rhüms vnd ehren gethon. Dis
ser reden lachten die Râth / erkannten /
der Burger hette sich wol verantwort /
vertrügen die sach gütlich vnd freunds
lich mit Wein / ward also der Pfarher
vnd Burger vertragen / vnd bleib jeder /
der er vor auch war.

Von

Von eines Bawren Son
der auff die Fastnacht
zum Wein was
gegangen.

D Riedlingen was ein junger
starcker gesell/ eins bawren son/ der
sein lebtag nit vil weins getrunckē
hett/ der gieng auff die Fastnacht mit
andern jungen gesellen zum Wein. Die
weil er aber des Weins nicht gewonet/
ward er bald truncken/ also/ dz er ganz
vnd gar auff Welsch angethon warde/
das er weder kopff/ hend noch fuß regen
oder heben kondte oder mochte. Da na-
men ihn seine gesellen / vnd trügen in in
seiner Mütter hauß. Wie sie in also da-
her bringen / vnd er die Mütter ersicht/
spricht er: Schaw liebe Mütter/ wie ich
also wol begleitet daher fahr. O liebe
Mütter/ danck denē allensampt/ das sie
mich also herlich daher tragen/ ein sol-
che ehr ist mir all mein lebtag nie beschi-
nen/ ich wils mehr mit in versuchen. Die
mütter was leydig/ dz jr son also trunckē
G iij was

Die Garten

was/dancket denen/das sie in gebracht
hatten / damit jm nichts beschehen we-
re. Also zogen sie wider in das Würtze-
haus / vnnnd richtten die handlung vol-
lends auß / gienge ihnen hernach / wie
es diesem vor gangen was.

Ein Bawer hett groß leyd
vmb sein Weib vnnnd Kind /
die ihm gestorben
waren.

ZN Den am Pilatus berg bey
Luzern im Schweizerland / hie
ihenseit des lucerners See/ da li-
get ein Dorff das heysst Zorb / da saß
ein Bawer jnnen / der die Leuthe vber
See gen Vnderwalden zur alten Stadt
fürte/sich auch darmit ernehrte. Eins-
mals kam ein schwerer sterben inn das
land. Der Bawer hatte fünff Kinder/
vnnnd ein schöne haußfraw/die ihm sehr
lieb was. Sie lebten auch freuntlich/
friedlich vnd wol mit einander. Die Kin-
der wurden jm krank / starben jm alle/
die

die Frau bekümmert sich so fast vmb
die Kinder/das sie auch krank ward/vn-
ber drey tag warde sie auch Todt. Der
güt fromm Mann ward gar leidig/ließ
sie begraben gieng gen Luzern wachse
zu kauffen/dem Weib vnnnd Kinderen



ihre Gottesrecht zu thun. Zu Luzern
begegnet ihm einer seiner guten freund
auff der Rüssbrucken/der klagt/erma-
net vnnnd tröstet ihn/das er sein hertz zu
rüwen setze solt/dieweil es Gott der All-
mächtig je also geschickt hett/so köndte
ers doch nicht anders machen. Der güt

G v betrübt

Die Garten

betrübt Mann bedachte sich ein weil /
sagte darnach mit betrübtem hertzen:
Ich muß wol die sache lassen güt sein/
dann ich weyß oder kans nicht anderst
machen. Aber ich hab alle meine tag ge-
hört/ alles das so einē in sonderheit lieb
ist/ das füre der Teuffel an dem aller er-
sten hinweg. Vnnd gieng damit seine
straß also leydig.

Mit vnserm HERRgott
kriegt ein Bawer vmb des
Wetters willen/das er
nit hâw machen
kondt.

In dem Dorff Stankz zu Bins-
derwalden/ da wolte ein Bawer
im Hâwmonat auff ein Sonn-
scheinenden tag sein hâw trocken mach-
en / vnnd in den stadel thûn/er hatt gar
viel mâyen lassen. Da fieng das wetter
vnd der Himmel an duncfel zû sein/ das
zû besorgen es würde regenen werden.
Vber zween Tag erzeiget sich das wets-
ter aber

ter aber schön. Der Bawer außhin/dör-
ret es/machts zů hauffen/wils am drit-
ten tag einfüren / so facht es an zů reg-
nen. Es warde dē Bawern verdriessen/
das er mit dē hāw nit einkomen mocht/
sonder abstehen müßt/sprach: Ja lieber
Herigott ich bitt dich/ wollest dich hal-
ten/das dir niemandt holdt sey / wie du
dich auch warlich jertzunder diße wochen
lang genüg angelassen hast. Wiltu nit
anderst wittern/so will ich das hāw all-
sammen in die kůfud einhin / verderben
vnnnd ligen lassen / auch kein hand mehr
dran legen/ Gott geb es werd faul oder
nit. Der güt Mañ vermeynt/ Gott solt
alleinig auff sein hāw achtung gehabt
haben/damit es einkomen wer. Solchs
ist alles noch in den alten zeiten bey den
einfeltigen Schweizern beschehen/jer-
tzunder sind sie aber mehr gescheider
worden.

Ein bawer flagt dem ande-
ren von seines Vatters todt vnd
absterbens wegen.

Die Garten

D B Sachssen inn dem Dorff /
 auch zu Vnderwalden im Schweiz
 zerlandt / da der selig brüder Clausß
 hauß gehalten / auch daselbst inn der
 Kirchen begraben ligt / da starbe einem
 burger sein vatter / zu demselben kompt



einer von Sarnen (wie sie dann Nach-
 bawren vnd eins Lands sind) der was
 sein Vetter / vnnd hieß Erny / der sagte
 zu dem anderen: Vetter Vly / Gott geb
 dir ein güten Tag. Vly sagt: Dancß dir
 Gott lieber Vetter Erny. Darauff Er-
 ny sagt:

ny sagt: Vetter Vly / es ist mir trewlich
leyd / dz dein Ertz zu Gott ist gefaren.
Danck dir Gott / sagt Vly wider / Wöl-
le Gott das weder du noch alle die dei-
nen nimmer zu Gott kommen. Dar auff
Erny saget: Wilt du aber dein Ertz
nicht nach thun? Vly sagt / Nein. War-
um? fragt Erny. Vly gab zu antwort/
Ich wil dir sagen / ist er im Himmel / so
darff er sein nichts / ist er in der Hellen/
so hilffte es in nit / ist er in dem fegfeuer/
so wil ich ihn fegen lassen / er muß gleis-
sen wie ein Eisenhut / so kompt er dester
baß geburt für vnseren Heri Gott. Als
so schieden sie beyd von einander / vnnd
begeret ihr keiner zu Gott / Vnnd wolt
Vly sein Vatter dapffer ballieren vnd
fegen lassen / das er hübsch were / wenn
er zu Gott keme.

Von einer jungen Fray-
en / wie sie einem Alten

Mann ein ant-
wort gab.

Ein

Die Garten

In alter Schmidt was inn
dem Kloster Zwifalten / im Wir-
tenberger land / der gieng auff ein
Kirchweyhe. Auff dem wege kame er zu
einer jungen frawen / die was hübsch /
freundlich vnd wolgestalt / sonst kondt



sie einem die haab wol an schlagen. Der
güt alte geck greiffst sie fein freundlich
an / betast ihr die brüstklein / den bauch /
vnd hindern bey dem küssin / vnnnd sagt:
O liebes frewlin da ligen noch vil star-
cker kämpff verborgen / die all gehalten
müssen

müssen sein. Das frewlin gab ihm ant-
wort/vnnd sagt: Ja lieber freunde/ ich
glaubs/ es müßt oder möcht also besche-
hē/ jr mögt aber wol dīses reñplatz oder
thurnir felds müßig stehn/dann jr wer-
det kein Ritter da werden/auch auff dē
stechplatz kein Ritterliche gab oder ehr
erholen. Der gūt alt etty nam dē wadel
zwischen die bein wie ein hund/zohe wi-
derumb heym / was wol content / hette
seine sieben pfennig geholet / die waren
im also bar worden.

Warumb der Edelleut kin-
der so heßlich/ vnd der Kauff-
leut vnd burgers kinder
so hübsch sind.

In Herbst zeit in der Franckfor-
ter Meß / ritten etliche Kauffleuth
mit dem geleit / wolten in die Meß
gē Franckfort. Wie sie nū in die herberg
kamen/auff den morgen imbiß zū Tisch
gesessen waren / da trieben sie vieler
handt schimpffreden vnder einander.
Aber vnder anderem saget ein Edel-
mann

Die Garten

mann zu einem Kauffmann / Es solte
inen billich schwer anligen / wenn sie al
so weit reysen theten / vnd die weiber in
den stedten hinder inen müsten lassen /
Ob sie nicht sorgeten / das vil hüpscher
junger Edelleut vnnnd sonst gesellen da
werenn / da jeder seiner schantz lüget /
vnnnd die güten fräwlein etwan vonn
des langen außbleibens wegen / blöd
vnd beredt würden / vnd neben den weg
treten möchten. Des selbigen aber wa
ren sie die Edlen überhaben / dann ire
frauen sassen auff den hohen bergen
vnd Schössern / von dē leuten abgesun
dert / also daß die Mennner dessen alles
nit besorgen dörfften. Darauff sagte ein
Kauffman: Es ist vester Juncfer / wol
geredt / vnd dörfft sich dennoch zu ze
iten also zutrugen. Wolt jr mir aber ver
zeihen / so wolt ich hiezü auch etwas sa
gen / doch niemand verleglich? Ja / spra
che der Edelmann / sagt her / es ist doch
alles inn scherz geredet. Da sagte der
Kauffmann: Es ist ein sprichwort / das
die Edelleuth heßliche kinder / vnd die
Burger in den stedten hübsche / schöne
kinder

Kinder haben/ was mag die vrsach sein?
 Der Edelmann saget: Er möchte wol
 hören. Darauß der Kauffmann geredt:
 Ich achte bey mir / das diß die vrsach
 sey/ nemlich wenn wir Kauffleuth also
 weit in die land reisen/ so kommen dann
 ihr Juncfherin / die jungen glatten ge-
 sellen/ machen kundtschafft mit vnsern
 Weibern/ biß letztlich ein ernst/ vnd ein
 vnbillich ropffen darauß wirt/ als denn
 so werden inn solcher freundelicheit die
 allerhübschten Kindlein geborn/ das es
 ein ein freude gibt / sie sind auch Adel-
 lich / gehorsam/ züchtig vnnnd gelernig.
 Also ziehen wir sie für vnserre Kinder
 auff/ vnd machen demnach auß densel-
 ben Kindern auch Kauffleut / wie wir
 sind. So ihr Juncfherin aber nicht an-
 heymisch seit/ vnnnd den Grawen die zeit
 zu lang will werden / so müssen sie sich
 mit den stallknechten/ köchen vnnnd kel-
 lern behelffen / da werden dann grobe
 vnnnd heßliche kinder darauß/ die ziehen
 die Juncfherin dann für die ihren / vnd
 werden demnach Edelleut. Es ist auch
 nicht eine kleine vrsach / das die Edels-
 leuth

Die Garten

leuth der Kauffleut gelt so gern haben/
dann sie meynen es sey billich / das die
Kinder iren Vättern jeder zeit behülfflich
sein/vnd zu stewart kommen sollend. So
sie dann so vnuerstanden sind / vnnnd ih-
nen nichts geben wollen / so schüttlen
sie ihnen die täschen / vnd schlagen inen
die bälge voll / welches ich gantzlich wi-
derrath. Darum lieben Juncfherin/ sol-
ten ihr euch hierinn bass bedencfen/vnd
die Kauffleut nicht also antasten / das
ir nicht zu zeiten etwan eweren eigenen
Kindern / schmachet vnd schaden zufü-
gen möchten. Mit diesem name das
satzwerck ein end/vnnnd liessen einander
fürhin zufrieden.

Ein Langknecht theilt mit einem Münch.

In Gölcher Land zohe ein ar-
mer Langknecht daher vber das
feld / vnd hette nicht vberänzige
Kleider an/ dem begegnet ein alter Bar-
füßer Münch/ der trug viel thüchs/ im
vnd

vnd seinen brüderu zů kутten vnd sonst
 kleidern. Der Langknecht sprach ihm
 an/ vnd saget: Herz/ theilen wir nicht
 mit einander/ jr brauchen das thůch nit
 alles sammen/so habt ihr auch noch ein
 gute feyßte kутten an/ Ich aber bin na-
 ckend vnd bloß? Darumb ist hie kein an-
 ders/ wir müssen das thůch mit einan-
 der theilen. Der Můnch saget: Lieber
 gesell zeuch du dein straas/ ich bin eine
 geistliche Person / vnd laß mich zu frie-
 den / ich gib dir nichts. Wie Můnch /
 spricht der Langknecht / woltestu ein
 geistlich Mann sein / vnd woltest dem
 nackenden nit kleiden / vnd hast so vil
 vberiges thůchs? woltestu dich den teu-
 fel also verführen lassen/ das du den be-
 felch Gottes vbertretten soltest/ den na-
 ckendē kleiden? Da sey Got vor/ Du solt
 meiner halben nicht zum Teuffel faren.
 In dem erwůschet er das thůch/ vnd sa-
 get zů dem Můnch: Ich bedarff nit mer
 dan drey ellen/ das vbrig behalt du. Der
 Můnch kůnd ihm nit widerstehen. Der
 langknecht nam dz thůch/ thets vō ein-
 ander vnd maas mit seinē halben spieß
 6 ff drey

Die Garten

drey ellen daruon / es were zu Franc-
fort wol 16. ellen gewesen / wicklet das
zusammen / zeucht mit daruon. Der
Münch was trawrig / raspet das ander
thüch auch zusammen / schreyt im nach
vnd sprach: Du verlossener Büb / du
mußest mir das thüch am Jüngsten Tag
bezalen / vnd Gott dem Allmechtigen
antwort darumb geben / des soltu dich
zu mir versehen. Der Landsknecht wen-
det sich vmb / vnd geht zu dem Münch /
vnd saget: So du mir also ein lang ge-
raumt ziel zu der bezalung / biß an den
Jüngsten Tage setzest / so will ich eben
das vberige thüch darzu nehmen / es
kompt doch alles in eine rechnung / ver-
antwortung vñ bezalung. Vnd Münch
zeichne du es daheym vleissig auff / ich
möchte leiden / ich hett das Kloster mit
einander auff diese zilsatzung. Also nam
er ihm das ander thüch auch / vnd zoge
dauon / ließ dem Münch das nach sehen.

Ein Venerischer Pfaff pre-
diget seinen Bauern.

D Osterhofen im Beyerlād/da
 war ein gar armer vngelerter pfaff/
 seine narung ward jm sawer zū be-
 kommen. Auff ein zeit wolt er predigē/klā-
 get sein not/ward ganz vnd gar vnlu-
 stig/sagt: Lieben kinder Christi/ich sol-
 te enck das wort Gottes verkünden/so
 seit es schändtlich böß bawren/es wölt
 nichts beten/nichts fasten/nichts opf-
 fern auffn Altar/vnd nichts durch Got-
 tes wiln geben/Item war/ vber nacht
 so stirb ich / vnd fahr von mund auff zū
 dem Allmechtigen/ ewigen Gott. So
 spricht er zū mir: Seit mirs Gottwill-
 them Herz Hans. So zeuch ich mein
 baretlin ab/ vnd sprich: Gnad Herz. Als
 dann sagt der Allmechtig ewig Gott:
 Sihe mein herz Hans/wo habt es enck-
 her schäffl/die es geweydet habn auffm
 Erdrich herunden? Lieber herz Hans/
 wo sind enckher arme leut? Sihe mein/
 so steh ich vor dem Allmechtigen ewign
 Gott/ als were mir inn dhend gschisn/
 der Teuffel hat sie all hinder ruck's mir
 hinweg. Darumb will ich enck endlich
 sagn / wenn es kein ander weiß wölte
 H iij habn/

Die Garten

habn/ so sey der Teuffel enckher Seelsorger vnd pfarher/ vnnnd wil hiemit vrslaub genommen habn. Also zohe er von der pfründ / vnd kam gen sitzhofen/ da ist er noch.

Wo der langknecht wohnung sein werd/ wenn sie gessterben.

AUS der grossen schlacht zu Meyland oder Marianē/ wolten die erschlagenen langknecht auff der wallstadt bey den Schweizern nit ligen bleiben/ vnd wurden rāthig/ richteten ein fenlein auff/ das was weiß/ mit einem roten Creutz / zohen inn der ordnung all der Zellen zu. Als aber die teuffel das fenlin vnd das rot Creutz darinn ersahen/ erschracken sie hart (dan durch das zeichen ist ihnen vormals die HELL/ vnd sie dazu bestritten worden) verriegelten/ verbolwerckten/ versperiten vnd besetzten die thor/ die wehren/ die pforten vnnnd mauren an allen orten/ vnnnd stellten

stellten sich zur wehr. Wie aber die lang-
 knecht daher ziehen/ so schiessen die teuf-
 sel/ vnd werffen zu ihnen/ sagen: O liebe
 Männer ziehet auff die recht hand dem
 himel zu/ wir gebn euch kein herberg/ las-
 sen euch auch nit ein. Vnd haben damit
 die langknecht den weg gegē dem himel
 zu gewisen. Die gūten fromen langkne-
 chte zohen mit ihrem regiment vnd fen-
 lin/inn gūter gehabter ordnung für den
 himel/ begerten man solte sie einlassen.
 Petrus fragt wer sie wern? Sie sagten/
 sie weren fromme langknecht/ vnd inn
 der schlacht vor Meyland umbkomen/
 begerten einglassen zu werden. Wer hat
 euch (sagt Petrus) hieher kommen heis-
 sen? Ziehet fort/ nūr fort/ ihr blützapf-
 fen/ dann darumb das ihr in ewerem le-
 ben alle zeit den frieden gehasset habt/
 so ist es nicht billich das ihr die Ewige
 rüh besitzten sollen. Auff solches saget
 ihr Hauptmann/ wo bleiben wir aber
 hindenach/ Inn der hellen versperret
 man vnns thür vnd thor/ im himmel
 wil man vns nicht ein lassen/ nūn müs-
 sen wir dennoch auch ein orth haben/
 3 iij da wir

Die Garten

da wir wissen zu bleiben? Ir habet mich!
(saget Petrus) wol verstanden/ tröllt
 euch fort/ oder ihr werdet bald etwas
 neues vernemen/ ihr seit nichts dann
 Blüthund/ Gottes lesterer/ arme leuth
 macher/ verflüchte/ verzweifelte/ vnd
 Gottlos leut. Da ward jr Hauptmann
 erzürnet/ vnd saget inn ein grimmen
 zu Petro: Was verweyßt der wolff dem
 Fuchß/ vonn wegen des raubs/ sind sie
 nicht beyde rauber? Weist du nit was
 du gethon hast? deinen Herren/ Meister
 vnd deinen Gott/ hast du felschlich vnd
 meineydiglich zum dritten mal verleng
 net vnd verschworen/ das hat vnser
 keiner noch gethon/ solches will ich vor
 allem Himmelschen Heer reden/ das du
 erger/meineydiger/trewloser vnd böser
 gewesen bist/weder vnser keiner ist/vnd
 wilt vns schenden vnd schmehen/vnd
 darzu nicht einlassen. Tün müssen wir
 ihe dannoch wissen/wo wir hin sollen.
 Petrus was schamrot worden/ vnd for
 chte vbel (Dieweil der Hauptmann so
 laut schrey) das es die andern im Himm
 hörē würden/vnd saget zu jnen: Lieben
 lands-

langknecht seit still vñ schweigt/ich wil
 euch ein eigen Dorff eingeben/ligt aller
 newst hiebey / das heyst Beyt ein weil/
 daselbst werden mit der zeit noch mehr
 langknecht zñ euch kommen/ da habt jr
 etwer wesen allein/ kñdt spielen/mum-
 schantzen/zechen/vnd frölich sein. Dara-
 auff hat sie Petrus vonn stundan gen
 Beit ein weil gewisen/daselbst haltē sie
 noch jr regiment. Was auch für Lang-
 knecht für den Himmel komen / die weist
 Petrus all gen Beyt ein weil zñ dem ala-
 de hauffen. Ich glaub es sey irer jezund
 ein grosse menge bey einander.

Von einem andern / der nit
 in den Himmel wolt/darumb
 das er vernam/das sein Weib
 darinnen war.

Nicht lang hernach / da was
 ein frommer gñter Mann zñ Cu-
 ma bey Meyland/der all sein tag
 so lustig gessen hett / das er auch andere
 leuth mit ihm zñ essen lustig macht. Er
 h v tranc

Die Garten

eranc aber gar nichts. Der güt Mann
starb/es nam jederman wunder/dieweil
er so wol alle zeit hett essen mügen / vnd
also schnell gestorben war. Die freunds-
schafft ward rathig / liessen in durch die
Wundarzt auffschneiden vnd besehen/
da fand man eylff grosser ruckkörb mit
brot im leib / das was also trocken / das
spannen lang schimlig Haar darauff ge-
wachsen was / vnnnd vbersich auff / in in
die lufftrör vnd kelen gestigen / vnnnd ihn
also ersticket (darumb ein jeder gewar-
net sein soll / vnnnd acht haben / wenn er
ißt / das er auch zünlicher massen darzu
trinck.) Nun der güt mann komit auch
für den Himmel / Klopffet an / vnd begeret
auch hinein. Petrus wz noch ingedēck /
wie es in mit den Langknechten kurz-
lich gangen was / macht nicht viel wort
mit in / sonder sagt: Kome lieber freund
ich will dich gerne einlassen / vnnnd neben
deine Frawen setzen / da soll deine statt
seiz. So bald der fromb Man sein fraw
en gehört nehen / sagt er: Ist mein Fraw
der böß teuffel darinnen / so komme oder
will ich bey Gott nicht hinein / ich hab
in allem

in allem meinem leben/nie mit jr zu frie-
den stellen können/ bin dannoch etwan
von jr zu guten gesellen gangen/ jeczun-
der aber/so ich müßig bin/ vnd ewig nes-
ben jr sitzen solte/ wie würde ich da von
jr außgebreunt werden? Es ist kein win-
kel im gantzen himel/da ich mich wüßte
vor jr sicher zu machen/ sie würde mich
finden/ Ja inn das ewig Segfrewer wür-
de ich erst kommen. Neyn/neyn/ lieber
Peter mein/sitz du zu jr/ du wirst jr bald
genüg haben/ Ich komme in den Him-
mel nicht/ Aber gen Beyt ein weil/ da
wil ich zu den frommen lantz knechten/
da würd ich besser leben haben/ weder
bey meiner Taratanthara/ dem bösen
hellrigel. Mit diesem ist der gute from-
me Mann gen Beyt ein weil gezogen/
da zecht er noch vnd ist frölich daselbst
mit den guten frommen lantz knechten/
vnd begert nit in den himmel/ der teuffa-
biel würde ihn sunst mit dem bösen
Weib vnd kissechten wurm/
ewiglich beschissen
haben.

Die Garten

Ein Esel ist gedultiger / dann ein
Münch.

Als ein zeit / zohe ein Prediger
Münch bey Pfaffenhofen vber dz
feld her / vnd sieht ein Bawren ein
gantz schwer geladenen Esel / sehr vbel
vnnd vnbarmerzig schlagen. Der güt
Herz hette ein mitleiden mit dem armen
thier / schalt den Bawren / sagt: Was er
das arme thier zeihe / das er es also vbel
schlüge / vnnd es dennoch so gar schwer
darzû geladen were? Der Bawer saget:
Münch / was gehet es dich an / der Esel
ist also schwer noch nit geladen / er mag
vnnd kan alle dein frombkeit / gedult
vnd gantze Geistlichkeit deines ganzen
Ordens / dazû tragen / vnd soll jm dan
nocht nicht weh geschehen. Der Münch
ward schellig vber den Bawren / hieß jm
liegen / vnd redet ihm vbel. Fraget doch
zülegt / wie er das verstehen solte? Dar
auff der Bawer geantwortet: Darumb
das diser Esel vnder dem schweren last /
vnd

vnd wie vbel ich in darzu schlag / noch
nicht widerbollen oder vngedultig ist
gewesen. Dann nim̄ waar / ich hab dich
nür ein wenig mit Worten vnd der war-
heit angedast / so heyssest du mich gleich
liegen / vnd balgest mit mir. Ein pfeiff
geb ich euch / Lieben Herrn / vmb all ewi-
ge gedult vnd geistlichkeit. Denn wenn
man dem kind thut was es will / so wey-
net es nicht. Also ist es auch mit ewer
geistlichkeit. Der gute Herz zohe seine
straß / vnd ließ den Bawren fürter mit
dem Esel sein weiß haben.

Von einer Frawen /

die nicht wolt das man

für jren Mann bit-
ten solt.

In Tübingen was ein gute from-
me / erbare / einfeltige Fraw / die sta-
nde einmal jhrem Mann einen hasen
mit ancken oder Buttern / trüge den inn
das prediger Kloster daselbst / schencket
ihn den Mönchen / gab ihn dem prior /
befalch

Die Garten

befalch sich damit in jr gebet/vnd gieng
wider heym. Ober zween tag kam sie wi-
der in das Kloster zu dē Prior/vnd sagt:
O vatter Prior/ich hab mich in ewer ge-
bet befolen / das solt jr außrichten. Ich
bitt euch aber jr solt für meinen mañ nit
bitten/auff das ers nit erfar/ich hab jm
warlich den hasen mit dē ancken heim-
lich abgetragen/das ers nit weysß/vnnd
euch geschenckt / wil euch ein ander mal
noch ein bringen. Dann ich muß förch-
ten/wo er ewers andachts vnnd des ge-
bets teilhafftig/vnd also inen würd/das
ich jm dē ancken hinderruck's genomen/
vnd euch geben hett/würd mich das hel-
lich sewer / vnd alle teuffel in der hellen
mit jm bescheissen / dann er ist euch liebe
andechtigen Herren nicht so hold als jr
meynt. Auff disem gūten wohn/hat der
vatter Prior / die frau in irem andacht
heym gehn lassen. Die gūt frau vermei-
net/jr mañ würd durch dz andchtig ge-
bet der Mönch innen werdē / das sie jm
den hasen mit ancken gestolen vnd den
Mönch geschenckt hette. O ein grosser
andacht/ich wolt euch beten dz wir eins
ein

gesellschaft.

60

ein hafen mit dē ancken schenckte/wolt
im dannoch ein Creutzer herauß geben.

Von einem groben vnge-
hobleten Bawren.



In schloß lag hoch auff einem
berg/vnd vnden ein Dorff daran/
gehöret zu dem Schloß/darauff
saß ein Wittfraw/die das Schloß vnd
Dorff Wittwens weiß besaß vnd inn-
hielt. Zu deren kam eins mals ires Mey-
ers son in dem Dorff/vnd bracht ir öpf-
fel. Sie fragt/Lieber son/was thut der
Vatter?

Die Garten

Vatter? Er sagt: Ich weysß nicht / ich
glaub er fürst mist auff die äcker / dann er
ist daniden im dreck biß an die knye ge-
standen vnnd mist geladen. Die frauw
sagt / du bist ein grobes höltzlin / wenn du
so vnflätig reden woltest / so soltest vor
sagen / Mit vrlaub frauw. Sitz nider je-
zund / isß vnd trinck / vnd geh den wider
heym. Er saß nider / aß vnnd tranc. Die
frauw manet in / das er dapffer essen vnd
trinckē solt / darnach sich wid heym ma-
chen. O ja liebe frauw / sprach er / ich friss
wie ein mor / vñ sauff wie ein kü. Zy sagt
die frauw / du grober kegel / es ist doch we-
der zucht / weiß noch geberd bey dir / heiss
morgen dein vatter selber herauff kom-
men / Er ist nit als vnflätig als du bist.
Der güt kerly zoch heym / hieß den vater
auff morgen zu der frauwen komen.
Er thets. Die frauw saget ihm wie sein
son so ein holdseliger / züchtiger knecht
wer / sagt / er solt in straffen vnd weisen /
das er zucht vnnd vernunft lernet /
vnnd nicht also ein wüster vnflät were.
Ja saget der Bawer: Gnedige frauw /
mein son ist ebē züchtig / wie ein pferde
grise

grise/das scheißt vnd seicht hinten her-
 auß. Aber ich binn nicht desto weniger
 zornig das er also vngezogē ist / ich wil
 es ihm auch nicht schencken. Ja wenn
 ichs ihm nachlaß / gnedige frau / so solt
 ir mir aller hinderst in das arßloch blas-
 sen / ich wil euch frey still haben. Ey nū
 blaß dir der Teuffel inn das loch / saget
 die frau / dem halt auch still / du grober
 schnöder vnflat / du bist doch vil vnflä-
 tiger / wüster / vnnd feindseliger / dann
 dein son. Wem wolte er billicher nach-
 schlagen / dan eben dir? mach dich auch
 hinweg / das ich dich nicht mehr sehe /
 mit deiner vnflatigen / wüsten / groben /
 ungereimten weiß. Also zohe der Baw-
 er auch heym / vnnd was Vatter vnnd
 Son gleich höflich gewesen / hetten sich
 wol gehalten anderthalben tag. Was
 die alten sunge / das lerneten die jun-
 gen / ist ein alts Sprüchwort.

Von einem Herren / der das
 vbelsschweren verbieten
 wolt lassen.

I

Ein

Die Garten

In Fürst / der ein grausamer
vnd Strenger Kriegsmann was/
der ward eins mals vonn seinen
Landtpflegern/Vögten vnd Amptleu-
ten angesucht/womit man doch dē vn-
billichen schweren vnnnd Gotteslesteren
widerstand thet / das es verbotten vnd
gestrafft würde / also welcher weiter zu
fluchen/vñ so grausam zu schweren/als
Sacrament/Wunden/marter/Fleisch/
Blut/ıc. vnfers Herzen/gehört/das der
selbig mit seim leib oder gelt je nach ge-
legenheit der schwür/solchs bessern sol-
te. Das anbringen gefiel dem Fürsten
wol/vnnnd saget: Gotts marter / das ist
ein güt fürnehmen stellet die Artickel /
vnnnd laßt dieselbigen als dann mich
anhören. So will ich sie Confirmiren
vnd bestettigen. Als nūn die ordnung
begriffen ward / vnnnd der Herz wider
zu Landt kame / brachten die Landts-
uögt ihm solche gestellte ordnung für.
Als er die gehört/ sprach er: (wie er dan
ein vngestümmer Kriegischer Mann
was) ja warlich es gefällt mir bey Gots
tes Sacrament die ordnung wol/bey
dem

dem Leyden Gottes / wenn einer diese
Artickel vbertritt / so muß er sommer
Gottes Herigott dapffer gestraffet wer
den. Die Landtpfleger sahen einander
an / vnnd lächleten zusammen. So he
bet der Herz wider an / vnnd saget: Wo
ich nicht zu Landt bin / so gedencet das
ihr vber dieser ordnung steiff haltet /
vnnd kein nichts vbersehet / er sey hoch
oder nidere stands / Reich oder Arm / sie
müssen / sommer Gotts tausent Sacra
ment des Gottes lesterens abstehen /
oder nit leibes vnnd gûts gnüg haben.
Mit dem ist man von einander geschei
den vnd das schwern verbotten wordē.

Von einem der sein Fraw

stettigs ein Hürschalt / vnd
was sie jm darüber zu ant
wort gab.

DV Freyburg im Breysgaw /
Was ein Drayer / der hette nûr ein
aug / vnd nâ ein weib / die er vermei
net ein jungfraw sein. Sie hett sich aber
I ij etliche

Die Garten

etliche mal vnder den Studenten vers
trochen/also/das sie vbel was verwoun
det worden / es schadet ihr aber am le
ben nichts. Der Drayer merckt das er
betrogen was / thet stetigs nichts an
ders dann mit jr zanken/ greinen vnn



granen/ schalt sie ein hür/ vnnnd verwiß
jr/das sie ihn der jungfrawschafft hal
ben betrogen hette. Sie antwortet ein
mal/ vnnnd sagt: Lieber du schiltst mich
für vnd für/vnd verweist mir viel/ vnd
was ist's mehr/ was solte dir ein rechte
jungfraw / die nicht gebrechlich were/
du bist

du bist doch selbs mangelhaftig/ hast
 nur ein aug/ vnnnd gesichst darzu nicht
 wol/ dann du schielest am anderen aug?
 Hiezü antwort der Mann/ solchen scha-
 den hab ich vonn meinen Feinden em-
 pfangen. So ist mir/ sagt die fraw/ mei-
 nes von meinen lieben vnd gütē freun-
 den/ die mir alles gütēs gegünnet vnnnd
 gethon haben/ beschehen/ ich danck ih-
 nen noch darumb/ das sie mir so güt ge-
 schir/ ja besser dann du/ gemacht ha-
 ben. So du dem deinen/ der dir den scha-
 den gethon/ alle plagen vnnnd die pesti-
 lenz wündschest. Der güte Mann nam
 für güt/ vnnnd ließ der frawen jren scha-
 den fürhin vnuerwissen.

Von einer guten Dier-
 nen / wie sich die ver-
 antwort.

In dem Rosenmarckt zu Spen-
 er/ schalt einer ein güte Tochter/
 sprach: Sie wer ein Grosse Hür.
 Sie sprach: Das ist nicht waar/dann
 I in mein

Die Garten

mein Mütter ist noch ein grössere Zuh
gewesen/ die mich in irem leib getragen
hat/ Ich trag aber güter frommer leut
Kinder auff dem leib/ als bald vmb Got
tes willen / als vmb gelts willen / dar
mit jederman geholffen wirdt / hoffe
auch es sey mir genießlich an meiner se
len/ So ist es auch kein todt sünd/ dann
ich thüs bey lebendigem leibe. Dieser
Barmherzigkeit müßt du aber nicht
theilhaftig werden/ vnd soltestu ewig
verdampft sein / vnnnd ob dir dein hertz
zerspringen solte / vnd gienge hinweg
mit diesem bescheidt. Ich acht die güte
diern habe gemeint/ als weh es thü / als
so sünd sey es auch.

Von einem Burgermeister

zu Hechingen/ wie man in zu

Rotenburg nit kennen

wolte.

In Schüster was Burger
meister zu Hechingen/ der was zu
Rotenburg auff einē jarmarck
richt

richt seine geschäfte auß / zohe darnach
 auff die stuben zu dem imbiss. Es wolte
 ihn niemands kennen / oder ihm seine
 gebührende ehr anthun (er zohe auch al-
 so rostig mit seinem fürfál daher es ver-
 schmahet im vbel. Wie man nún ein bes-
 underen wein aufftrüg / mocht er nicht
 lenger schweigen / vnd zeigt sein standt
 an / vnnnd sprach: Dergleichen wein hab
 ich gehabt / da ich newlich zu Burger-
 meister erwölet ward. Nicht lang dara-
 nach / als wein eingehet / vnnnd gewon-
 lich die witz außerschleiche / sieng der-
 selbig Burgermeister mit seinen miebur-
 gern inn der zech an / also ein groß ge-
 schrey vnnnd gebrecht zu haben / das die
 anderen heymischen auff der stuben ver-
 driessen thete / hiessen den stubenknecht
 im sagen / das er das geschrey vnnnd wes-
 sen vnderlassen solte. Es geschach / aber
 es halff nit / er machts je lenger je mehr
 vnd grösser. So sitzen aber nicht weit
 von ihm zween Burger / die spieleten
 im Bret / der eine vnder ihnen (ich ge-
 dencke es was der so das gelt verlore)
 war vnlustig / vñ sagt zu im: Er solt des

J iij groben

Die Garten

groben bawerischen geschreys vnd we-
sens abstehen/was er für ein grober La-
sel were / das man es ihm so offte vnder-
saget hette / vnnnd aber nichts an ihm
helffen wölte. Der Bawren/ oder Bur-
germeister saget: Was es ihn angieng/
da seß er in seiner zech mit sein burgern/
was er ihm einzureden hett? Summa /
er wölt vonn ihm vnueracht sein/ dann
es gebüre ihm nicht. Der Bretspieler
fraget ihn / wer er dann were? Sprach
er: Ich bin der Burgermeister von He-
chingen. Zu welchem der spieler an-
fieng zu lachen/ Ha/ ha/ ha/ bist du der
Burgermeister zu Hechingen / so bistu
warlich ein nârrischer/grober vñ vnges-
zogner Burgermeister/wenn du gesagt
hettest/du werest der Moeren oder Sew-
meister / das hette ich bey deiner vnflös-
tigen art ehe geglaubet. Ich muß bey
dir gedenccken / wenn du der witzigst zu
Hechingen bist/ das die andern von not
wegen nârrisch leut sein müssen. Name
hiemit seinen rock / vnnnd zohe hinweg/
vnd ließ den Burgermeister in sein ge-
schrey fürfaren.

Der

Der Schultheiß von

Haußbergen/wüßt nit

ob er gezwagen hett

oder nit.

DEr Schultheiß von Haußbergen gienghe ghen Straßburg in das bad/ stellt sich gar witzig/ vnnnd redet mit niemandt/ also/ das sich die/ so in vor gekennet hetten/ verwunderten/meinten er were etwann Franck (sie wußten aber nicht das er Schultheiß war.) Wie er so lang im bad sitzt/ so kompt die reiberin/ vnd sagt: Mann/ habt ihr das haupt gewaschen / vnnnd habt euch reiben lassen / so sagt es / Ist es nicht geschehen/ so wil ich lang bringen/ vnnnd euch zwagen vnnnd reiben? Der Schultheiß sager: Ich weyß/ liebe Fraw/ warlich nicht eigentlich / ob ich gezwagen hab / oder gerieben bin oder nicht / Vnser einer / oder wir Schultheissen / hand als dermassen so viel zügedencken/ das der gemein nutz ein für gang habe / vnd gericht vnnnd recht ges

I v hande

Die Garten

handt habt werde / das wir des dings
oder dergleichen vergessen / oder nicht
warnemmen / dann ihr solten mir auch
eine badhaub auffgethon haben / Ich
bin der Schultheys von Hausbergen.
Als bald er das geredet / fiengen die im
bade alle an zu lachen / vnd verwunder-
ten sich / das auß einem groben Baw-
ren / so behendt ein witziger vnnnd fürs
beträchtiger Schultheys worden was.
Es ist ein grosse genade vonn Gott / die
nicht einem jeden beschicht / ein narren
so behendt witzig zu werden. Vor hielte
ihn jederman für ein narren / jeczunder
hat man in für ein halb leinen Schult-
heyssen erkorn.

Ein Fraw begert das die
Orgel zu Straßburg im
Münster / zu jr in jr hauß
komen solt.

Zu Straßburg kam einßmals
ein Fraw morgens vnder der Mess /
auff den pfingstmontag / als man
mit

mit Creutzen dargangen in das Mün-
ster/vnnd wie man also herlich Orglet/
kniert sie für die Orgel nider / leget ihre
hend zusamen/vnd spricht: O du sü-
ße/wollautende vnd himmelische pfeiff/
biß genedig mir armen gasselftirnen /
vnd komme auch zu mir in mein hauß/
Ich bin von Ingenheym/vnnd damit/
wenn du inn das Dorff kumbst/das du
nicht iri werdest / so sitze ich gegen der
linden / auff der rechten seitten neben
dem Schultheysen. Vnd als sie der Or-
gel solches angezeigtet / gieng sie wider
heym / vermeynet die himelische pfeiff
würde gleich bald hernach zu ihr ghen
Ingenheym kommen.

Es wolt ein bawr der Drey-
faltigkeit nie glauben/Vatter
vnd Son glaubet er / wolt a-
ber den H. Geist gar nie
glauben.

Bey Sarburg im Westerreich/
ligt ein Dorff heysset Stensel/da
wo

Die Garten

wonet ein Bawr/einfeltig vnd fromb/
der gienge auff den Osterabendt ghen
Straßburg zů beichten/wolte auff den
Ostertag zům Sacrament gehen. Er
ward durch den Herin vonn der Drey-
faltigkeit gefraget / was er dauon hiel-
te? Der gute Mann wüßte nichts dar-
umb / hette auch nie daruon gehöret.
Der pfarther zeigets ihm vleissig an/
erzelet ihm die herlichkeit der heiligen
Dreyfaltigkeit nach einander. Zulezt
gab er ihm ein Exempel / vnnnd sprach:
Lieber freund ich will dir ein gleichnuß
anzeigen / Laß dir sein/du seyest Gott
der Vatter / vnnnd deinen Son acht / als
ob er sey Gottes Son / vnnnd halt deine
Frawen für den heiligen Geist. Nun
merck ihr alle drey sind eins / Ihr habt
ein wesen / ein haußhalt / vnnnd wonen
bey einander / das gibet ein dreyheit.
Mit dem verstandt zohe der güt from-
me Mann wider heym. Zů jar kame er
wider zů beichten. Der pfarther fragt
ihn gleich vonn stund an / Ob er jezund
an die Dreyfaltigkeit glaubet? Neyn/
sprach der Bawer / Ich glaub allein an
die

die zween ersten/ das ist/ in den Vatter/
vnd den Son/ in die zween glaub ich fest-
iglich. In den heiligē Geist aber glaub
be ich gar nicht/ dann alles das der Vat-
ter vnd der Son mit grosser / harter vñ
sawrer arbeit gewinnen / das verschle-
cket/ verfrist vñd verthüt der heilige
Geist mit einander in boden. Der gute
Mann hette auch also ein Weib / alles
was sie vbertam / das was verschlecket
vñd versoffen / darumb wolte er kein
Glauben an sie haben. Der pfarrherz
müßte den guten frommen Mann inn
seiner einfalt bleiben lassen/ absoluiere
ihn / vñd ließ ihn ziehen / vñd glaubet
der Bawer nicht mehr dann ein zwey-
faltigkeit / dann der Heilige Geist was
im zu vil widerwertig.

Von einem der sich für
einen Edelmann außgab/
vñd doch keiner
was.

Ein

Die Garten

En hoffertiger stoltzgekleidter
aber von leib ein heßlicher / hoffes-
riger / krummer vnd vngeschickter
grober mensch / Kame zu Leipzig in ein
Jarküchen / wolt darinnen zehren. Dies-
weil man aber sein nicht waar name /
vnd jm seiner vngeschicklichkeit halben
des leibs nicht sonders viel ehr entbott /
darzu jm nicht vil Juncferischen gram-
merschē macht / fieng es in zuletzt an zu
verdriessen / erzelet sein herkommen / Adel
vnd gut geschlecht / redt dē zechbrüdern
vbel / sprach: Sie weren grobe / dolle Es-
sel / das sie jm mit sein gebürliche ehr vñ
reuerentz bewisen / ic. Da er nün also
gar lang inn seinem rhūmen verharret /
ja also lang / das es jederman verdrüß-
lich was hūb vnder der gesellschaft eis-
ner an / vnd sprach: Was haben wir mit
dem Adel oder Juncferschafft zu thūn?
Werest du ein solcher Edelmann / als
du fūrgibst / so rittest auff einem dapf-
feren hohen gaul inn eine herberg / so-
gest nicht mit einem kleinen bündlein
zu fūß inn eine Jarküchen / vñsers
Müllers Esel ist mehr Edeler dann du /
dann

Dann derselbig zeucht allwegen daher
mit einem Trabanten vnnnd Lackeyen/
welcher güt sorg vnnnd acht auff in hat.
Du aber hast weder pferdt noch kne-
chte/ vnnnd wirffst dich herfür/ wie das
böß inn der wannen/ wilt vnns damit
deiner Juncfher schafft fretten / ziehe
hin mit deinem Adel / vnnnd laß vnns in
vnserem geloch zů frieden. Da der gũ-
te heßliche Juncfher das höret / zohe er
fort inn ein ander herberg/ an dem orth
achtet man nit vil auff in.

Ein voller bruder fordert
in sewers nöten wein vnd
kein wasser.

EMen ehrlichen Burger zů
Straßburg/ der hieß Graßbeck/ dē
bran auff vnseres Herren Fronley-
chams abent sein hauß. Es woz gar ein
angstlicher brant/dz jederman erschro-
cken war. Da man aber allenthalben
in der stadt schry/wasser her/wasser her/
Auch ein grosses angstliches zůlauffen/
denn

Die Garten

dem pfenningthurn zu/zum selben graben was/so stehet ein Beyer/ein volle kuh/der auff im selbs weder stehn noch gehen mochte/sondern sich an ein stück der Lehnder (die dazumal gebrochen was) auffhielt/eben auff der Brucken/achtet weder des brands noch des lauffs / vnd je mehr man schrey / Wasser her / wasser her. Sagt er gleich auff ein jede red: Langts mirn wein her/langts mirn wein her. Ongefehr so laufft ein Burger daher inn seiner rüstung/vnnd will für das Münster/der hört die wort vonn dem vollen narren / der zückt die faust mit dem blechhendschüch / vnnd schlecht ihn inns angesicht/das er vber die bruck ab inn graben fellt/vnnd lieff der burger hiemit dem Münster zu. Hetten die/so on das wasser schöpfen / den vollen Beyer nicht herauß gezogen / er wer im wasser ersoffen. Das heyst wein gefordert in feners nöten / so man mit wasser hilff beweisen solle. Der Beyer ward in thurn gefürt/
da ließ man in wider nützen
chtern werden.

Von

Von einem Pfarriher:
der ein kindt taufft.

Alff einem dorff solt ein Pfarri:
her: ein kindt Tauffen / vnd als er
die gefattern fraget: Nennet das
kind? Sagten sie: Es ist ein töchterlein.
Er liest die Collecten / vnd anders dar:
zu gehörig vollends auß / fragt wider/
wie das kind heysen solt. Die gefattern
sagten: Es ist ein Töchterlein. Sie ka:
men vbern Tauff. Der Pfarriher: fragt
aber / vnd sagt: Wöl jr das das kindt
getauffet werde? Ja / sagten die gefat:
tern. Da saget er: Nennet das kindt.
Sie antworten: Es ist ein Töchterlein.
Da ward der Pfarriher: zornig / vnd sa:
get: Es ist der Mütter inn dem runzela
fall / hette schier im tiltappen gesaget:
Ich sihe an dem schlitze selber wol das es
ein meidlein ist / ihr dörffet mir es nicht
sagen. Gleich lieff des kinds Vatter sel:
ber herzu / vnd sagt dem Pfarriher: des
kindts nammen / da Tauffts der Her:
vnd zogen heym. Die gefattern waren
K eben

Die Garten

eben als wirzig als das kindt. Es was
am zeichen ohn das wol zusehen / ob es
ein han oder ein henn wer.

Ein Wolff starb in einem
kalten winter zu Grendelbrück/
im Breuschtal / die Bawren
fragten umb/was die vr-
sach wer.

In Breuschtal bey Grendel
brück/da wont ein mal ein wolff
im gebirge / der jnen ein solchen
grossen schaden thet / das nicht dauon
zu sagen was / sie stellten jm offtermaln
nach / sie giengen mit geschosß vnd spie-
sen auff ihn / kundten vund mochten jn
aber nicht bekommen / er was ihnen al-
len zu geschickt. Hernach inn einem kala-
ten Wintter / starbe der Wolff / lage
nicht weit vonn dem Dorff / ward bald
gefunden / Die Bawren waren fro / ka-
men zusamen / vnd hetten gern die vr-
sach seines todts gewußt / erkanten vier
auß dem gericht / das was der Schult-
heiß /

heiß/ Heimburg/ Heiligen meyer/ vnnnd
 Rechner/ deren solt jeglicher sein beste
 meynung/ anzeigen/ an was krankheit
 der Wolff gestorben wer. Der erste was
 der Heimburg/ der sagt: der Wolff we-
 re in der grossen kelt vnd tieffen schnee/
 barfuß gangen/ vnd in die kelt zum her-
 zen geschlagen/ das er daran hett ster-
 ben müssen. Der Rechner was der an-
 der/ der zeigt an/ er hett mehr geloffen/
 zu fuß/ dann geritten/ darumb hette in
 athems gebroffen/ vnnnd wer ersticket.
 Der Heiligen meyr der dritt sprach/ Der
 grausam groß wehthum/ dē er gehabt/
 der hat ihn vmb's leben bracht/ dann es
 sey ihm alle seine tage/ nie so weh gewes-
 sen/ als da er gestorben seye/ das habe er
 bey sein eyd vnd auff sein end behalten.
 Der Schultheyß aber/ der vierdte sa-
 get: O lieben Burger wir habens frey-
 lich wol an vnserem Viehe innen wor-
 den/ welches die vrsach seines Todtes
 ist/ wir haben wol so viel hübsches Vie-
 hes verloren/ das er alles gessen hat/
 dann es ist zu gedencfen/ er habe
 mehr rohes Fleisch/ dann gesottens
 A ij gessen/

Die Garten

gessen / so sind die alten kühē (die er zu
zeiten / hungers halben essen müssen)
auch nicht allwegen für ihn gewesen/
vorab inn dieser grossen Kelte. Vnsern
gefattern Cloy Jörgen / starb kurglich
sein kühē / die was sich die ander gieng
ir die bein ab / dieselbige hat er auch inn
dieser Kelte also roh gessen / vnnd Kalt
wasser darauff getruncken / das hat ihn
im leib gegrinpt / darumb er gestorben
ist / vnnd das wird / lieben burger / seines
Todes die rechte vrsach sein. Auff diese
rede / ward vmbgefragt / vnd gemeiniga-
lich beschlossen / Der Schultheys hette
die beste vrsach / des Wolffs todt ange-
zeigt / also das er mehr rohes fleisch /
dann gesottens gessen hette / vnd were
das auch an seinen zänen wol zu sehen
das sie also weiß weren / Doch hette es
ihm nichts geschadet / wenn die Kelte
nicht so groß gewesen were / dann Kalte
vnd rohe ding essen / vnnd Kalt darauff
trincken / in einer vnleidlichen Kelt / das
mag die leber nicht erleiden / vnd ist ein
tödelich ding / darumb der Wolff auch
hat sterben müssen / darmit zogen sie
dem

dem Wolff den belz auß/ lieffen ihn li-
gen/ vnnnd giengen wider heym / waren
fro/ das ihr feind todt was/ welcher tag
vnd nacht/ auff sie angriffen hett.

Ein Pfaffenmagdt trat
in ein Dorn.

D B. Menz wolte eines Thumb-
Scheren Magdt / morgens früh im
Winter / das feuer inn den Ofen
machen/ als sie aber Pantoffeln an het-
te/ thet sie ein mißtritt/ das ihr der pan-
toffel außfiel/ vnnnd trat sie neben sich/
in einen hagen Dornen von einer wel-
len/ so ohngefehrlich da lage. Wol in/
sie macht das feuer dannocht an/ aber
der Dorn thet jr je lenger je wirser/ vnd
also weh/ das sie zu des Herren Scherer
gienge/ gehüb sich vbel / Bathe ihn/ er
solte jr den Dorn auß dem fuß ziehen/
Der Scherer lügt/ sahe wol das er tieff
stach/ griff mit einem zengle darnach/
biß er in zuletzt erwüschet/ er was aber
gar tieff hinein gangen. Wie er also

K iij starck

Die Garten

starck an dem Dorn zeucht / so leßt die
Magdt vor grossen ängsten ein starck
enscheiß. Ho ho sprache der Scherer/
der ist herauß / Gott hab lob. Ach lie-
ber Meister / sprach die Magdt: Ist er
dann herauß / so keuwend in / vnd strei-
chend mir ihn vber das loch / so schwi-
ret es nicht. Der Scherer lachet / vnd
sprach / Liebe köchin ihr habt des eine
güte natur an euch / bedörffend keines
Scherers / die Dörn auß zu ziehen / dann
ihr habt diesen selbs mit dem Arß hera-
uß geblasen / Sehet ihr darumb wo
er ist / keuwend ihn / vnd streichend ihn
vber das loch / ihr wissend am allerbas-
sten wo euch weh ist / Wo es dann wi-
der schweren wolte / so kommend her-
wider / als dann muß ihn der Knecht
(der gesicht baß dann ich) vleissig su-
chen vnd herauß ziehen / will es dann
auch nicht helffen / so lassend euch
das loch saugen / das ist eine
gewisse kunst / vnd ließ
sie darnit heym
ziehen.

Von

Von einem armen Schu-
ler/der wolte gen Paris zie-
hen/vnnd ein Witwe mei-
net er wolte ins Para-
disß ziehen.

En armer Schüler wolt stu-
dierens halben gen Paris ziehen/
der hiesch in einē Dorff bey Müs-
renberg / das heysset Schweinaw / ein
stück Brots einem armen Schüler/von
einer Alten Witfrauen. Sie fraget in
wo er hinauß ziehen wolte? Er sagt: er
wolte gehn Paris. Die Fraw verstund/
er hette gesaget/er wölte inn das Para-
disß. Sie was fro / vnnd sprach: O lies-
ber Gesell/ Es ist bey sechs wochen/da
starbe mein Mann/vnnd saget/er wol-
te auch inns Paradisß / Er namme kein
gelt/oder Kleider mit jm/es wirt jm fort
hin / an zeerung vnd gelt vbel gehen/so
bin ich leyder zū alt vnd schwach / mag
ihm nicht nachkommen/das ich ihm et-
was bringen kōndte / wenn jr mir so vil
zū dinst thūn wolten/ich wolt euch gelt
K iij vnd

Die Garten

vnd kleider geben/das jr es jm gebracht
hätten / das ihm der Würt nicht lang
borgen dörfste / es gehet nicht viel bota
schafft auß vnnnd ein / ich wolte jm sonst
lang geschickt haben / ich wil euch dar
zu ein güte schenck thun. Ja gern / sa
get der Schüler / was jr mir geben / das
will ich ihm / so ich zu ihm kom / getrew
lich vberlüfern (er mercket das die güte
alte frau ein x für ein v verstünde / ge
dachte / das wirdt dir ein ebene sach)
sprach weiter. Ober ein viertheil Jar
werd ich wider kommen / so wil ich euch
bottschafft bringen (wo ich euch ach
ter finde) wie es vmb ewren Mann ste
he: Die alte Mütter gab ihm gelt / heims
der / kleyder / vnnnd was sie vermeynet
das ihrem Mann vnnn nöten würde
sein / das es der Schüler ihm brechte /
vnnnd schencket ihm darneben ein güt
trincck gelt. Das name der güte Gesell zu
ihm gar freundlich / zoge ghen Paris /
verzechts / vnnnd hette einen güten müt
damit. Die Frau vermeinet / er wer im
Paradis / vnnnd wartet noch / wenn er
wider komme / vnnnd ihr auß dem Para
dis von

biß von ihrem Mann bottschaft bringe. Ich gedencke er werde des weges in das Paradis verfehlet haben / vnd gen Heyt ein weil zu den frommen Lantz knechten kommen / vnd das gelt vnd Kleyder etwan verspielt haben.

Ein Pfarher zeigt seinen Bawren die arß
(Ch)erb für heyl
thumb.

Wß der Musel in einem dorff / nicht weit von Coblenz / da was ein pfarher ein wilder vogel / der fonde seine Bawren am Sonntag nicht in die Kirch / vnd besonder in die Predig bringen / das sie darinnen biß zum ende blieben weren. Er schalt sie / redet ihnen vbel / Ja er sagte was er wolte / so galt es ihnen gleich. Im Winter zogen sie in die stuben / Im Sommer gien gen sie in die Gärten vnd Felder / vnd wenn der pfarher vnsern Hergott erheben wolte / so klencet der Sigrift / so

K v stürmen

Die Garten

stürmen die Bauren herzu/ vnnnd gleich
wider auß der kirchen / Es verdroß den
Pfarher/ gedacht (wie er dann ohn
das ein wildes kindt was) er wolte sie
bezalen/ verbot dem Sigriften/ das er
mit klencen solt/ biß das Ampt gar ge-
schehen were. So bald nün das Ampt
auß war/ zohe der Pfarher die Pries-
terlichen kleider auß/ nestlet sich auff.
Der Sigrift klencet/ die bawren kamē.
Da stund der Pfarher mitten inn der
Kirchen/ hett das gefaß vber abgezo-
gen/ vnd zeigt inen den hindern spiegel/
vnd sprach: Wölt ihr das Gottes wort
nicht hörn/ noch das Heilthumb sehen/
so kompt hieher/ vnd sehet vnnnd höret
an statt desselbigen eine beschifne arß-
kerb/ vnd liß damit ein grossen starcken
furg/ das es inn der ganzen Kirchen
erhalle. Die Bawren erschracken ab
dem ellenden anblick/ vnnnd selzamen
thon/ lieffen alle wider zu der Kirchen
hinauß/ als wenn sie der Teuffel jaget.
Darnach verklageten sie den pfaffen
vor dem Bischoff von Trier/ der pfaff
müßte sich trolen/ wer er dem Bischoff
worden/

worden/ man hette jm vil vngereump-
ter Item an das beschissen kerbholz
geschnitten / vnnnd man würde ihm das
Heilthumb auffdem Hermelstein gezei-
get haben/ das er sein nicht hette dörf-
fen lachen.

Von einem Krancken

der vonn Gott an die

zwölff botten apa-

pelliert.

In Rieß ben Nördlingen saß
ein reicher bawer in einem dorff/
der hieß Lutz Meyer. Diser bawer
hett ein liebe haußfraw / vñ vill kinder/
die starben jm in einer pestilenzischen
ziet alle nach einander. Zulezt stieß den
fromen Lutzē die kranckheit auch selbs-
an. Er ward schwach / die nachbawren
holten dē pfarherin / der solt jn mit dem
Sacramenten versehen. Der pfarherer
kamt / der bawer weigert sich / wolt sich
nit verrichten lassen / bezeugt / berüfft /
vñ protestirt sich / mit einer zornigē vn-
würser

Die Garten

würser red/ vnd geschrey/ vnd sagt: **L**e
wer im noch nit gelegen zů sterben/ **L**e
thet im auch Gott vil zů kurz vñ vnbil
lich/ das er in nach seines weibs vnd kin
der todt/ aller erst auch zů sterben erfor
deren wolt / dieweil er doch so gar viel
nachbawren vñ sich hett / die noch biß
anher / mit allem irem volck / jungen vñ
alten/ gesund/ frisch vnd vnangegriffen
blieben weren / das were ganz des vn
freundlichen gespilt / Darumb er auch
die sach vñnd alle handlung / die Gott
mit im/ seinē weib vñ kinden/ bißher an
gericht / für die zwölff Aposteln/ als die
Richter / so Christus selbs geordinie
ret hett/ appelliren wolt / bedingt/ app
liert / vnd berüßft sich auch gleich / von
stundan/ angesichts/ aller vmbstender/
für dieselben gemelten zwölff Aposteln
vnd richter / Das im gar zů viel vngüt
lich geschehen/ vñ noch kein auffhörens
da wer. Der Pfarher: verwundert sich
dieser strengen appellation / sprach zů
ihm: **L**y lieber Lutz/ nicht also / biß ge
dultig / du solt dein krankheit / leben
vñnd todt in den willen Gottes setzen/
du bist

du bist sein Kind / Er hat dich hertzlich
 lieb/dan er suchet nür die seinen / vñ die
 im in sonderheit lieb sind / die greiffet er
 am aller ersten an. Ist das war/sage der
 bawer/so wölt ich das er mein tödtlicher
 feind wer/so ließ er mich das mein schaf
 fen/vnd wer ich vor im zu frieden/dörff
 te nit in der forcht vnd sorgen des Tod-
 tes stehen/dann liebet er die seinen/vnd
 handelt mit ihnen wie er mit mir vnd
 den meinen gethon hat / so liebe er den
 Hender oder Türcken / vñnd mich gar
 nicht/ich will auch nichts mit ihme zu
 schaffen haben weiter / dann was zu
 der appellatio gehörig ist / ich hab auch
 vörgeredt/es seye mir gar nicht zu ster-
 ben im sinu/das red ich noch/vnd wenn
 es euch allen ein leiden wer. Damit zo-
 he der Pfarher wider heynt. Der Baw-
 er ist auch desselben legers wider auff-
 kommen vnd gesund worden. Er geden-
 cket vnd vermeinet noch / hette er nicht
 für die zwölff botten/oder zwölff Rich-
 ter appelliert / die Kranckheit würde im
 das hertz abgestossen haben. Helff was
 helfen mag/gromen wil nit allzeit zie-
 hen/wenn wir sterben sollen.

Von

Die Garten
Von eines Bawren son
der zwo Beginen schwan-
ger macht.

In der Stadt zu Franckfort/
da ist ein samlung mit Geistlichen
vñ schwestern/ die man Beginen
nennet. Zu denen hett ein bawer auß dē
land gūt kundschafft / woz sie für essende
speiß bedorfften/ das gab er in / dann er
was jr Meyer/ also/ das er vñ sein frau
tag vñ nacht bey inen assen vñ tran-
cken / vñnd iren zūgang zu inen hetten.
Nū der bawer hett ein grossen son / der
macht mit den zweyen jüngsten schwe-
stern inn der samlung/ besonder kund-
schafft/ das sie der sachen eins wurden/
vñ heimlich einander ire not klagten/
wie dann wol zū gedencen. Es sienge
sich leglich je an zū schicken/ das der an-
dacht / mit zweyen grossen beuchen/ da-
der kindern/ einen außbruch gewinnen
wolte. Da die Meisterin solches ge-
war warde / Da stellet sie die zwo jün-
gen Schwestern im Capittel für / fra-
get sie!

Get sie / was sie gedacht / das sie sich so
grob vbersehen hetten / vnd wer der vat
ter wer / das wolt sie wissen. Die Jüngst
ohn eine gab antwort. Vnsers Mey
ers Son / saget sie / hat mich zum nech
sten im bad also außgerieben / mein leb
tag bin ich nie dermassen gerieben wor
den / ich hab mich gelitten / wie er mir sa
get / also thet ich / weyß noch nit / was er
gemacht hat / wiewol mir der bauch ge
schwilt / man müß ihn darumb fragen.
Die Jüngste Schwester ward auch an
geredt / die sprach: ich weyß nicht / dann
nehermals sahe ich ohngefährlich (als
ich holtz holen wolt / vnnnd das bad wera
mer machē) die zwey / des Meyers son /
vñ die / einander im bad außreiben / Ich
lügt ein weil zu / vnnnd gedacht / müß es
also gerieben sein / das hastu nie gese
hen / du wilt deins recht außrichten / ehe
du ins bad gehest / so weschest du dich
darnach mit einander / vnnnd badest
mit rüwen. Darauff hat mich auch
des Meyers Son im holtzhaus / als
so trucken außgerieben / Ich hette
mich aber ehe des Todtes versehen /
denis

Die Garten

denn das mir das bad solt in den bauch
gerathen sein / das er mir so hert wirdt/
was darauß werden wil / das weysß ich
nit / ich hab des spiels nie mehr gebrau-
chet. Die Meisterin was trawrig / sahe
den einfalt ihrer töchterin / das sie von
dem kegel betrogen waren / berüfft sein
Mütter / klagt jr das leyd / sagt vnd er-
zelt ihr alle handlung / wie sie von den
Töchtern gehört hette. Die Mütter
was zornig / gieng heym / redt dem Son
vbel / schalt in / vnd flücht im / das er die
schand begangen hette. O liebe Müt-
ter / sprach der Sohn / wie thüßt du nür
doch / ich bins doch alles von dir geheis-
sen worden. Ja sprach die Mütter / ich
habe dir den galgen an den halß geheis-
sen. Wolan / sprach der Son / hast du nit
allezeit zü mir gesprochen / ich soll mich
aller gesellschaft abthün / vnd freunde-
schafft zü den Geistlichen machen? dan
mit den frommen vnd heiligen werde
man from vnd heilig / vnd mit den geist-
lichen werde man Geistlich / das hab ich
gethan / vnd dir gefolgt. Nun bin ich
auch ein Geistlicher Mann vnd fromer
brüder

brüder worden. Ja sprach die Mütter/
du bist ein Lecker vnnd Büb worden/
weyßt du nicht / das es vnser Hergotts
Schwestern sind? Bogz / das ist doch noch
besser sprach der Son / so ist vnser Herg
gott mein schwager / vnnd ich bin noch
heiliger dann vor. Nun hab ich keinen
mangel mer / der schwager muß mir wol
helffen meine Kinder ziehen / wenn du
mir gleich gar nichts zü steuer daran ge
ben / vnd gieng von jr hinweg / nam sie
beyd auß der samlung. Die jüngste fürt
er zü Kirchen / die ander behielte er bey
ihm / biß sie genas / gabe ihr darnach
sunst ein gütten Gesellen / damit keine
der andern zü verweisen hett / vnd halff
ihm also sein schwager / das die Kinder
erzogen wurden / vnnd die gütten Freu
lein zü ehren kamen.

Von einem der dem
Herren von Montheiß
ein habich gebracht
hat.

2

Der

Die Garten

Der Herz von Rappolstein hee-
te ein Welschen Knecht/ dem gab
er ein Habich/ er solte in dem Her-
ren von Montheiß bringen/ vnd anzei-
gen/ das der Herz von Rappolstein ihm
den geschenckt hett/ Der geck nam den



Habich/ vñ in der erstē herberg/ vergaß
er den hendschüch. Wie er aber den vo-
gel auff der blossen hand tragen wolt/
schlug er jm die klawen in die hend/ das
mocht er nit erleiden/ dräiet jm den halß
vmb/ knüpffet jm ein wid drumb/ vñnd
schlug ihn vber die achsel/ vñnd zohe zu
dem Herren von Montheiß/ vñnd sagt:
Gnedig

Gnedig Herz von Montheiß/mein Gnedig Herz von Rappscheiß / schickt euch den Habeiß. Der Herz vom Montheiß / sahe wol das er Todt was / fraget ihn / Wie das zu gieng / das der Vogel Todt were? Ja sagt der Welsch Gnedig Herz / er hatt mir gemack krezil mir auff mein finger. Ich hab jm gemack krag ab. Ds muß dich die feysel ankommen / setzt der Herz von Montheiß / vnd befalch / man solt ihn vier tag inn thurn legen / darnach schicket er ihn wider heym. Der Herz von Rappolstein fraget ihn / was der Herz vom Montheiß zu dem vogel gesagt hette? Der Welsch sagt: Gnedig Herz von rappscheiß / es hat mir gemack der Habeiß / krag mir auff mein finger / ich hab ihm gemack krag ab / vnd dem Herz vom Montheiß brockt. Der Herz fraget / Ist der Vogel Todt gewesen? Ja / Gnedig Herze vom Rappscheiß. Sprach der Herz: Das müste dich die Beul vnd Pestilenz ankommen. Was hat der Herz vom Montheiß darzu gesaget? Ja Gnediger Herz / er hat mich gelect in finster loch / wol vier
2 11 tag

Die Garten

tag an einander. Der Herz lachet des Narren/ ließ ihn auch zween Tag inn Thurn legen/ vnd schicket dem Herren von Montheiß ein anderen vogel/ mit einem anderen diener/ der ward ihm/ vnnd ward dieser narz vier tag im finstern loch gelect.

Von einem Edelmann/

der alles geschirz auff dem Tisch zum fenster hinaus warff.

DER Keyser Maximilianus hielt ein Edelmann an seinem Hof/ der ein freuele hant war. Eins mals hett der Edelmann sampt anderen vom Adel/ ein grosse maalzeit vnd gloch/ zu Wien in Osterreich zum güldin Hirsch angeschlagen/ vnnd dem Würt beuohlen/ nur das best/ vnd nach dem besten zu zürichten/ sie wolten es wol bezalen. Die gest kamen/ man setzet sich nider/ sieng an zu essen/ etliche Essen aber die waren nicht nach des Würt

Wurts meinung vnd willen zügericht
vnd gekocht. Er dorfft nichts sagen/vñ
erwünscht vor zorn ein teller oder zwee/
würfft dieselbigen züm fenster hinauß/
inn den hof hinab / für die kuchen/ daß
die Mägdt mercken solten / das sie nie
recht gekocht hetten. Vonn stundan so
wünscht der Edelmann die blatten /
Schüsslen / Silbern becher / vñnd was
auff dem Tisch was / sampt dem tisch-
lachen / vñnd würfft gantz behend eins
nach dem andern / auch in den hof hin-
ab züm fenster auß/es was ein vnuerse-
hens wunderbarlichs auffraumen. Der
Wurt gadachte / der gast were vnfin-
nig / fragt: Was er darmit gemeinet /
das er den wunden allen / so geschwin-
de züm fenster hinauß würfft? Er ant-
wort/ vñnd sprach: Da habe ich lieber
Herz Wurt nicht anders gedacht / da
ihr die Teller habt hinab geworffen/
dann das wir daniden im hof essen müs-
sen. Darumb hab ich euch zü behülff/
das ander alles gleich bald hernach ge-
worffen/ damit man daniden dester ehe
wider zürichten kan. Es hungert vns/
L iij wir

Die Garten

wir weren gern bald zū tisch. Der Wirt
samt den andern müsten der geschwin
den schalckheit lachen / ließ den leiden
im hoffwider auffhin trage / rüst anders
zū / zechten / vnd waren frölich. Der E
delmann bezalt / vnnnd hette ein mal ein
burgerlust gehabt.

Ein Scherer erwüschet sein fraw im Ehebruch.

DB Schaffhausen was ein Sche
rer der hette eine schöne fraw / sie
gienge aber barfuß mit dem affter
wagen. Auff eine zeit was er vber feldt
gewesen / vnd als er heym kömpt / so fin
det er ein auff dem herd inn der kuchen /
den langen weg bey seiner frawen si
zen / sie lauseten einander / aber nicht
auff dem kopff. Der güt Mann erschra
cke / vnnnd sprach: O du liebe haußfraw /
bist du nicht wiziger / da du dir die nüss
woltest lassen abmachen / möchtest du
doch hinauff inn das hauß gegangen
sein / es were eben niemands inn der
zeit

zeit kommen / der Scherer hett gewöle/
Du soltest selbs wol gedencen / wie es
sich so leiden vbel gereinnet hette / vnd
auch so vbel dir were angestanden / wo
etwann ein Frembder kommen were /
vnd euch also zü bürglen vberinander
funden hette / vnd gedencke du (sprach
er zü dem Gesellen) das du mich nicht
mehr darzü laßt kommen / du müßt mir
sonst ein plappart für den freuel geben.
Es ist einding / das ich meine lebtage nie
gern gesehen / vnnnd ihe lenger ihe wenis
ger sehen mag. Damit zohe der güt Ges
sell hinweg / hat des plapparts auch
hernach geförchtet / also / das er den
Scherer nimmermehr hat lassen dar
zü kommen.

Ein reiche Burgerin zohe
inn das Bildbad / hette
gern Kinder ge
habt.

ES badet einßmals eine Rei
che/hübsche Burgerin von Stut
garten

Die Garten

garten inn dem Wildbad/ deren schöne
vnd zierlichkeit des leibs / gantz vnd gar
kein krankheit anzeigen thet/ darumb
ward jr Magdt von einem alten Prie-
ster befragt (welcher auch im bad w3.)
Auß was vrsach doch ihre Fraw sich zu
baden begeben / so sie doch nicht krank
were? Die Magdt sprach: Umb keiner
andern vrsache willen/ lieber Herz/ thut
sie es / dann das sie so gern Kinder het-
te/ verhofft das bad solt bey jr würcken/
das sie fruchtbar würde. Darauff sagt
der Herz: Ich wolte ihr viel ein besseren
rath geben / wenn sie mir folgen wölte.
Zu Tübingen sind viel junger Studen-
ten / Zu Stutgart viel starcker junger
Thumbherm / vnder denen möcht sie et-
wann einen bekommen / der ihr an der
Complex gleich vnd änlich were / vonn
dem sie ein kindlin vberkäme. So sind
auch noch gar vil Klöster / da hübsche/
glatte/junge Mönch inen sind / da wür-
de etwann einer befunden / welcher zu
der handlung tänglich were/ vund mö-
chte das vnnütze gelt / des badens hal-
ben/ wol erspart sein. Die Magdt gab
dem

dem Herren auff seinen getrewen rath
antwort/ vnd ließ ein grossen vñ schwe
ren seuffzen/sprach: O lieber Herz/die
ding so ihr mir angezeigt/haben wir als
le versucht/vnd vnderstanden/ ich eben
als wol als sie/ es hat aber biß anher/
noch nicht verfahren wöllen/ vnd hilfft
auch inn boden gar nichts. Der Pfaff
sagt: Man muß das in mancherley we
ge/auch oft vnd dick versuchen. Ja sa
get die Magdt/ wir habens auch in als
le weg wol versucht/hilfft doch nichts.
Ich wils ihr aber anzeigen/ wir wöllen
uns wol nicht sparen/ Doch besorg ich/
es wirdt auch nichts nütz sein/wir wöl
len recht erstmals der badensart auß
warten/was demnach güt seye/das ge
schehe/ gieng damit wider heym.

Von einem Bawren der sterben wolt.

Auff dem Wormser Garwe/ da
was ein reicher Bawer/ der ward
krantz/ vñnd also gar schwach/
L v das

Die Garten

Das er sterbens sich verpegen hett. Die nachbawren sagten zū jm/er solt sich zū Gott bekeren/ vnnd sich verrichten lassen/trösteten vnnd ermanten ihn / nach irem möglichsten vleiß/so lang/biß er dē willen darein gab. Dieweil aber sie den Pfaffen holten/ steyg er aller oberst inn dē hauß auff das dach/vnd deckt dasselbig mit stro. Der Pfarher: sampt den nachbawren/ die kamen / sie suchten in/niemands kondt in finden / vermeynten der teuffel hett in hin. Zindnach so sicht man in auff dem dach sitzen / dasselb zū plegen. Der Pfarher hieß in herab gehen/fraget was er dortoben thet / warumb er sich verkrochen hette / dieweil er der Pfarher: vnsern Hergott mit ihm brechte? Der Bawer sagt: Wenn Gott Allmechtig ist / vnnd alle ding so wol weyß im Himmel / vnnd was auff Erden ist / so hat er freylich auch wol gewußt/wo ich gewesen binn. Seit ihr dann ein Priester an GOTTes statt / so solte er euch freylich auch angezeyget haben / wo ich were / das ihr mich nit also lang hetten vergebens suchen dörfen.

börffen. Der Pfarherr saget: Du hast
 selzamme mucken bey dir / wilt du dich
 zu GOTT richten / so müßt du eine an-
 dere art an dich nemmen / vnnnd ist vonn
 nöten / das du die zeitlichen sorgen von
 dir schlahest / vnnnd dich zu GOTT ke-
 rest. Der Bawer fraget den Pfaffen /
 ober auch meynte das er sterben wür-
 de? Ja / saget der Pfarherr: Alle zeia-
 chen an dir / die bedeuten dir den Todt.
 So wiß GOTT / sprach der Bawer /
 das es mir mein Lebenlang nie vnges-
 reumpter vnnnd vbler kommen ist / vnnnd
 hette mir auch nicht vnzeitiger begege-
 nen mögen / dann eben jezunder / dann
 die erndt ist an der handt / vnd geschnit-
 ten dazu / vnnnd kan ich die frucht nicht
 heym bringen. So regnet es mir durch
 das löcherte dach oben inn das Hew /
 das es mein Viehe nicht schmecken /
 ich geschweyge / essen will. Niemand
 ist der die Knechte vnnnd Mägde an-
 weiset / Lige ich da / vnnnd soll sterben /
 Was wirdt darnach darauff? Der
 Pfarherr sprach: Solchs müßtú alles
 faren

Die Garten

faren lassen / vnnnd gedenccken das du
Gott antwort vnnnd rechnung geben
mußt/deiner handlung inn dem Leben/
darumb so du wilt / so will ich dich mit
beyden Sacramenten versehen. Dar-
auff gab der bawer antwort: Wie theu-
er verkauffet man sie alle beyde? Sprach
der Pfarther: Als vmb sonst/dann Gots
hats vns geheysen. Wolan/ sprach der
Bawer / Kost es dann nichts / so bringe
mir den Element aller her / weil ich
doch sterben soll / meine Fraw soll dem
Sigristen etwann ein trinck gelt schen-
cken. Ehe zwö Stunden / was der Bawer
todt. Das heysst ein tuch in schwacheit
mit stro decken.

Ein Pfarther Tauffet
ein kind/vnd ließ die Hebo-
amm ein grossen
furz.

3 B Schorndorff/inn dem Wirt-
tenberger Land solte einßmals der
Pfarther ein Kindt tauffen. Wie
nuns

nün das kind eingeseget was/ vnnd es
 die Hebamm bey dem Tauff will auff-
 binden/ buckt sie sich ein wenig zū tieff/
 also/ das ihr ein grosser starcker furtz
 entwüschet. Nün war/ sprach der pfarr-
 her/ welche grosse krafft meine wort
 vermögen/ dem Teuffel hab ich gebot-
 ten/ außzūfaren vnnd zū weichen/ das
 hat er gethon/ vnnd die gantze Kirchen
 voll gestandts gemacht. Die Hebamm
 schemet sich/ das jr das gefaß was auff-
 gangen/ vnd hette des pfarrheris wort
 nicht gemerckt/ wolte sich verantwor-
 ten/ vnd sprach: Ach lieber Herz/ nicht
 meynen das ichs gethon hab/ das kindt
 in der wiegen hat also ein hartē furtz ge-
 lassen. Der pfarrward zornig/ sprach:
 Gott geb jm die drüß/ sol er also vnschä-
 hafftig sein vor einem würdigen Prie-
 ster/ pfuy der schanden/ kan es jertzunder
 so jung noch in der wiegen/ solche grosse
 starcke scheiß lassen/ was wil erst drauß
 werden wenn es alt wirt/ ja gewißlich
 wirdt es hosen vnd beltz voll hoffieren/
 vnd jm selbs glück vnd heil verscheyßen.
 Das arm kind kont sich nit verantwor-
 ten.

Die Garten

ten. Was die Hebamm gethon hette/
das hat sie alles auff das vnschuldige
Kindt gelect / das Kindt ward dara
nach getauffet / vnnnd macht sich jeder
man auß dem rauch / den der böse geist
hinder ihm gelassen hette / da er außge
faren was.

Wie ein Fürsprech seine Kinder gemacht hat.

DB Menz was ein Fürsprech /
sein ganz ritzroter Fuchs / der hette
viel Kinder / die waren alle weiß/
vnnnd hetten hübsch weiß haar. Auff
ein zeit als er sie mit ihm führet / warde
er durch einen andern gefragt / was die
ursach wer / das er so rot / vnd die Kinder
so hübsch weiß weren. Ja / sprach er: las
set euch das nicht wunder nemen/
ich hab sie alle mit dem hindern
vnd nicht mit dem kopff ge
macht / sonst weren sie
eben als rot als
ich bin.

Lin

Ein Bawerin gab ein Reiter
kurze antwort.

Der Haubtbergen setzet sich ein
Bawerin inn eine gruben/ vnd
reusperet sich mit dem hinderen
wagen/ inn dem reyttet ein Reytter für
an hin. Sie erschrack vast vbel/ wüschet
auff/ schemet sich/ were gern gewichen/
sie mochte aber nicht. Der Reytter
saget: Ey liebes Frewlin/ bleibet sitzen/
vnd machet fort/ es ist ein ding/ des
niemands emperen kan. Die Bawerin
hette nün ihr ding außgericht/ vnd
saget zū ihm: Ja/ lieber Mann/ ich mag
sein nün wol emperen/ hast du einen
lust darzū/ ich will dir ihn schencken/
nimm ihn mit dir/ hebe ihn wol auff/ stoss
ihn inn den büsen/ vnd lebe wol dar
mit/ meinenthalben sol dir kein eintrag
beschehen. Aber der Reytter wolt
des dreck's nicht/ vnd rytte
darvon/ hett sein ant
wort empfangen.

Von

Die Garten
Von einem Bawren der
dem Amptmann ein ant-
wort gab.

Es was auch ein Bawer / der
satze sich auff ein Acker / zoh die
hosen ab vor jedermann / vnd las-
chet mit dem hinderen theil. Das sahe
der Amptmann / gieng zu ihm / vnd
sprach: Du grober Klotz / was scheiffest
du da also öffentlich? du möchtest doch
etwan hinder einen Baum sitzen / scheis-
mest du dich nicht vor den Leuten? Der
Bawer gabe ihm auch nicht viel guter
wort / sprach: Was hastu mit meinem
dreck zu schaffen / gefellt er dir nicht / so
hofier du dir ein anderen. Ich sihe wol/
es kan keiner weder Kleinen noch gros-
sen dreck hofieren / du wilt an allen or-
ten zum ersten deine naß in einen jeden
stossen. Der Amptmann was bezalet/
schweig still / vnd wartet seines
ampts / vnd nam sich auch
fürhin keines dreckes
mehr an.

Von

Von einer Frawen die
gern ein wackern Esel
gehabt hett.

D Brumpt gienge ein gärtner
in in jren krautgarten grasen vor
dem flecken / sie sang vnd was frö-
lich. Ein Reuter der vngesehr für reyt/
grüßt sie / vnd saget: Liebe Fraw ihr
seit gar frölich / ich meyn ihr seit hin-
nach ein Braut gewesen? Die Fraw
saget: Ich weyß nicht lieber Mann /
wirdt eins also frölich / wenn eins eine
Braut ist? Ja / saget der Reutter / es ist
also. Darauff die Fraw im geantwort:
Ey so bitt ich euch freundlich / macht
mir mein Esel da auch zu einer Braut/
er ist als treg / sieht als vbel / vnd hencft
den kopff gar auff ein eck / als wolte er
marter schwern / ob er doch lustiger vnd
frölicher würde / ich will euch gern dar-
von lohnen. Das thû der Teuffel / sagte
der Reuter / der Esel muß meinet hal-
ben ein Jungfraw erstorben / sonst habt
ir mir / liebe fraw / recht geantwort. Ist
damit dauon geritten. **M** Ein

Die Garten

Ein gar alter Mann nam
me ein junge Tochter zu
der Ehe.

D B Colmar wonet ein Wittwer/
Ein reicher alter Mann / der war be
vmb ein schöne junge tochter / vnn
da er werben wolt / ließ er ihm das haar
vber den kamm abschneiden / vnn
sich glatt buzen vnn scheren / trüg ein
Seidin heublin vnder dem Bareth / al
so das die Jungfrau das grawe haar
nicht sehen / noch warnennen mochte.
Sie ward ihm geben / die hochzeit war
de gehalten. Etwann vber 14. Tag /
da fiengen ihm die grawen haar wider
an herfür zu stechen. Darnach eins mor
gens fiel ihm die haub im beth ab / da
sah sie / die liebe Jungfrau / was er für
weisser stangen auff dem kopff gehabt.
Sie erschrack / war ganz vnn gar leya
dig / klagt heimlich ihr leiden / mit seuff
zen vnn weynen. Der alte Chremes
vermercket wol das der Frau nicht
recht was / er fraget sie ein mal oder et
lich /

lich/was jr doch anleg/das sie also herrlich
 seuffzet? sie wolt es ihm aber nicht
 sagen. Zu nacht fraget er sie ein mal im
 beth/was jr were/ ob sie die mägdt oder
 knecht erzürnet hetten/ oder ob jr sonst
 etwas manglete? Sie sprach zu ihm:
 Ich weyß nichts das mir fehlet / weder
 das ich mich beellende / das ich meine
 junge Tag so vbel angeleget habe / ich
 hab nicht gewußt/ das ihr also ein alter
 grawer Mann seit / biß jezunder so ich
 ewren kopff ansehe / Ach was haben
 mich meine Freundt gezigen / das sie
 mich also vnzeitig in das ellend geschicket
 haben. Ey liebe tochter sprach der
 alte Mann / laß dich das nicht bekümmern
 du hast essen vnd trincken/schöne
 vnd köstliche kleyder / knecht vnd
 mägdt/ gold vnd gelt/ auch alles reichthums
 gnüg / was mangleet dir sonst? Das solten
 ihr wol gedencen/saget die frau/woz mir
 mangleet. Wolan ich mercke es wol/sprach
 der alt herr: Liebe tochter/laß den kummer
 farn/weystu nicht das ein grawer schimmel
 eben so wol zeuget/als ein roter fuchs. Die
 frau streich

M ij die

Die Garten

die hand auff jr brust/ biß für den bauch
hinab / vnnnd sprach: Ja / aber auff der
strassen nit / dann da sind gräben / vnnnd
gefehrliche löcher / das man eins sattel
steiffen zugs wol vonn nöten ist / dassel
big kan ein roter junger Fuchs vil baß /
denn ein alter grawer schimel außrich
ten. Der fromb alt Her: was gefangen /
kondt sich leyder nicht weiter verant
worten / die warheit was ihm gesaget.
Ich glaub das es freylich ein Fürman
auff der strassen and thüt / wenn man
sein alten grawen schimel / ein jungen
roten fuchsen fürs spannen muß / es solte
ein vngleich ziehens geben.

Von einer Golt Schmidin

zu Augspurg vnd einem jun
gen Edelmann / wie sie ihm
ein güldin ketten ab ero
bület / vnnnd wider
gabe.

Auff dem Reichstag zu Aug
spurg / was ein Edelmann / der des
Keyfers

Reysers hof nach zohe/in einer schönen
grossen herberg/der hett 4. oder 5. pfer
de/wenn er wolte spacieren reytten / so
saß er im hof auff / vnnnd rannt für die
thür/warff das Ross einmal oder etlich
herumb. Es was ein hübscher gerader
Edelmann / vnnnd hette ein schöne güld
dine Ketten am halß. Nun neben der
herberg/ ein Golt Schmidt ein Reicher
Burger saß/der hette ein schönes weib/
vnnnd wenn der Edelmann also für das
hauß rannt/machet gute bößlin/so la
ge des Golt Schmidts Fraw am fenster/
sprach: Ich wolt das ich mit dem Edel
mann solte ein par Leylachen zerrei
sen. Das höret der Edelmann/der sprac
he / da wolte ich mein güldine Ketten
vmbgeben / das vermercket die Fraw.
Als nun vber drey oder vier Tag / ihr
Mann nicht daheymen was / ließ sie
den Edelmann beschicken/sprach: Junc
her: sind ihr noch der wort / die ihr das
andermal geredt haben/ingedenck? Ja
fraw/sprach der Edelmann/damit fü
ret sie ihn in ein besonder gemach / zohe
sich auß/ biß auff das hembdt / sprach /

III iij Junc

Die Garten

Juncfherz jr wißt wol warumb es zū
thün ist. Der Edelmann sprach / ja es ist
vmb die Kettē zūthün / zohe sie von dem
halß / gab sie der frawen. Sie beschloß
die Ketten behend in ein trog / auff ihre
Kleyder / wolan die zwey tanzten die
nacht den Danheuser. Morgends frū /
der Edelmann ward außgelassen / was
trawrig vmb sein Ketten. Sein Knecht
sahē / das der Juncfherz trawrig was /
sprach: Juncfherz woz leit euch an? Der
Edelmann sprach / mein anliegen kan
ich niemands klagē. Der Knecht sprach:
Ky Juncfherz es ist allwegen gewesen /
wenn einer bekümmert ist / das er sol-
ches seinen gūten freunden klaget vnd
offenbaret / Tūn bin ich ewer diener /
ich wil mein haut dran strecken / es muß
euch geholffen werden. Der Juncfherz
erzelet dem Knecht / wie es ihm mit der
Goldschmidin vnnnd der güldin Ketten
gangen seye. Der Knecht sprach dem
ist wol zū thün / Die Fraw hat vnns
zūm nechsten ein Mürselstein gelihen /
da ein Gaul franc war / etwas darinn
zū stossen / den wil ich jr wider bringen
lasset

lasset mich machen/ ewer Kettē sol euch
wider werden. Am andern tag zū dem
imbis/ als der Goldschmidt/ vnnnd seine
fraw/ zū tisch saßen/ klopffet der knecht
an der thür/ ward eingelassen/ stund für
den tisch/ vnnnd sprach: Herz da schicket
euch mein Juncfer dē mürselstein / dan
cket euch sehr/ vnd begert die güldin Ket
ten/ die er ewer frawen dafür zū pfand
hat gelassen. Der Goldschmidt warde
zornig vber die fraw/ sprach: Warumb
sie vmb ein so klein ding/ also ein köst
lich pfandte nem? Die fraw sprach: Herz
ich hab kein Kettē empfangen. Sprach
der herz/ nū hörstu wol/ woz der knecht sa
get. Die fraw lauchnet wie ein mörder/
aber der knecht sprach: Zū warzeichen/
legt sie die Ketten in ein trog vnden am
beth auff die Kleyder. Der Herz warde
zornig/ namme die schlüssel/ schloß den
trog auff/ fand die Ketten/ vnnnd gab sie
dem knecht/ der name sie / gienge seine
straas. Die fraw gienge dem Knecht
nach/ vñ sprach/ sag deinem Juncfern/
er muß mir zūm nechsten nimmermehr/
in meinem Mürselstein stossen / ich will

M iij ihms

Die Garten

ihm auch kein häselin mehr leihen / das
er darinn kochen soll / vnd solte er hun-
gers sterben / wie ers gewölt vnnnd ihm
gefallen hat / habe ich ihm geschir: ge-
lihen / das hat er mir gelöschert vnd zer-
stossen / nün müß ich die stück mir selbs
behalten. Der Knecht gab dem Junc-
herin die Ketten / der ryth hinweg mit
frewden / vnnnd warend das par Leyn-
lachen auch zerrissen.

Ein Schatzgraber vermen-
net er hette ein Schatz fun-
den / da hatte er das
Beth voll geho-
siet.

In Schatzgraber was zu Rü-
renberg / dem Traumet auff eine
nacht / wie in der Teuffel auff ein
Acker fñrt / da solt er graben / er würd ein-
nen grossen Schatz von gold finden. Er
grüb inn / vnnnd fand den Schatz. Der
Teuffel saget zu ihm: Es wirdt sich je-
zunder nit gebüren / das du den Schatz
hinweg

hinweg nemmest / sondern zeichne das
ort vnd den plag recht wol / das er von
dir allein vnnnd sonst niemands bekant
sey. Der Scharzgraber fraget wie ers
zeichnen solt? Der Teuffel sagt: Scheiß
darzū einen grossen hauffen / so wirt nie
mands vermeynen / das gold da begrab
ben oder verborgen lig / auch wirt disen
handel gar niemands erfahren / dann du
allein. Er bewilligts / hosierte ein gros
sen dreck / was er in seinem leib vermo
chte zū dem Scharz. So bald als er er
wachet / befand er / das er das beth voll
geschissen hette / ihm was der Scharz
vnnnd das gelt inn dreck gefallen / vnnnd
lag im Senff biß vber die ohren. Er
stund auff / wüschet sich / vnnnd stancke
wie ein widhopff. Wie er aber seinen
hüt also finsterlich auffsetzen wil / so ha
ben jm die Katzen darein geschissen / vnd
darzū voll gebrunzt. Er satz ihn auff /
wüste nichts darumb / so lauffet jm der
dreck vnnnd Katzensych vber den kopff
ab / durch den bart vnnnd allenthalben /
ward also vnden vnnnd oben / inwendig
vnd außwendig / voll dreck's vnd Katzen
sych /

Die Garten

seych / darzu was ihm sein güldener
traume inn dreck verwandelt wor-
den / den gefundenen Schatz auch mit
dem arß versiglet.

Ein Teutscher Edelmann
macht ein Welschen Cardi-
nal lufft am Tisch / auff sein
weiß vnd der Teutsch-
en monier.

D Rom was ein fenster / dicker /
auffgeblasener Cardinal / der wolte
im Augusten / so die Sonn am heys-
festen scheint / zu imbis essen. Sein hof-
gefind was aller auff dem gejagt / also
das er niemands hette / der im lufft oder
windt vor dem tisch machte. Ohnge-
fährlich stund ein langknecht / ein teut-
scher Edelmann da / der was mit an-
deren hinein ghen Hof gangen / (wela-
cher ohn das den Welschen in sondera-
heit / mit ihrem Pomp vnnnd Pracht
feind was.) Der Cardinal liesse ihm
sagen / er solte ihm Lufft vnnnd Wind
vor dem

vor dem tisch machen. Dieweil er aber nicht des Cardinals Diener was / sonder frey sein gelt verzehret / sprach er: Er kōndte nichts darmit / wüßte auch nicht / wie es der Cardinal haben wolt. Der Cardinal ließ jm anzeigen / er solte es auff sein weiß vnd auff güt Teutsch machē / wie es jm gefiel / so wer es recht. Wolan saget der Edelmann: Ja auff Teutsch kan ichs wol / das es jederman mit der nase vernemen müß. Man bracht jm ein flabel / oder muckēwadel / den wolt er nit / sagt: Ich kan wol luffte oder wind on ein flabel machen. Gleich bald hebt er auff ein bein / vnnnd ließ ein grossen furtz. Hebt das ander bein auch auff / ließ noch viel ein hellern vnd sterckeren vor dem essen / es solte einer ein Esel daran gebunden haben / namme sich nichts an vnnnd gieng hinweg / saget das were seine weiß vnnnd auff güt Teutsch ein luffte gemacht. Jetzt wölte er in seine Herberg gehen / wenn der luffte vergieng / solte man es ihme anzeigen / so wolte er kommen vnnnd wider ein andren machen / der stercker sein

Die Garten

sein müste dann der gewesen were. Die
umbstender lachten/sagte auff Welch
zusammen: Es wer ein pestilenzischer
böser gefälschter lufft (dann er stancfe
vnbillich vbel.) Aber der Cardinal ließ
ihn nicht mehr berüffen / das er jm auff
Teutsch monier/ vnd auff sein weiß/ sol
te vor dem Tisch / windt oder lufft ma
chen/er hette sonst stettigs die naß ver
heben müssen.

Von einer frawen / die wol
te den kopff decken/vnnd ließ
ir in das hinder gewölb
vnd vorder fenster
lin sehen.

Ewas ein fraw die hette den
erbgrindt lang gehabt/ das ir die
haub was gezuckt worden/ vnnd
der kopff blüt vnd kal. Einßmals ward
sie vonn ihrer Nachbawrin eilends be
rüffen/ zu ihr zu kommen. Sie hett aber
zu allem glück keinen schleyer auff / ge
dacht auch nicht / das sie einen auffge
thon

thon hette. Als bald sie so eilends vnn
blutt zur thüren außlaufft / so schilt sie
ein ander Frau / sprach: Warumb sie
den kopff nicht deckte? Die gute Frau
erschracke / hatte nicht gedacht das sie
kein schleyer auff hette / Will bald den
rock hinden auffheben / vnn vber den
kopff schlagen / so erwüschet sie leyder
das hembd damit / vnn schlecht den
rock sampt dem hembd alles vber den
kopff / das man ihr das gewölb sampt
dem keller sahe. Sie erschracke noch vber
ler / wil fluck's zum hauß einlauffen / vnd
straucht / stürzt auff hend vnd fuß / als
da müßt jedermann erst das jenig sehen /
das vorhin noch verborgen gewesen.
Jederman lacht des selzamē gesichts /
vnn wunderbarlichen sternens. Sie
wüschet gleich auff / vnn ins hauß hi
nein / thet ein schleyer auff / gienge wie
der zu der nachbawrin / vnd richtet erst
ihr geschafft auß. Es ist dannoch den
Weibern ein sorg darauff zu haben / dz
sie nit dergleichen mißgriff thun / wenn
sie den kopff mit den rocken decken wöl
len / vnd erwüschent die hembder damit /
legten

Die Garten

legten dann den arß bloß vnd nackend /
darnon dann jederman ein grausamen
grossen schrecken empfacht.

Vil Kauffleut wündsch
ten mancherley Reich
thumb vonn Herr
schafft.

Eliche vil Kauffleut stunden
bey einander zu Türenburg auff
dem Herrenmarckt / hetten man
cher hand anschleg vnd wündschunge /
Einer wolt er were ein Keyser. Der an
der wündscht dz er ein Papst wer. Der
dritt wündscht ihm ein Fürst zú sein. Der
vierdt also. Der fünfft diß. Der sechst dz.
So kã die frag an einen jungen der was
von Presla auß der Schlesing / der sa
get: Wenn ich wündschen solt / vnd das
es war würde / so wolt ich wündschen /
das ich ein pfebe oder ein Melon were.
Die andern fragten / was er da für ein
nãrrischen wundsch gethan hett / wes
halben er eben das wündschen wolte.
Daruub /

Darumb/das mir / sprach er / jederman
für den arß oder das hindertheil müße
schmecken. Es ist der brauch / wenn
man Melonen oder pfeben kauft /
so schmecket man zu vorderst allwegen
an das hindertheil / da findt man ob sie
faul oder frisch sindt. Darumb hat der
Jung kauftinā gewündschet eine zu sein
das er vil schmecker hett / gegen dem ge-
welb zu.

Von einem Prediger der
Sanct Christoffel so hoch
lobete.

EN Questionierer zohe mit
S. Christoffels heiligthumb / von
dorff zu dorff / die Bawren zu be-
scheissen / Sagt / er hette ein Reiß vonn
dē baum den S. Christoffel in der hand
gehabt / auch ein forderen seckel vonn
seiner Täschen / vnnnd das lid vonn des
Brüderlins Lucern / das ihm gezündt
hett / Vnd wenn er prediget / so lobt er S.
Christoffel vber alle Heiligen GOrtes /
Darumb

Die Garten

Darumb das er Gott auff seinen achseln getragen/fraget auch dickermalen auff der Cantzel/ sprach: Ach lieber/sage mir einer / wie möchte doch jemand so heilig gewesen sein/ als S. Christoffel/der so oft vnnd dick Christum getragen hat? Wer ist doch je also selig gewesen / dann allein S. Christoffel/ Ja/ niemand auff Erdrich? Das triebe er dann so lang / das jedermann verdrüsslich ward zu zühören. Einmal macht er es wider so lang/lobet vnnd rühmpt S. Christoffel für vnd für / das er Christum hette getragen / vnnd die genade were niemandes auff Erdrich nie begaget. Da was auch ein Speyuogel an der Predig/ der mocht nit mehr schweigen/ sienge an vnd sprach: Lieber Herz was balgen ihr so fast / diesen morgen mit S. Christoffel/meynet jr nicht / das man jr mehr findet/ dann eben S. Christoffel/die auch Christum getragen haben/ Ja wol anders/dann S. Christoffel. Der Questionierer sprach/ das were nit möglich. Darauff der Bawer sprach/der Esel/ den Joseph hett/ ist seliger dann

ger dann S. Christoffel / der hat Christus vnnnd seine Mütter darzü/inn Egypten vnnnd wider herauß getragen / Dem hat Gott mehr gnad bewisen / daß S. Christoffel der in nür vber das wasser oder bach getragen / hette er ihn als oft hin vnnnd wider getetscht / als ihr heut daruon geschwezt / so wer es lang zeit gewesen / das er nün zu morgens aß/er solte doch gar nahe verschwecht sein. Der Questionierer sahe/ das er die raspelsupp wol verdienet hette/ ließ die Leuth heyin ziehen / vnd machet er das ampt auß/ mercket wol das er nicht viel platz bey den Bawren mehr hett/ Darumb zohe er mit seinem zerissenen Heiligthumb in ein ander Dorff.

Von einer vngetrewen Schwieger.

Dieterichs Bern / name ein Junger Gesell ein Frauen / ein hübsche Jungfraw. Sie hielt sich so freuntlich vnd holdselig mit einander /

Die Garten

Der/ das er ganz bleich ward / vnnnd die
farb gar verlör / die hosen waren ihm
auch zu weit worden. Das mercket sein
Mütter/ vnnnd forcht/ er möchte etwan
in ein Kranckheit fallen/ das er der frau
en also nahe was/ befahle ihm ein han-
del zu Teruis außzürichten. Als er aber
etwan zehen wochen außgewesen/ vnd
die jungfrau seines langen außsein/ vn-
gedultig was/ so sieht sie ein mal zween
spatzen mit einander scherzen / als die
so offte auff vnnnd ab sassen/ bedachte sie
ihr ellend/ vnnnd saget zu den Spätzlein:
O lieben Spätzlin ihr erbarmen mich/
das ihr so öffentlich da sitzt/ vnd gut le-
ben habt/ fliehet etwan vnder ein dach/
wo mein Schwieger kam/ vnd euch also
sehe machen/ so würde sie euch auch gen
Teruis verschicken/ das ihr ein viertheil
Jar nicht wider zusamment kommen kön-
ten / sie hat mir es auch thon mit meis-
nem lieben Hauswürt/ vnnnd er ist noch
nicht wider kommen. Demnach als
die Spätzlin feyerabendt hetten / flo-
gen sie hinweg / GOTT geb was das
narrische

narrische weib gesagt hette/oder wenn
jr Mann wider kām.

Von vergleichung der straff
des Todtschlags zwischen den
Genuesern vnnnd Gries
chen.

Die Genueser haben ein groß
ie Stadt bey Constantinopellia
gen/ die heysset Pera / darinnen
einsmals die Kaufleut mit den Gries
chen vneins wurden / schlugen einan
der/das etliche Todt liegen blieben/ et
liche hart verwundet waren. Die sache
kame für den Keyser von Griechen/der
ließ die seinen fahen/ vnd jnen zu straf
fe die Bärt abscheren (welches dazū
mal ein grosse schandt vnd straaff bey
jn war.) Es verdross den Stadthalter
von Genua/der dazūmal zu Pera was/
das die Griechen jnen zu verdrieß / als
so spöttlich waren gestraffet worden.
Erlaubet der erschlagenen Genueser
N h freund.

Die Garten

freundschaft/wo sie die Griechen/an-
kommen möchten / so solten sie sich mit
der faust rechen. Das geschah / vnnnd
schlugen viel Griechen inn kurzer zeit
zū todt. Es kame ein grosse klag vonn
dem Keyser von Griechen/ an dē Land
vogt vonn Pera der erschlagenen hal-
ben. Er ließ die todtschleger greiffen/
entbotte dem Keyser / er wolte sie nach
ihrem verdienst straaffen / der Keyser
was zū frieden. Der tag ward gestelle/
Viel gerüst vnnnd galgen wurden auff-
gericht / alles Volck lieffe herzū / wolte
sehen die todtschleger richten / vnd wie
man mit jnen umbgehen würde / dann
da waren Zencfer/ Pfaffen/ vnd jeder-
mann so zū dem Gericht gehöret / zū-
gegen/ vnnnd die leytern stunden an den
galgen angebunden. Es war ein grau-
sam vnnnd ernstliches wesen. Die ge-
fangnen wurden daher geführet / man
trüge jhnen die Creutz vor/ man tröstet
sie / vnd bettet jhnen vor. Also ließ der
Stadthalter ein stille durch den Wei-
bel außschreyen/hüb an / vnd sagt: Ihr
lieben Burger vonn Pera/ ihr habt ge-
hört/

hört / wie die Griechen zu Constanti-
nopol / welche die vnsern newlich Todt
geschlagen / gantz vnd gar spöttlich ge-
straffet worden sind / Nemlich / das ihn
der Keyser die Bärt hat lassen abschee-
ren / vnnnd sie darmit ledig gelassen. Jes-
zunder aber / begeret er / ich soll mit dies-
sen todtschlegern zum strengsten vnnnd
mit grausamster peen / sie zu straffen /
fürfaren. So kan ich (bey meinem Ri-
chterlichen ampt) nichts anders in mir
befinden / dann das alle gleichmessige
händel auch mit gleichförmiger peen /
compensiert vnd verglichen sollen wer-
den. Nun dieweil ich denn dem Keyser
zugesaget hab / die vbeltheter zu straff-
en / das will ich gänglich thun. Vnnnd
dieweil er der Keyser / ihrer Köpff vnnnd
lebens verschonet / vnd die peen mit ab-
sicherung der bärten fürgenommen / so
wil mir gebüren / das die straff auch nit
anders gehalten werden soll. Darumb
er kenn ich / das sie der Nachrichter ne-
men / vnd auff den bauch auff ein tisch
legen / vnnnd ihnen allen nach einander
das haar im arßloch / vnnnd vmb die

in der

Die Garten

kerb / sauber vnnnd glatt herausscher ab-
scheren solle / auff das wenn die Grie-
chen solche peen vnd straff nicht glau-
ben wollen / vnnnd die malzeichen zu se-
hen begeren / das sie als dann den Ges-
nuesern oder Peranern / on alle jrrung
vnnnd verhindernuß des verwirreten
haars / mitten inn das gewölß gucken
vnd sehen könten / damit sie spüren mö-
chten / das diese ergangne todtschleg zu
beyden theilen gleichmessig gestraffet
weren. So bald der Nachrichter die v-
beltheter auff die bänck legt / vnd sie her-
umbher keret / will anfahen zu scherem /
ist alles volck hinweg gelauffen / haben
inen in ihre finstern schwarzen kerben
mit sehen mögen. Damit ist die absche-
rung der Bert / mit der bescherung des
haars im arßloch / gegen einander ver-
glichen worden.

Ein Wittfraw begert ein

alten Mann / doch das er

nicht schwach

were.

Es was

Es was ein andechtige Witt-
 frau zu Münchē im Beyerland/
 die sprach auff eine zeit zu ihrer
 nachbawrin: Ach liebe nachbawrin/ Es
 wil mir (müß ich euch klagen) ohne ein
 haußwürt hauß zu halten / schwer vnd
 verdrossen sein/ Ich laß bleiben/ das ich
 nicht viel mehr nach diesem irdischen
 wesen frage/ oder deren gleichen sorgen
 nachgedencke/ noch wolte ich aber gern
 einen gūten tugentlichen Mann ha-
 ben / doch der eines gestandnen Alters/
 vnd des schñöden narrenwercks müß-
 sig vnd rüwig were/ allein vnd vil mehr
 begerte ich einen zu auffenthalt meines
 lebens / dann andere vrsachen halben /
 wie ihr gedencen möchten / dann ich
 ohne das nūn mehr das heil meiner see-
 len / weder diß gauckelwerck / betra-
 chten sol. Die nachbawrin hett ein mit-
 leiden mit jr / sagt: sie wolt achtung ha-
 ben / vnd ihr vmb ein solchen Mann zu-
 trachten / allen müglichen vleiß fürwen-
 den. Des anderen tags kam sie wider zu
 der Wittwe / zeigt jr an / das sie jr ein sol-
 chen man bekommen / welcher all dise tu-
 genden /

Die Garten

genden/ Ein ehrlichs alter/ vnd freundliche zucht wie sie selbs begerte/ an ihm hette/ vnnnd nemlich zum aller fürnemlichsten/ dessen sie auch gerne entladen sein wolt/ des kleinen handwercks (wie sie angezeigt) des wurde sie bey dem Mann ganz vnd gar frey sein/ dann er hette keinen werckzeug mehr/ darmit man pflegete die Kinder zu schnitzlen/ es were im alles außgeschnitten/ sie sollte nur rüwig vnnnd on alle sorg sein. Da die Wittwen das höret/ das der Mann kein gözen Jäckel mehr hette/ da speyet sie vber ihn auß/ vnnnd saget: Ey so nemme in der leibhafftige Teuffel/ was sollte ich mit mehr Kappen inn meinem hauß thun/ Ich hab ihr ohn das zu vil/ das ich ihr alle mal einen würge/ vnnnd esse: Ich höre wol/ wenn wir etwann vneins vnd stössig vnder einander würden (wiewol man inn der Ehe friedlich leben soll) wer wolte uns aber vereinigen/ vnnnd den Frieden zwischen vns machen/ wenn der Friedmacher nicht daheymen/ oder sonst Kranck vnnnd schwach were? Neyn/ neyn/ liebe nachbawrin/

bewrin/kompt mir mit dem Mann inn
das hauß nicht / jr dörfst mir auch vmb
keinen mehr reden. Ihr wisset freylich
selber wol / das kein alts rostigs Capel-
lin niergends ist / das man züm jar ein
mal / zwey oder drey nicht wol besingt/
also das die Kirchweyhe darinn gehal-
ten wirdt / dasselbig lasset mir auch ges-
deyen. Die Nachbawrin saget: Ja ich
kan gedencfen / wenn euch da weh ist/
so kan ich euch nicht helffen / ihr müßt
euch ein andern fragen lassen / da euch
beißt / vnd der euch ewere Capell nach
notturfft besingt / gienge darmit vonn
ihr.

Ein Bischoff aß Reb-
hüner an ein Freytag
für Fisch.

In Hispania der Stadt Gora-
duba / da was ein Bischoff / der
ritt auff ein Freytag vber feld /
kehret inn ein herberg ein. Der Würt-
hette keine Fisch / nichts anders dann
N v vögel

Die Garten

Vögel vnnnd Rebhüner. Der Bischoff
hieß ihm zwey zürichten / braten vnnnd
zum essen fürtragen. Es nam seine kne-
chte wunder / was jr Herz damit vermey-
net / das er am Freytag wolte Käbhü-
ner essen / so er sonst an einem Sontag
nichts darnach fraget / auch besunder-
lich dergleichen speisen / an solchen ta-
gen verbotten weren. Sie sagten ihm
es / ob er nicht gedechte / das es Freytag
were / vnd dieses Rebhüner / vnd nicht
Visch weren. Ja sprach der Bischoff:
Ich will sie für Visch essen / vnnnd nicht
für Fleisch. Sie verwunderten sich der
reden noch mehr. Der Bischoff saget
zu jnen: Ihr Narren / wißt jr nicht das
ich ein Priester bin / welchs ist mehr / auß
brot den Leychnam Christi zu verwan-
deln / oder auß Rebhünern Visch zu ma-
chen? Also macht er ein Creutz darüber /
vnnnd gebotte / das die Rebhüner vom
stundan solten Visch sein / vnd sagt: Al-
so starck sind meine wort / das dise Reb-
hüner jezund gute Visch sind / wiewol
mans aber nicht sieht / so muß man es
glauben / dann der glaub macht vns sel-
lig /

lig/vnnd behelt auch die welt. Behielte
auch die zween Visch bey jm / vnd aß sie
alle beyd / gab sein gesind geschorn rü-
ben/wie der Welschen brauch ist. Also
was auch vorzeiten Brüder spectly/der
aß ein Capaunen für ein zeißlin / saget:
Es neme ihn wunder / das ihn auff das
Klein vöglin so bald dürstet.

Von einem Bischoff/der vier füß hett.

DER Erzbischoff zu Cölln /
der hette einen Narin bey ihm/
der jm sehr lieb was / er handelt
was er wolt / so müßt der nar zu gegen
sein / auch zu nacht vnden an sein bett
schlaaffen. Einßmals hett er ein Tun-
nen bescheiden lassen / Die lage an des
Bischoffs beth. Da nün der heri schlaf-
fen lage / da greyff der Nar vnden an
beth vnder die deck / wolt sehen / ob dem
Herren die füß warm weren. Er greyff
ein / sagt: Ist der füß dein? Der Bischoff
saget: Ja. Er greyff noch einen / fraget
ob der

Die Garten

ob der auch sein wer? Der Bischoff sag-
get: Ja. Er greiff den drittē vnd vierda-
ten fuß auch / vnd fraget zū jedem fuß /
ob er sein sey? Der Bischoff saget all-
wegen ja. So stehet der Narr eilends
auff / springt an Laden / vnnnd schreyet
vmb sich / man soll thür vnnnd thor wol
verhüten / der Bischoff seye vierfüßig
worden / er werde ihnen sonst entlauf-
fen / im beth seyen ihm zween fuß noch
mehr gewachsen / weder er gehabt / da
er schlaaffen gangen sey. Also hat man
des Bischoffs handel innen worden /
Narren vnd Kind / sagen gern die war-
heit. Es ist nicht allezeit güt / der Nar-
ren sich zū viel annemmen oder beküm-
mern / sie lassen gewonlich ein die letzte.

Von Sanct Franciscen

Bruch / wie die auff einer
Frawen beth funden
worden.

DV Bononia was ein Reicher
Burger / der hette ein schön hübsch
weib /

weib/welche zu ein BarfüßerMönch/
den sie zu einem Beichtvatter angeno-
men/offtermalen ihre Sünde zu beych-
ten vnnnd klagen gienge. Der Mönch
ward gegen ihr inn Liebe entzündet/res-
det also lang mit ihr/ das sie zuletzt iren
willen(lauter vmb Gottes willen)dar-
ein gab/das dem gäten Brüder geholfs-
fen werden mocht. Nun wolte sich die
sach gar niergend rincklen / sondern die
Frauw machet sich schwerlich krank/
batt den Mann / das er ihr / den ihren
Beichtvatter holt/ (den Mönch meyn-
ende) sie wolte gern Beychten. Der
Mann thetes. Der Mönch kam/jeder-
man trat ab / der Mönch hörte sie bey-
chte/vnd Examiniert sie oft nach not-
turfft. Es wolte dem Mann zu hertzen
gehen das lang beycht hören / gedacht/
der Mönch würde sie villeicht zu tieff
fragen. Der Mann raspelt an der thür/
vnnnd will hinein. Dem Mönch warde
schier die zeit der Absolution zu kurz
worden/müßte entlauffen / vnnnd hette
sein bruch auff dem beth liegend / ver-
gessen. So bald der Mann die bruch
auff

Die Garten

auff dem beth befindet/ schreyt vnd flü-
chet er/ sagt: Der Mönch hette ihm sein
Francß Weib in aller schwachheit nöti-
gen wollen/ vnd zeyget jedermann die
brüch/ laufft ins Kloster/ saget es den
andern Mönchen/ drowet damit dem
Beichtvatter/ er wölte in zu todt schla-
gen. Ein alter Mönch der sagt: Ober
auch die Brüch angerürt hett? Ja/ sagt
der Mann/ ich hett ein lust gehabt/ das
ich sie verbrennt hette. Das solt du bey
deim leben nicht thun/ du hettest nicht
güts gnüg/ du soltest sie auch nicht an-
gerürt haben/ dann die Brüch ist heilig/
vnd ein besunder heilighumb zu dem
Kranken Frawen. Der gut Herz/ dem
du da schiltest/ vnd im den tod drowest/
der hat sie mit vnserem willen mit ihm
genommen/ die fraw damit zübestrei-
chen/ das sie gesundt werde/ so hast du
ihn verjagt/ vnd ihm vnrecht gethan/
dann das ist vnseres heiligen Vatters
Sanct Franciscen Brüch/ die müssen
wir mit einer grossen Process vnd Sol-
lennitet widerholen. Darumb gehe du
heym/ eillends bereyt dein hauß/ vnd
zünds

zünde Kerzen an / wenn wir kommen /
 das alle ding gerüstet seyen. Der gute
 Mann hat den zorn fallen lassen / gieng
 heym / ließ zurüsten / legte die Bruch
 wider zu der Frawen auff das beth / sa-
 get ihr / das es Sanct Franciscen bruch
 were / vnnnd er hett es nicht recht erst-
 mals verstanden. Der alt Münch brach
 te dem Conuent die außrede für / es ges-
 fiel ihn allen wol. Sie zogen mit creutz /
 Lanen vnnnd ganzer Process in der Ordo-
 nung zu des Burgers hauß / wolten die
 heilige Sanct Franciscen bruch holen /
 vnnnd wider in das Kloster tragen / em-
 pfahen sie mit grosser andacht / vnnnd
 legten sie auff ein seyden küssen / wie ein
 heiliges Heiligthumb / tragends hoch
 entbor in den Händen / vnnnd gebends
 erstlich dem Haußherren / darnach der
 Francken Frawen / (sie wußt aber die
 krafft der Bruch baß / dann sie alle in
 Hauß) vnd allen denen / so inen begeg-
 netē mit grosser andacht zu küssen. Dem
 nach beleytē sie die heilig Sanct Fran-
 ciscen bruch / mit gesang vnnnd andern
 Ceremonien

Die Garten

Ceremonien/inn die Sacristey / zů dem
anderen Heyligthumb . Also hat der
Mann die brůch funden/dieselbige mit
andacht gekůst / vnnd ist die fraw der
Krankheit genesen. Dem Beichtvatter
darzů sein brůch wider worden/vnd als
le ding zů frieden gestellt gewesen.

Von einem Narren/den
wunderet das die Frawen
das wasser behalten
můchten.

En Mari was in des Marg-
graffen frawenzimmer / hieß Hāß
lin vonn Singen / der horet ein-
mals die Jungfrawen das wasser ab-
schlagen / vnd da es weidlich rauschet/
hůber an laut zů lachen / vnnd machte
das Creutz für sich. Eine fraget ihn/
vnd sagt: Henslin was lachstu so laut?
Wie ist es dir gangen? Bock's martel/
saget er: Soll aber ich nicht lachen / es
nimpt mich gar vnd ganz wunder / wie
ihr inn dem geschir / welches vnder sich
offen

offen stehet / das wasser behalten können / das habe ich an dem vnbillichen rauschen wol gehört / vnd wenn es mir mein leben gelten solt / so wißt ich nicht holzöpfel darinn zu behalten / das sie mir nicht alle herauß fielen. Die jungk-
frawen nammens für ein narrecht red an / wie sie dann ohne das wol an im gewont waren / vnd lachten dazu.

Von einem Buler / der
seinen bülen für den
arß küßt.

In Junger Student was zu
Ingelstadt / der gewann eins rei-
chen Herren Magdt vast lieb /
gieng tag vnd nacht für das hauß auff
vnd ab / schreib ihr brieflin / vnd gab ihr
auch andre waarzeichen seiner lieb / da-
mit er vermeinet / er were auch von ihr
lieb gehabt. Einßmals hört er sie näch-
licher weil herniden inn ihres Herren
hauß am wasserstein bey einem fenster
singen / vnnnd schüßlein wuschen. Der
Cuculus

Die Garten

Cuculus kame auch / stund außwendig
für das wasserstein loch / vnnnd saget: O
du hertzes lieb / ich bin dir so lang nach-
gangen / das ich gern etwas heymlich
mit dir geredet hette / wie du selbs ge-
dencken kanst / ich habe dir zu gefallen
viel gelts verthon / nün es hilfft sihe
ich wol alles nicht. So wil ich dich doch
ein ding bitten / beut mir deinen schö-
nen roten mund zu dem fenster herauf /
vnd laß mich dich nür einmal küssen / so
wil ich darnach vernügen haben vñ ab-
lassen. Wenn du darnach mein müßig
gehen wilt sagt die Magdt: so will ichs
thun / es müsse aber heymlich zugehen.
Der Mar: sagts jr zu. Sie was jm zu ge-
scheid / steig auff den wasserstein / hübe
sich hinden auff / bott ihm das gewölb
zu dem fenster hinauß. Da es also weiß
war / da meynt er nicht anders (dann es
was finster) es wer das angesicht / vnd
vor grosser lieb vnnnd einbrünstigkeit /
wüschet er herbey / vnnnd küßet sie ein-
mal oder zehen. Am letzten thet er einen
mißgriff / vnnnd was schier mit der nas-
sen inn die kerb gewüschet / vnnnd inn
denselb

denselbigen graben gefallen. Weil aber ohne das solches orth so einen geschmack hat/wie ein viol/da meynet er sie hette das maul auffgethon/vnd hette nicht ein gut kemmat/höret auff zu küssen/vnnd saget: Boz Erdrich da mercke ich erst/das du ein stinckenden Athem hast. Neyn/neyn/ Ich küsse dich nicht mehr/vnnd gienge heym/da gewann die Liebe auch ein ende. Dieser Magd arß w3 dazumal ein Heilthumb worden/der Student hett schier ein hal bestund daran geküßt vnd gelect.

Zween Studenten betrogen einen Scharwächter.

Zu Basel was ein Goldschmidt/
ein freyer Künstler/d hieß Urs Grafe/
was ein guter Studentē freund.
Der richt einmal zween Studenten an
d3 sie nächtlicher weil/am Kornmarckt
von sein hauß vber die gassen ein seyl/
das er in gab heimlich spannen solten/
Q. H. dem

Die Garteit

demnach Lerman anfahen / so würden
die Scharwächter darzü lauffen / da
würde einer ein hübsches fallens sehen.
Die Studenten folgten / es was ihnen
wol darmit / kamen auff ein nacht / rich-
teten mit hilff ihres Bübenvatters / die
seyl zu / nach aller handlung / auffrich-
tung / vnd irer wachtbestellung / gehen
sie an einem hauß heymlich her / so fin-
den sie ein Scharwächter an der wand
sitzen / der schlieff hart / vnnnd hette sein
backenetlin vnd hendtschüch von ihm
geleget. Die zween nemend das heube-
lin bald / tragens auff ein ort / scheissens
vnnnd bronzens voll / legends ihm still
vnnnd heymlich wider dar / gehen dem-
nach gegen der Lysen gassen zu / zuck-
en vonn leder / hand ein groß gebrecht /
schlagen zusamen. Die scharwächter
stuben von allen orten her zu / dem Lera-
man nach. Vnd als sie an dē Kornmarck
kamen / fielen sie vber die gespannten
seyl / Da lag ein hellē bart / da der mann /
da das backenetlin / da zween oder drey
auff einem hauffen. Vnnnd der Schar-
wächter so geschlaaffen / wüschet auch
auß

auff dem schlaaff / will sein baccanetlin
 fluck's auff setzen / vnnnd zů dem lerman
 lauffen / so ist's voll geschwizt / vnd stür
 zt den dreck vnnnd seych alles vber dem
 kopff ab (das was zů erbarmen.) Der
 Goldschmidt saß inn sein Kellerhalß /
 vnd hett die gespannten seyl bey ihm an
 besondern riemen / inn der hand. Dies
 weil sie sich wider zůsammen lassen / die
 hellenbarten vnnnd anders in der finstere
 suchten / zohe er die seyl zů ihm / vnnnd
 durch den Keller ins hauß auffhin / nam
 ein liecht / laufft hinauß vnd zündt den
 Scharwächtern / das sie ihr ding wider
 funden / damit kundt er auch sehen wer
 sie waren. Er stellt sich heßlich / sprach:
 Er were erst vom beth auffgestanden /
 vnnnd führet sie also auff dem ganzen
 Kornmarck vmb / vnnnd suchten die seyl /
 auch die / so es gethon hetten. Inn ders
 selbigen weilen / waren die Studenten /
 in des Goldschmidt's hauß / wider heym
 kommen. Da er das vermercket / name
 er vrlaub vonn den Scharwächtern /
 gieng heym / sie danckten ihm vleissig /
 das er so gůten ernst / mit jnen gebrauc
 W iß ches

Die Garten

chet hette / hetten sie die rechte warheit
gewußt / würden sich ohne zweyuel an-
ders gegen ihme gehalten / vnnnd den
armen Judas auff der borkirchen ihm
gesungen haben.

Von dreyen Studenten/ die ein dreck in der Milch finden.

Auff der Hohen Schül zu Erda
fort / waren drey Studenten / die
wolten einßmals im Sommer vor
der Stadt in dem kalten wasser baden /
Vnnnd auff einem Meyerhof daselbst /
der heyst der Prüel / hette der Bawer
allwegen ein grossen hafsen mit Milch /
vor dem fenster stehen / die er etwann
morgends / etwann abends gemolcken /
darauß er dann Buttern oder Käß ma-
chet / oder sunst zu seinem gesind im hof
brauchte. Derselbige hafsen mit Milch
ward jm etlich mal durch die drey Stu-
denten heymlich gestolen / vnd hinweg
getragen. Der bawer ward der sachen
innen

knien / das ihm die Studenten / imm
schein zu baden / die häfen mit Milch
hinweg trugen. Er name ein anderen
grossen neuen hasen / vnd hosierte er vñ
die frau drein / füllten in mit Milch zu /
vñnd stellten ihn wider für das fenster /
giengen davon. Vber ein weil schlichen
die Studenten herzu / namen ihn auch /
waren fro / das es so ein grosser hasen
war / vñnd voll Milch. Sie trügen ihn
heym / assen vnd trancken wol drey tag
an der Milch / vnd vonn dem dreck. Da
nñ die Milch auß was / so fallen zween
grosser Klumpen oder Klötz von dem bo-
den auß dem hasen. Es wunderet sie /
was dz für ein coagulirte materi we-
re. Der eine greysse mit einem finger
darein / so greysse er inn Dreck / gleich
von stundan gienge der rauch darvon /
was es für bysam war. Er greysset baß /
bescheisset die finger gar. So baldt sie
sahen / das sie wol drey Tage / von den
zweyen hauchholtern in der Milch ge-
truncken hetten / kame sie ein grawen
an / speyten vñnd kotzten alles das sie in
vier wochē hienor gessen hetten / sahen
O iij wol /

Die Garten

wol/das jnen die bon worden was/lies-
sen dem Bawren seine Milch fürter zu
frieden. Wer alle schleck versuchen wil/
der verbrennt auch zu zeiten das maul
gern.

Ein Pfaffenmagt thet
alle ding ehe sie es ge-
heysen ward.

DER Pfarrer zu Dunken-
heym/Herr Wilhelm geheysen/
hette ein Magdt/die also sorg-
sam was/so oft sie der Herr fraget/ob
auch das/oder dieses/beschehen were/
so sprach sie allzeit/es were lang hienor
außgericht. Auff ein zeit hett der Herr
auff sein Kirch weyhe/vil lieber gest/de-
nen rhümet er vnder anderen reden die
sorgsamkeit der Magdt. Sie aber die
Magdt/höret das in der Kuchendurch
das fenster so in die stuben gieng/name
auch waar was die Gest darzu sagten.
Einer vnder jnen sprach: Ich weyß et-
was/das fragend sie Herr Pfarrer/
das

Das weyß ich das es nicht geschehen ist/
 Fragend / ob sie ewern lündischen rock/
 der im summerhauß ligt / den ihr heut
 auff der Kirchweyh angehabt haben/
 nicht in das stendel mit wasser / das vor
 der thüren stehet / eingetruckt hab / was
 gelts / sie wirdt es nicht gethon haben.
 So bald die Magdt das hörte / lauffet
 sie behendt / nimpt denselbigen rock /
 trucket ihn in dasselbig bütlin mit was-
 ser / schweiget still / gehet in die kuchen/
 vnd nimpt sich nichts an / dann sie wu-
 ste wol das sie darumb würde von dem
 Herren gefragt werden. Ober ein weil
 rüfft ihr der Herz / sagt: Hastu auch mei-
 nen newen rock / der im Sommerhauß
 ligt / inn das bütlin mit wasser vor der
 thüren eingetruckt? Darauff die magd
 sagt: Vorz leychnam es ist vor einer gü-
 ten weil geschehen / er were nün schier
 bald zeit auß zürweschen / gehet hinauß
 vnd besehends selbs. Der pfarrherz sa-
 get: Ey du hast dir die Beul vnd Pestis-
 lenz außgericht / der Teuffel neme dich
 mit deiner behendigkeit / thü ein ding
 wenn man dichs heyßt / vnd thü es dar-

U v nach

Die Garten

nach das recht ist. Die gest die lachten/
der pfarrheri warde zornig / nimpt ein
teller / wirfft ihn nach der Magdt. Die
Magdt wendet sich / er fehlet / würffet
den teller durch den Ofen / zerbrache
wol drey oder vier Rachen / sie dräyet
sich auß / vnd entlieff. Das hieß den rock
recht eingetruckt. Der Ofen was zers
worffen / vnnnd der Rock aller naß vnnnd
verwüestet / die Gest lachten ihnen des
haders vnnnd der Magdt behendigteie
genüg. Aber der güt Herr rhümet her
nach seiner Magdt geschicklicheit nim
mer als hoch als vor / Dann sie was zu
viel geschickt vnnnd behendt inn ihrem
thün gewesen.

Ein Junge Klosterfraw ge
hub sich vbel / das ir das haar
an der Tochter wachse
sen wolt.

In dem Kloster Grauffthal
was vorzeiten ein Junge Jung
fraw einkomē / da sie profess hett
gethon /

gethon/wirdt sie der Eptissin geben/sie
in der zucht vnnd Klösterlichen wesen
zū informieren vnnd vnderweisen. Als
sie nūn anfieng zū ihren jaren kommen/
da hūb ihr das haar an dem Kuntgesal
an zū wachsen. Sie sahe es / erschrack/
vermeynet es were etwann ein sach/zū
einer künfftigen Kranckheit / sienge an
vnd gehūbe sich vbel / wolt es doch nie-
mandts offenbaren. Zūletzt warde sie
von der Eptissen bey der gehorsam ge-
zwungen/ihr anligen anzūzeigen. Sa-
get sie: Gnedige frauw / ich weys nicht
was mir für ein belz mit haar / vnden
an dem Bauch / zwischen den beynen
wechset/vnd sind die beyn vñ der bauch
glatt / vnd haben kein haar / ich fürcht
vbel/das es etwas böses bedeute. Die
Eptissin gab ihr antwort/ sprach: Laß
michs sehen. Sie hūb sich auff/ vnd zei-
gets ihr. Ja sagt sie: Du Narrin / lasset
du dich das also kümmern/ es ist ein ketz-
lein / vnnd ich habe selbs also ein ketz-
lein zwischen meinen beynen. Die Jung
wolts nit glauben / sie hett sie dan auch
gesehn. Sie hūb sich auch auff/ vñ zeigt
sie der

Die Garten

sie der jungen. Als sie die Katz gesehen/saget sie zu der Kptissin: Gnedige frauw/wie hat ewr Katz so ein groß weit maul? Liebe tochter sages die Kptissin: Sie hat jr tag so vil grosser ratzen erbissen/wenn dein Katz (als ich hoff) so vil ratzē mit der zeit erwürgē wirt/wie die mein/so wirt sie ein maul vberkömē meiner gleich. Die Junge Tunn was fro/das ihr die Katz nür am leben nicht schedlich was / vnd liesse also das haar fort an wachsen / was güter dinge / biß mitler zeit der bart jr auch geschoren ward.

Von nachtfertigen Geistern.

Als der Pfarren zu Langen
Denzlingen im Breyßgaw / da
saß ein Junger Herz vorzeiten /
was erst vnlang von Freyburg kom-
men / der machet kundtschafft mit ei-
nes Schumachers frauwen im Dorff.
Sie zwey beschlossen mit einander /
wenn er nachts kem/ vnd die thür auff-
gethon

gethon hett/ (dann er hatt ein schlüssel
dazü) so solt er ein groß wesen im hauß
machē / vñ frey zü jr in die kām̄er gehn/
die thür einmal/ drey od vier auffhün/
vnd wider züschlagen / so würde jeders
man meynen / es wer ein geist/ vnd sich



niemand in den betthen regen dörffen /
darmit weren sie zü frieden. Die sache
ward also beschlossen. Der fromme alt
schūmacher lag in einem stüblin neben
der kām̄er/ das er sein rüw allein heta
te/ vnd ließ die frau auch in der kām̄er
allein ligen. Nū es was etliche Nācht
also ein groß gebochsel/ werffen/ schlaa
gen vnd

Die Garten

gen vñ stossen in dem hauß an des manns
stubenthür / demnach an der Frauen
Kammer / das jedermann schier im hauß
verzaget was / damit was der zügung
des Pfarheris / vñnd das nächelich die
stillierendeneste sicherer. Morgens wenn
er wider außhin gieng / so was es wider
ein leben also im hauß. Wolan / das ges
sind wolt nicht mehr im hauß liegen /
der alte etty war auch schier verzaget.
Das geschrey was im ganzen Dorffe /
niemandt wußte wie dem Geist zu zus
kommen wer. Der Mann nam ein mal
das hertz in beyde hende / thet sich in ein
Harnisch an / name ein hellenbart in die
handt / vñnd wartet des Geistes / stellt
sich doch oben an ein Stiegen / aber
nicht am rechten orth / da der Geist her
kam. Als es vmb zwölff vñren ward /
der Geist kam hinten zum Garten hin
ein / gieng dasebst hinauß ins hauß /
vñnd hett nichts anders an / dann sei
ne kleyder / on ein laruen / mit einer wun
derbarlichen langen nasen vor dem an
gesicht. Der Mann stunde an der stie
gen / der Pfarher: kommet oben her /
schlug

schlug vnd warff/ dem mann ward das
hembd heysß. Wie er den geist bey einem
duncklen Monschein erblicket / spricht
er: pfey dich Teuffel / wie sichst du vn-
serm Pfarther: so gleich / wo du nicht al-
so ein lange schwarze naß hetttest. Der
Pfarther: geht gegen jm mit der nasen/
der güt Mann wil weichen/ vnnnd felle-
t hinder sich die stiegen hinab. Er schreyt
vmb sich/ der Pfaff in die Kammer. Die
fraw nam ein liecht / sahe wo der Mann
mit dem zünnen geschir: hin gerosselt
was/ hüß ihn auff/ füret ihn schlaaffen/
vnnnd saget: Ich hab dir doch allwegen
gesaget / laß den Teuffel das sein schaf-
fen / lege du dich schlaaffen / es ist nicht
güt mit den geistern zü schimpffen oder
vmb zü gehen. Ja sagt der Mann/heta-
te ich ihn nicht so gründtlich wol gese-
hen / so solt er mir ein argwoon gegen vn-
serm pfarther: gemacht habē/in allweg
ist er vnserm Pfarther: gleich weder er
hat ein schwarz angesicht vñ ein vnbiß-
lich lang naß/dz ich gedencē/es ist etwā
ein Pfaff/ der etwan vor langen Jaren
tode

Die Garten

totd ist gewesen/ auch verstellen sich die
Geist wunderbarlich. Also bliebe der
Mann inn seinem beth/ sucht den geist
nicht mehr/ vnd hette die Fraw vnd der
Pfarzherz die nacht güt leben.

Von einer reichen Witt- wen zu Ganstadt.



In Ganstadt wonet eine reiche
Wittwe/ die vonn jederman gehal-
ten was/ das sie die allerfrömbste
Fraw were/ so in der ganzen Stadt wo-
nung

nung hett. Die ließ sich einmal durch einen schreiber bereden/ dem sie wol wolte/ das er seinen zügang haben möchte. Das weret nün etliche lange zeit. Der Schreiber ward auff ein zeit eines todtschlags geziehen / Derhalben durch den Stadtrichter befohlen ward / das man ihn greyffen vnnnd gefencklich einlegen sollte. Solches hett nün die Wittfraw (die jederman so geistlich vnnnd fromm acht) erfahren/ schicket nach im/ zeiget es ihm an/ vnd fraget ihn der sach. Er sagt: Es geschehe ihm vnrecht / es were am Sonntag zü nacht der Todtschlag geschehen (hett man ihm gesagt) da er züm nechsten mal vber nacht bey jr gewesen/ vnd sie beyde nie kein aug zügethon hetten. Da das die fraw vernam / sagt sie: Er solt in ihrem hauß bleiben. Vnd gieng zü dem Stadtuogt / bathe in/ das er mit dem Jungen gesellen mit der gefengknus / des Todtschlags halben/ nit fürfaren noch eilen wolt/ dann sie wüßte das er dessen vnschuldig were/ das wolte sie mit Gott / der trewen/ vnd dem eyd bezeugen vnnnd waar ma-

Die Garten

chen. Zy saget der richter liebe frauw /
was nempt jr euch des menschen an / zie
het jr heym / vnd laßt mich die sach ver
sehen? Die Wittwe saget: Heri ich will
euch sein vnschuld mit warheit anzei
gen / das weysß ich / das er in jar vnd tag
nicht vber fünff mal nachts ausserhalb
meines hauß gelegen ist / vnnd nemlich
auff die nacht da der erstochen ist wor
den / ist er nicht ein augenblick von mei
ner seiten kommen / wir haben auch als
le beyde andere ding so ernstlich zů re
den vnd außzůrichten gehabt / Das vn
ser keins kein aug zůgethan hat. Dar
umb will ich ihn inn Jars frist was sich
da bey nacht verlossen / vertretten vnd
vertheidingen helffen: Dann ich viel
baß weysß wo er die zeit nächelicher wei
len gewesen / dann kein mensch in Can
stadt / das wil ich mit meinem eignen leib
beweisen / der dessen inen worden ist. Da
mit er löst die Witwe dē jungen von der
gefengnuß / vnnd macht sich selbs aller
welt zů einer offnen hůrn / dann sie bege
ret jr hůrerey mit dē eyd zů bestettigen /
vnd war zů machen / nůr das der schrei
ber nit

ber nit gefangen wurd. Wer er vnschul-
dig gewesen oder gleich gefangen wor-
den/hett er sich wol selbs entschuldigen
können/ sie hett in nicht dörffen verspre-
chen/ auch ihr eigen selbs glimpff vnd
weiblich ehr so hoch für ihn verbürgen
vnd versetzen. Aber was thut die vn-
nichtigkeit der frawen/wenn sie angebissen
haben. O coecus amor.

Von einem Pfarhern

der nit wolt das die Bau-
ren die trög in die Kir-
chen stellten.

D Hesenpüttlingen was ein
Pfarhern/ der im ruff was/ das er
sich der Weiber im Dorff mehr ge-
nehret/ weder im gebürte. Der wolt sich
auff ein tag inn seiner Predig verant-
worten/ vnd saget: Lieben freund/ ihr
habet mich im zieg/ ich halte mich vn-
geschickt mit eweren Haußfrawen/
vnd sie klagen nichts von mir/ darumb
thut jr mir vnrecht/ dann nemptwar/
P q ihr

Die Garten

Ihr nennet die Kirch mein frauw vnn
gemahel / vnn stellet mir grosse Kisten
vnd trög mit kleidern / gelt / seiten speck /
hammen vnd andern außgefüllt / her
ein in die Kirch / welche mein frauw ist /
vnd wolt nit leiden das ich mit ewern
frauen rede / oder nür ein kleines würst
lin / oder stück / darvon ihnen mittheile /
welchs euch doch gantz vnd gar nichts
schadet. Wolt ihr nün das ich ewerer
frauen müßig gehe / so gehet meiner
frauen auch müßig / vnn thut die Ki
sten / den speck / oder was ihr hinnen ha
bet / hinweg / oder leidet das ichs gegen
ewern frauen vergleich. Wo nicht /
so werd ich den geistlichen Richter an
ruffen / vnd mich beklagen / das ihr mei
ner gespons vnd gemahel / nicht abste
hen wöllet / vnd darzü nicht leiden / das
ich den eweren zü widergeltung auch
mittheilen möge / damit gleich mit glei
chem vergolten würd. Werdet ihr mir
dann in die straaff vnd Kosten erkennt /
so gedencend / als waar als ich Her: Fe
lix vonn Bückenheym heysß / vnn ein
würdiger Priester vnn Hochgelehrter
Mann

Mann bin/ So will ich euch weder hel-
 ler noch pfenning daran schencken/ das
 mögt jr euch versehen.

Ein Augustiner Mönch
 wolt kein Mönch/ sonder
 ein hengst sein.

Es stunden zu Meynz in der
 Schuster gassen/ etliche frauen
 bey einander/ die schern zu schleif-
 fen/ für die gehet ein grosser/ starcker
 vnd mollechter Augustiner Mönch.
 Die eine vnder den frauen saget: Sie
 he einer zu / welch ein grosser starcker
 vnd trollechter Mönch ist aber das.
 Der güt Bruder hett das gehöret / vnd
 sprach: O lieben Frewlin / ihr irret euch
 hefftig/ dann ich hab noch keinen man-
 gel an dem hangenden geschir / das ich
 soll ein Mönch genennet werden / ich
 binn auch keiner / sondern ein Hengst/
 vnd das gilt weisens. Dabey stund ein
 Schusterin / die buzet die schüch auß/
 auff den laden zu stellen/ die warde zor-
 nig

Die Garten

nig das sich der Münch der weisunge
erbotte / vnnnd saget: Bistu dann kein
Münch / sonder ein Hengst / **E**y so sat-
tel vnd reyt dich der lebendige Teuffel/
demselbigen thū auch die beweisung /
vnnnd keinem Christen Menschen. Der
Münch hette sein almüsen / zohe in sein
Kloster / vnd verantwort sich nit mehr.

Von einem Doctor der arznei.

In Medicus ein Doctor was
zu Straßburg / wo der gienge / so
hett er allwegen ein gulde Ketten
oder zwō am halß hangē. Ein frembder
Edelman kam auff ein mal gen Straß-
burg der sah in / vnd fraget ein anderen
Edelman / wer der Ritter wer? Der gab
im zu antwort: Es wer kein Ritter / son-
der ein Doctor der Arzney. D3 kan sagt
der Edelman / ein geschickter ein fromer
vnd getrewer Arzt sein / welcher anders
Kranckē von der gelsucht erledigen kan /
dieselbige inen abnimpt / vnd sie an sein
halß

halß hencfēt. O was wüdt er freylich
kirchhöf gefüllt habē/ biß dz er den halß
also schwer mit den gulden ketten ge-
macht hat. Er müst nit vber mich/ vnd
wenn er mir aller hinderst ins kemma
sehen solt/ dann ich förcht (so er den gül-
den ketten also geferd ist) er würd mich
auch ein züm wenigsten kosten werden.
Es ist wol zū gedencken/ vmb das jeni-
ge/ darumb sie vns tag vnn̄d nacht mit
iren faulen pillulen dreck vnd seych be-
sehen / liederlich genüg ab verdienen /
das hencfen sie darnach an den halß /
tragens vns entgegen/ vnd speyen vns
halber dran/ ja bringen sie vnns ächter
nit gar vmb die haut. Ich hab daheym
ein Bawren/ der hat mir kürzlich einen
trancf gemacht / das ich die kammern/
haußehren / das beth / die küssen/ vnn̄d
schier allen Teuffel im hauß voll geho-
fiert hett/ vnd ward gesund. Disem gule-
denen Doctor hette ich gewiß ein halo
be ketten müssen geben / solte dannoch
als bald kein vernügen gehabt haben/
sonst hab ich den bawren mit eim imbiß
abgewiesen. Giengē also von einander.

Die Garten

Ein bawer nam vrlaub vor
der frucht die zu nennen/vnd
vor dem vngeschicktern
ließ er das vrlaub
bleiben.

In Meyer führet gült in ein
Frawen kloster/das heyszt Frawē
brunn/liget im Schweizerland.
Die Kptissin kame zu ihm/hieß in will-
kom sein/vnnd fraget ihn/Was er bre-
chte? Et antwort: Fraw ich bring/mit
vrlaub zu reden/Gült. Die fraw sagt:
Wolan lieber Meyer/führet die pferdt
in den stall/vnnd esset in der gesind stü-
ben zu morgen/mittler weil so kompt
das gesind/vnnd treget die frucht hin-
auff/so farend ihr dann wider hinweg.
O neyn Fraw/sagt der Meyer: Es sind
drey Merken vnder den pferden/die
haben sich erst auffsteigen lassen/ja ich
meyn der hengst sey erst vor gestern auff
ihnen gefessen/sie würden den stall vnd
alle stend voll scheissen vnnd seychen.
Die Kptissin schempt sich/gienge hin-
weg.

weg. Vor denen groben / wüsten worten name der Bawer kein vrlaub / vnnnd schempt sich vor der Fräwen / die Gült zu nennen / müste vrlaub darvon nemen. Das was ein grober Baccalaris us / was freylich mit der mistgabel vnd Karst in die Schül gangen.

Ein Redner ließ vor der
Hertzogin von Osterreich
ein furz.

EIN Burgermeister in einer
Stadt / ward zu der Hertzogin von
Osterreich geschickt / bottschaft
zu werben. Vnd vnder der Oration vñ
red empfürjm / ich weyß nicht was / die
Bochersperger nennends ein furz. Er
beweget sich nicht darumb / sonder redt
sein werbung für sich. Die Fürstin nam
sich dessen nichts an / als ob sie es gehö
ret hette. Die Jungfrauen aber / die
hinder der Fürstin stunden / lacheten /
vnd sahen einander an. Gleich bald / so
leßt auch ihren eine vor lachen (das sie
p v nicht

Die Garten

nicht verbeyssen kond) ein juncfrawen
en fürzlein / das es knallet. Als das der
Burgermeister hort / sprach er: Wolan
lieben Jungfrauen/lassets in der orde-
nung herumher gehn/wenn mich dan
die zal begreiffen wirdt / so will ich wi-
der anheben. Gleich wie er also stande-
hafftig in seiner red war / vnd die jung-
frauen auch hette schamrot gemacht/
hüb jedermann an vonn hertzen / zū las-
chen / vnnnd die Fürstin selber/vnnnd hat
in seiner werbung gewert / auch seiner
schimpflichen antwort halben / gegen
den Jungfrauen / ehrlich vnnnd wol
tractiret.

Von einem der sein lebtag
nie in der finstermetten
was gewesen.

In Siebenthal im Schwes-
gerland/da heyst das Dorff Er-
lebach / da kam einßmals ein Al-
penknecht in die finstermetten/auff dem
Karfreitag zū nacht. Vnnnd nach dem
die

die Metten auß was/der Pfarher: das
 Kyrieleyson zu singen anhub / vnd die
 Bawren gleich darauff die liechter ge-
 löschet / vnnnd inn der Kirchen das groß
 bochßlen vnnnd rumplen anfiengen / er-
 schrack der güt Zeiny / stund in ein win-
 ckel / zuckte sein Wehr von leder / vnnnd
 forcht sich vbel / dann er vermeynet der
 Lerman wer vber ihn zuthun. Als man
 aber die Liechter wider angezündet /
 schreye er zu seinem Nachbawren / der
 bey ihme in der Kirchen stund / fragt in /
 Ober nicht wundt wer? Der güt freund
 sprach: Neyn / er solt still sein. Der Zei-
 ny steckt sein Wehr wider ein. In dem
 so bringt der Pfarher: vnd Sigrift ein
 Crucifix / vnd tragen das embor in dem
 Chor. Nun hett aber der Schweitzer
 nie kein Crucifix gesehen / vnnnd sprach:
 so er es ersihet also mit Blüt besprenget /
 Ey nün sey dir GOTT gnedig / lieber
 Gesell / werest bey mir gewesen / es müß
 dir nicht geschehen sein / Ich habe vor
 wol gewist / das balgen vnnnd stürmen /
 würde nicht zergehen / es müste Leuth
 kosten. Das ist das erstmal müß mir
 auch

Die Garten

auch das letzte mal sein / das ich in die
Kirchen komm / wenn man also hauff
helt / so müste ich letztlich auch darüber
zu scheitern gehen / Ich bin ein fremb
der gesell / auff mich hat man nicht viel
acht gelegt. Sieng also auß der Kirchen
zu seinem viehe / vnnnd ist inn kein Kirch
mehr kommen / Ich glaube er lige noch
vnder den melckküblen begraben.

Gebürliche straaff ist ei
nem Trummenschlager
vnnnd pfeiffer be
gegnet.

Nit weit vonn Alzen / hielt ein
Bawer sein Son ein Hochzeit.
Zu solcher Hochzeit vnnnd freu
den / bestellet er zween Spielmänner /
ein Trummenschlager vnnnd ein pfeif
fer / die warend Burger zu Alzen. Diese
zween hetten sich vor wenig tagen / wie
der der Herren gebott in der Stadt vn
nütz gehalten / darumb sie dann straf
flich waren / vnd in den thurn erkennt /
darumb

darumb auch die Büttel hinauß zu der
Hochzeit giengen / vnnnd sie beyde vom
tanz gefangen hinweg ghen Alzen /
inn den Thurn fürten. Das name des
Breutgams Vatter wunder / das ihn
das geschehen solte / was zornig / lauffte
eylends zum Burgermeister ghen Al-
zen / stellet sich vbel / begeret die Män-
ner wider vnd sprach: Er wolte sie ver-
bürgen. Der Burgermeister sprach:
Wenn du der straaff vnnnd leckerey wilt
theilhaftig sein / die sie vor dreyen ta-
gen auff der nechsten vergangnē Hoch-
zeit getrieben haben / so werden sie mor-
gen herauß komē. Ja sprach der baw-
er / allein das ich wisse / was sie gethon
haben. Der Burgermeister sprach / der
Trummenschlager hat vnserm Rahts
botten / ihentag zu nacht an der stegen
die füß fürgehabt / also das er von oben
die steg durch hinab gefallen ist / vnd ist
zu besorgen / er sey die blaß im arß zer-
fallen / darumb leckt er im thurn / er solt
der Herren diener iren befelch schaffen
lassen. So hab ich den Pfeiffer ins loch
geleckt / der hat beyde Nācht auff der
Hochzeit

Die Garten

Hochzeit/meister Florian schmidt/ auff
seinen anbiß/ zu beyden schlaafferünck-
en geschissen/ des solt er müßig gangen
sein. Teyn her: Burgermeister sagt der
Bawer/ ich will nicht mit theilhaftig
werden. Was wirdt ihnen aber für eine
straaff beschehen/ die sach ist doch nicht
zum todt? Der Burgermeister sprach:
so gedencke ich wenn die vrtheil gehen/
so wirdt mann sie nemen vnd vber den
besenmarckt jagen/ vnd jnen thun/ wie
sie gehandelt haben. Ja wie/ saget der
Bawer/ O lieber Her: / saget mirs / es
soll gehet bey mir verborgen sein? So
wirdt man saget der Burgermeister/ sie
biß auff den gürtel / nackent abziehen/
vnd demnach zwo grosser rüthen nem-
men/ vnnnd einem nach dem andern das
loch beschlecken/ inn dein hertz geredet/
ich solte nicht auß der Schül schwet-
zen. Der Bawer was wol zu frieden/
vñ ließ den Trumenschlager im thurn/
vnd den Peiffer im loch ligen/ wolte nit
mehr bitten: Dann sie hettens beyd wol
verdient. Doch was jm nach seiner frag
geantwort worden.

Ein alt

Ein alt Weib ließ ein starcken furz.

In einer Kunkelstube nachts
sasse ein alt Weib bey vil jungen
Töchtern vnd Gesellen/ die trieb-
ben nū vil kurzweiliger reden vnter ein
ander. Die altervettel wolt sich bucken
(es w3 jr ein spindel empfallen) vnd die
spindel wider auffheben/ so kracht jr dz
geseß/ sie was auch sonst vngeheb / vnd
ließ ein grossen starcken furz. O lieben
töchter/ sagt sie gleich: laßt euchß nicht
wunder nehmen / es ist meines Alters
schuld. Da sprach der gesellen einer: Es
ist deiner Kerben vnd vngeheben lochs
schuld/ dz dir der teufel ins arßloch far/
aller alten herē. O da behüt mich Gott
sagt das alt weib / machet wol 8. creutz
für dē arß/ vnd sagt: Ey nū far mir vn-
ser lieber Herigott drein. Der gsell spra-
che: Ey nū far dir tausent teufel drein/
das dich boz erdtrich schend als alten
wolffs/ woltstu vnserm Herigot die wü-
ste statt ordinieren. Vnd nimt die alt her-
sampe

Die Garten

sampt der küncklen vnd spindlen / wirffet sie zur thüren auß / vnd jaget sie bey eytler nacht für tausent teufel hinweg / sie würde ihnen sonst alle ihre gütte vnd fröliche kurtzweil verschiffen haben.

Ein Jud vnd ein Christ disputierten mit einander vom glauben



En Franckfort wolten auß
sein zeit erliche Kauffleut in ges
sellen Schiff von Basel herab
her faren. Zu denen kam ein Jud in das
Schiff

gesellschafft.

Schiff/ hieß Simon / was sunst zu Alex
Kirch daheym. Also sie allerhandt im
Schiff mit einander redten/ auch vieler
handt schwencf trieben / kame der Jud
Simon vnnnd ein Kauffmann von Bas
sel zusammenten / vnnnd disputierten vom
dem glauben. Vnter andern reden sage
der Jud zu dem Kauffmann: Ihr Chris
sten rümet ewren Christum hoch/ wenns
jr auch thetten das so er euch geheysen
hat/ so hielte ich etwas darauff. Der
Christ fraget den Juden/ was das wer?
Der Jud antwort/ vnd sagt: Hat nicht
ewer Christus geheysen / Wen dich ei
ner an ein backen schlegt / so hebe ihn
de andern auch dar? Ja sagt der Kauff
mann / er hat es geredt. Der Jud saget:
Wenn ihr dann so viel darauff haltet/
so haltet ihr mir. Ich wils thun / saget
der Kauffman: Vnd hüb jm ein backen
dar. Der Jud schlug jm mit flacher hand
dran. Er hüb ihm den andern auch dar/
er schlug ihn auch mit flacher hand an
denselbigen backen / vnnnd saget: Nun
muß ich glauben / das jr ein rechter gü
ter Christ seyt. Ja Jud/ sprach der Kauff
mann/

Die Garten

mann/das du sehest/das ich das geheß
meines Christi erfüllen will / so merck/
Er hat auch gesagt: Mit welcher maß
du missest / mit derselbigen maß soll dir
gemessen werden/ein gute/ volle/ grosse
vnd gehaupte maß/ vnd zucker die sau-
ste/vnnd schlecht den Juden an haß/
das er vber das Schiff auß in den Reim
fiel/ vnnd weren ihme die Schiffeleuth
nicht zū hilff kommen / er hette müssen
ertrinken. Darnach ließe der Jud sein
disputieren bleiben / vnnd vnsern Chri-
stum mit seiner lehr zū frieden/ dann sie
was mehr wider in / dann mit im dran.

Ein ander Jud disputiert auch von vnserem Christo.

Als die Juden vil schelmenhän-
del zū Rotweil mit den armen leu-
ten haben / kam auch einßmals ei-
ner an das Hofgericht. Von gschicht so
reit ein Edelmann auch gen Rotweil/
vnnd zeucht eben in die herberg ein / da
der

Der Jud innen lag / der was einer vonn
 Reuschach / welcher gar ein grosser Ju-
 denfeind was. Zum schlaffstrunck kam
 der Edelmann vnd der Jud an einan-
 der des glaubens halben zu disputiern.
 Der Jud sprach: Es wundert in / dz die
 Christen ein neuen Gott / nemlich iren
 Christum angenommen hetten / vnd den
 guten fromen alten Gott / der Himmel vñ
 Erdrich erschaffen / hindangsetzt / wol-
 ten im erst noch zween helffer zu setzen /
 den Christum / vnd den h. Geist / wie sie
 ihn nannten. Der Edelmann saget: An
 welchen Gott / Jud / glaubest dann du?
 Der Jud sagt: An den alten Gott. Das
 geb dir vñnd deinem hauffen / saget der
 vonn Reuschach / Gott die druß / Beül
 vñnd Pestilenz / hetten ihr vns vnsern
 Gott lebendig vnd vngereutziget ge-
 lassen / er were wol nün als alt als ew-
 er alter Gott ist. Vñnd zuckte die faust /
 vñnd schlug den Juden an halß / das er
 hinder die thür burzlet / erwüschet ihn
 fluck's / würfft in die stigen ab / vnd sagt:
 Nün heysß dir dein alten Gott helfen /
 vnd veracht mir mein Christum vñ den
 W h heiligen

Die Garten

heiligen Geist nit mehr / oder der bu-
bieren müstu mehr fressen. Der Jud so-
he dahin / vnnnd hett gelöst / ehe andere
Kremer außgelegt hetten.

Von einem Priester / der
einem anderen Priester
sein vollsauffen gebeich-
tet hat.

Alexius hieß ein Priester / zu
Aurach im Wirtenberger Landt /
der was zu zeiten im kopff verru-
cket / oder mönig / wie mans heyst. E-
neß mals als jm die mucken stigen / gien-
ge er zu Aurach in der Kirchen auff vnd
ab spacieren. So kompt morgens (auff
ein Sonntag was es) ein anderer prie-
ster zu ihm gangen / vnd bat ihn / er solt
ihn beicht hören. Er sagt: Ja. Der prie-
ster beichtet jm / vnd sagt: wie er die an-
der nacht sich so voll weins getruncken
hett bey den Cartheusern / das er ge-
speyet / vnd die Kirchen voll geschwitz-
hette. So facht der Her: Alexius an /
schreit

schreyt inn der Kirchen vberlaut/vnnd
saget: Sauff/ das dirs tausent Teuffel
gesegne/ die absoluieren dich auch. Hö-
ret lieben freund / der pfaff hat sich die
andere nacht so voll weins zu den Car-
theusern gegessen/ das er gespeyt/ geko-
zet / vnnd die hosen voll geschissen hat/
der Teuffel absoluier in. Der ander güt-
zeri was erschrocken / vnnd schamrot/
gieng auß der Kirchen. Der Teufel het-
te in auch mit dem vn sinnigen Beycht-
vatter beschissen / vnnd sonst kein an-
derer heilig.

Von einem trunckenen Sigristen / der inn ein Keller fiel.

DB Schelckingen was ein Si-
grist/der was auff einer Kirchwey-
he gewesen/vnnd hette des Weins
also viel zu ihm genommen / das er als
truncken worden/vnnd in boden abge-
richtet was/ wo seine gesellen nicht bey
im gewesen/hette er müssen hinder dem
Q. iij tisch

Die Garten

tisch sitzen bleiben. Aber sie namen ihn/
vnd führeten ihn vnder den armen/
trügen ihn halber/biß sie ihn schier heym-
e brachten. Vnd vnder wegen/ als
sie sein nicht sonderliche achtunge hat-
ten/ riss er sich mit gewalt von ihnen/
will selbs gehen/ so wirdt ihm der kopff
zū schwer/ vnd tūmlet in ein Keller/ der
stunde vonn geschicht offen/ fellet dar-
ein/ zwo stiegen hinab/ biß aller vnderst
in Keller. Die Māner warn sehr erschro-
cken/ vermeinten/ er wer zū todt gefal-
len/ lauffen behendt hinab/ heben ihn
auff/ vnd stellen ihn auff die füß. So
facht er an mit heller stimm/ vnd sagt:
O lieben gsellen/ wie ist es so ein hübsch
ding/ vnd besondern einem Sigristen/
wenn einer das A. b. c. frey hinder sich
vnd fürsich außwendig kan/ es mage
ihm wol zū nutz kommen. Da die gesels-
len das sahen/ vnd hörten auch/ das im
dasselbige mehr dann der schwere fall/
zū hertzen gieng oder anlag/ lachten sie
sein recht gnüg/ fürten ihn mit besserer
sorg vollens heym. Aber ich gedenc/ er
werd es morgens jnen worden sein/ wie
er ges

er gesprungen ist/ ob das A. b. c. oder der
wein/ hinder sich oder für sich gewircket
hat.

Von einem Frawenbruder
Münch/ der den einritt vnfers
Herren ghen Jerusalem
geprediget.

In Frawenbrüder Münch /
gieng einßmals vmb/ Kess zu sam-
len. An einem Sontag aber was
er in ein grossen dorff/ batt den pfarr-
her: daselbst vmb die Cangel/ sie warde
im erlaubt. Nün er predigt das Euan-
gelium desselbigen Sontages/ das was
wie Christus ghen Jerusalem einge-
ritten war. Da saget er: Lieben freun-
de/ es schreibet der Euangelist darvon/
der Herz sey auff einer Eselinnen einge-
ritten/ nicht glaubets/ ich glaubs selber
nicht. Er ist auff einem hübschen hohen
gaul für hundert kronen geschetzt/ mit
Sammat gedecket/ vnd sonst mit zwey
hundert pferden zur Stadt hinein ge-
raht wie tausent teufel/ vñ den nechste

Die Garten

in den Tempel / jaget dieselbigen Keuffer
vnd verkeuffer für alle Franzosen her-
auß vñ hinweg / vñ nam er was da waz /
vnd theilet es vnder seine Reuter auß.
Der Sigrift stunde hinder ihm / vnd sa-
get: Ey Herz es ist ein Esel gewesen. Da
der Münch höret / das ihm der Sigrift
einredet / warde er zornig / vñnd sprach
zü dem Sigriften / mit lauter stim vor
jedermann: Es ist deiner Mütter furb
gewesen / gehe hin vñnd lecke den Esel
im arß / Köndt ich mein Gott vnd Her-
ren mit anderer zierlichkeit Loben vñnd
erhöhen / ich wolt mich kein arbeit dau-
ren lassen / Dann ich will sein ehr bewa-
ren / so lang ich vnser lieben frawen brü-
der bin / vnd der würdige vñnd Hochge-
gelerte Herz / Doctor Johannes de Ga-
landria heysse. Die Leuth lachten sein /
vnd lieffen auß der Kirchen / lieffen ihn
stehē zü bappelen / als lang als er wolt.
Aber vmb seiner schönen predig willen /
die er gethon hette / samlet er auff dis-
mal auß der Wittfrawen alten
vñnd hinder reusen
mit vil keß.

Von

Von einem hincfenden

Schneider wie der inn
den Himmel kam.

In hincfender Schneider
starb / vnd kam für den Himmel/
were gern hinnein gewesen. Pe-
trus aber wolt ihn nicht hinein lassen/
Darumb das er so vnbillich inn seinem
leben den Leuthen das thüch gestolen
hette. Der Schneider gestunds / aber er
bath vmb verzeihung / er wolte es nicht
mehr thün / vnd sagt: Er were müd / er
möchte nicht wol fürbaß kommen / be-
geret eingelassen / vnd hinder den Ofen
gesetzt werden / vnnnd alle vnflätige ar-
beit die niemandes thün wolt / als Kin-
der scheissen tragen / wüschchen / weschchen /
vnd wenn die Kinder die bencf voll ho-
fieren / das wölte er auch alles außtra-
gen / fegen / bauchen / vnnnd dergleichen
boffel arbeit / alles thün / nür das er nit
fort müsse gehn / er hab blattern an den
Süssen gangē. Hindenach hat sich doch
meister Peter vber jm erbarmet / vñ ein-
gelassen /

Die Garten

gelassen / Das was vngesefhrlich vmb
den Mitten Tage. Eben dazumal da
wolte der grofß Herz mit allem himme-
lischen heer / für den Himmel her auß / in
einen garten spacieren gehen / vnd sich
erlustigen / befiehlt dem hincfenden
Schneider den Himmel / vnd gůte sorg zů
haben / dz niemands nichts außhin trů-
ge. Der Schneider sagt / er wolt es flei-
sig versehen. Sie giengen hin in den
garten / der Schneider besahe alle ge-
legenheit inn dem Himmel / steyge vol-
lendts hinauff zů dem stůel des Obri-
sten Königs / da man alles das sehen
kan / das auff Erdrich geschicht / so si-
het er ein alte wůste Vettel herniden
auff der erden vber einem bach wäsch-
en / die stillt einer anderen frawen heym-
lich zween schleyer. Dieweil er aber hie-
vor dermassen des Diebstals halben /
mit S. Peter wol in hundert lăsten ge-
wesen was / also das er schier hette můs-
sen vor der thůren daussen bleiben / was
er dem Diebstall so feind / vnd ward so
zornig vber die alte vettel / erwůschen
den Schemel der vor dem Stůel stund /
vnd

vnd wirffet ihn der Alten Diebin vber
dem bach inn die rippen das sie vmb-
siele. Sie erschracke / wußte nicht wels-
cher Teuffel sie geworffen / lieffe heym/
vnd ließ die schleyer liegen / darmit
wurden der andern Frawen ire schleyer
wider. Der Oberst König kam mit dem
Himmelischen Heer wider / vnd sicht
das ihme der Schemel vor seinem stuel
mangelet / fragete wer ihn dannen ge-
thon? Letztlich fandt er den hincfens-
den Schneider / fragte wo der Sche-
mel hin kommen seye / ob er ihn hinweg
gethon habe? Der Schneider sagt ihm
alle sach / wie es mit der Alten vettel
auff Erdrich / den zweyen schleyern/
vnd dem wurff mit dem Schemel er-
gangen was. Wie nun der Oberst Kö-
nig das gehört / sprach er: O lieber son/
wer ich also richlich als du / wie mein-
stu das es dir langest gangen wer? Ich
hett auch vor langē / weder stüel / bench/
sessel / bengel / ja kein Ofengabel mer ge-
habt / ich würd es alles auff dem Erdt-
reich auff den Leuthen zerworffen ha-
ben. Darumb aber / das du ohne befelch
rath

Die Garten

rach gethon/vnd dasselbig mit meinem
güt außgerichtet hast / so müstu wider
hinauß für die pfort / vnnnd sehe weiter
wo du hin kompst / hierinnen sol nie-
mands strassen dann ich. Damit müst
der hincfend Schneider vonn stundan
hinauß/waren im leyder schuch zerbro-
chen vnnnd die füß voll blattern/konnte
nicht sehr wol gehen / name ein stecken
in die hand/vnd zoh gen Beyt ein weil/
zû den langknechten da ist er noch / zes-
chet/ist gûter ding.

Ein Sergenweber/hette ei-
nem ein Serg gemacht/die
was inn alle wege
zû klein.

In dem Dorff Allenweiler/
da wonet ein Welscher maurer/
hieß Lorentz / der verdinget auff
ein zeit/ein andern welschen weber/ein
serg zû machē. Die serg ward gemacht/
der Weber bracht sie ihm. Da sie vber
das betthe gemessen warde / da was sie
viel

viel zu klein. Der maurer wolt die serg
 nit/der weber wolt sein gelt haben. Sie
 kamen mit einander für die Oberkeit.
 Der maurer klagt / er hett ihm dem we-
 ber ein serg verdingt zū machen/die we-
 re zu klein/darumb wolt er jr nicht. Der
 weber sprach: Lieber Herz / wie er mir
 sie verdinget hat / also groß habe ich sie
 gemacht/dann er hat mir das meß vber
 sein beth gegeben / wie breyt / vnd lang
 dasselbig ist / also hab ich auch die serg
 gemacht. Lorentz der Maurer sprach/
 (als er gar böß deutsch kunt) Ihr müß
 mich hör lieber Herz / er hat mir die serg
 gemach / wenn ich am beth lig bey min
 frau / vnd hab die serg auff vns / wend
 ich mich rum / so leck min loch bloß/ Er
 sich min frau rum / so leck ihr loch auch
 bloß. Der Amptmann / der sie verhort/
 lacht zu dem holdseligen teutschen/ver-
 trüg sie mit einand also/ das der Weber
 noch ein stück an die serg machen solte/
 vñ solt im Lorentz dasselb besunder be-
 zahlen/auff das weder er noch sein frau
 weiter zū klagen hetten/das jr loch bloß
 leck / oder das sie etwan erfrieren möch-
 ten

Die Garten

ten / darmit sie das puttel weh vberke-
men / das ist ein krankheit / da man nä-
chtlicher weile die häfen zu brauchen
muß / vnd die nasen verheben.

Von einem Bawren der Schultheyß ward.



D Hårbach / da die Wolff den
Schultheyssen an dem Gerichte
frassen / dann es sind etwann acht
heuser

heuser da / vnnnd wann der Schultheiß
 zu gericht sitzt / ist eben einer da der klag-
 get / vnnnd einer der antwort / so ist denn
 die ganz gemein bey einander. Da was
 auch einer daheym / der lange Jar der
 Gemeyn Rosshirt gewesen was / der
 wurde zu einem Schultheysen daselbs
 vber dritthalben Bauwren gemacht /
 der gieng einsmals in der Stadt Minn-
 singen inn das Bad / so findt er von ge-
 schicht ein anderen Bauwren auch da /
 welcher wol zwölff Jar dauor / der ross
 mit im gehüt / von jugent auff / dersel-
 bige Bauwer der wuste nicht das er
 Schultheiß was / sonder dauget in noch
 wie ein altē rosshirten vnd geselln. Der
 Schultheiß sagt: Du solt mich nit mehr
 dauget / dann ich binn nimmer der ich
 vor was / ich bin jezunder vnser herz der
 Schultheiß zu Häwbach. Vbz taus-
 sent mußen / saget der ander Bauwer /
 das hab ich nit gewust: Herz der Schult-
 heiß GOTT geb euch glück vnd heyl /
 vnnnd ein langwiriges Regiment bey
 eweren vnterthonen. Danc habe / sagt
 der Schultheiß / es ist ein vngezogene
 Gemeyn

Die Garten

gemeyn zu Håwbach / die andern schult
heysen haben sie lassen machen / wie sie
gewölt haben / das muß ich nün jezund
mit grosser müß vnd arbeyt wenden / es
bricht mir den schlaff / ich bin drum ins
bad her gangen / das ich des lauffens vñ
der schweren hendel ein weil ab sey. Lie-
ber sage du / welcher vnter vns beyden
wolts gemeynt haben / da wir ross hir-
ten so lang mit einander gewesen sind /
das ich durch die zúschickung Gottes /
vber die ganz gemeyn zu Håwbach ein
Schultheys solt worden sein? Es ist ein
besunder glück vñnd bescherung Got-
tes / ja freylich von anbeginn der Welt /
bey Gott also fürsehen gewesen / dann
ich bin wie du weyst / ein wüster roziger
büb / vñnd demnach ein vnflätiger gro-
ber bawer gewesen / da wir der Ross ge-
hütt haben / vñd aber jezunder / bin ich
ein gewaltiger Schultheys worden / so
wunderbarlich sind die schickungē Got-
tes. Wie vil Her: der schultheys (sprach
der ander Bawer) sind wol Burger zu
Håwbach / die jr zu regieren haben? Der
Schultheys sprach: Es sind jr acht / on
der

der Dorffbeck/ vnd der Rosshirt / so der
gemeyn der pferdt hütt. Der Bauwer
sprach: das nümpt vil mühe vnd arbeit/
ehe man ein solche grosse gemeyn in ein
ordnung vnd wesen bringt. Ja sprach
der Schultheyß/ es bricht mir den kopff
hart/ nün müß es fort/ vnd solte ich als
letag die gemeyne viermal zůsammen
beruffen. Vnnd gieng darmit ins bad/
vermeint er hette sieben Fürstenthumb
zů regieren/ so er kaum fünff Bauwren
hette/ die ohn zweiffel alle witziger wa-
ren weder er/ dann sein witz vnnd regie-
rung/ hett er wol zů gedencfen/ bey den
pferden gelernet/ deren er gehütt hett/
vnd wol wargenommen wenn sie rath
gehalten haben.

Von einem Langfnecht/

dem seine Frau Kinder ma-

chet/ wenn er schon nicht

daheym was.

In Burger was zů Bretten/
der nam ein junge hübsche frau/
die im

Die Garten

Die ihm schier alle jar ein kind gebar. Er
ließ sich einmal vberreden / vnd zoh mit
andern Burgern in Meyland / was wol
drey jar auß. Die frauw was in der zeit
heußlich / sahe nit destweniger das der
haußhalt fort gieng / vnd die kinder ges-
macht wurden / ein weg wie den ande-
ren / dann wenn ihr etwas braste oder
anlage / so klaget sie solches dem pfarr-
herz / vnd seinen Caplenen gantz treu-
lich / was sie dann dieselbigen hießen /
dem volget sie nach. Nun vber drey jar
kame der Mann wider auß dem Krie-
ge / findet zwey Kinder mehr da lauff-
en weder er gelassen hatt / vnd gienge
die frauw mit einem / Es name ihn
wunder wie das zügangen was. Das
soltu dich nicht wundern lassen / saget
die Frauw / ich bin also fruchtbar vonn
mir selber / ich bedarff keines Mannes /
der mir sie machet / so bald mir zü nacht
vonn dem handtwerck geträumet / so
sabe ich gleich an mit einem Kindt zü
gehen. Ich hab es vnserm pfarrherz
vnd seinen Caplenen auch angezey-
get / die sagen ich soles recht Gott wals-
ten

ten lassen/ beschert mir Gott vil Kinder
so wirt er mir auch dazu bescheren/ das
sie erzogen werden. Also bin ich recht ge
dultig inn der sachen gewesen. Ja sagt
der Mann/ hat es die gestalt/ so muß
man das best darzu reden. Der güt ge
wo er darnach zu leuten kam/ so rümpf
er/ wie jm Gott also ein fruchtbar weib
bescheret hette/ die auch Kinder mach
en köndte/ wenn er schon inn Meyland
wer. Drey jar wer er darinnen gewesen/
im krieg/ dieweil hette sie ihm heraussen
drey Kinder gemacht/ das sey ein beson
dere gnad von Gott.

Von einem Bawren der
vnsrer lieben Frawen geburt
für die Beschneydung
verstund.

Auff einem Meyerhof saß ein
Bawer der in kein kirch kam. Ei
neßmals ward er von ein andern
Bawren angeredt/ wie er also ein Gott
loser Mensch sein könne / das er doch
nit einmal oder zwey im jar in die kirch
K q giens

Die Garten

gienge/ das Gottes Wort höret/ vnd
nemlich auff denselbigen Tage/ so wer
ein grosser Seyertag/ vnser lieben Frau-
en Gebürt/ vnd solte er allezeit/ wenn
er sie anruffen wolt/ sagen: O du Müt-
ter Gottes/ durch deine gebürt so seye



nur gnedig bey deinem lieben Kind. Der
bawr sagts jm zů/ er wolt es also thůn/
vnd seine Kinder also lehren. Der nach-
bawr gienge heym/ der Meyer vergass
das halb/ sagt zů seinem Volck: Sie sol-
ten in das nechste Dorff inn die Kirche
gehen/ vnd Predig hören/ es wer vnser
lieben Frawen Tag der beschneydung/
vnd

vnd wenn sie beten wolten / solten sie
sagen: O du Mütter Gottes / durch dei
ne beschneydung so seye mir gnedig bey
deinem lieben Großvatter. Solches
warde der Pfarther im Dorff darbey
gewar / vnd fraget den Bauwren / war
umb er saget / das vnser Fraw were be
schnitten worden / Christus sey beschnit
ten / vnd seine Mütter gar nicht / er irre
sich gar weit im Christlichen glauben.
Der Meyer sagte: Es ist also lang / das
es geschehen / das es schier nicht mehr
zu glauben. Ich hab ihr keines gesehen /
darumb kan ichs auch nicht wol glau
ben / wenn ein ding vor vier wochen ge
schehen ist / so wil mans jetzt nicht mehr
glauben / vnser liebe Fraw sey beschnit
ten oder geboren / so ist es alles gesche
hen ehe ich auff Erdrich gewesen bin /
es mag sein / es mag nicht sein / ich glau
be es nicht / ich hette es dann selber ge
sehen. Vnd in Summa / was ich nicht
sah / das glaub ich auch nicht / das wer
dent Heri Pfarther ir mich nit vberre
den / gieng vom Pfarther hinweg / vnd
ließ in stehn.

Die Garten
Von einem Sigristen /
der sich beklagt von den
Pfaffen.

Es beklagt sich einmal ein ar-
mer Sigrift / das er den Pfaffen
dienen müßt / vnd sie alle zeit das
gelt / frucht / wein / vnd andere zins vnd
gült einnehmen / ihm aber kaum das
rauch Brot vberliessen / darmit er sich /
sein weib vnnnd kindt ernehren möchte.
Denselbigen Sigristen fragt einer: wo-
her er solchs wüßte? Sprach er: In man-
cherley wege haben sie vns in die höch-
ste dienstbarkeit geführt. Dann erstlich
haben sie ein weg erdacht / darmit wir
gezwungen sind / ihnen vnser heymliche-
keiten durch die Beicht zu sagen. Zum
andern / so müssen wir inn die Kirch ge-
hen / vnnnd vnsern swaren schweiß vnnnd
arbeit durch das Opffer vnnnd seel ge-
recht ihnen geben / So sie doch selbs inn
kein Kirch kommen / sie haben dann ein
besonderen lohn darvon / vnnnd wenn
sie inn die Kirch gehen / oder umb die
Kirchen /

Kirchen / so haben sie die Glocken er-
dacht/das sie darmit jnen selbs ein lust
machen/ auff das sie das gesang dester
leydlicher ankumpt. Zum dritten ha-
ben sie die Orglen jhnen selbs auch zum
burgers lust stifften lassen / das sie nür
best weniger dörffen singen. Ein ding
manglet jnen noch/ darauff sie tag vnd
nacht trachten/wie sie zu wegen bringē
möchten/das wir für sie auch zum teu-
fel in die Hell führen/ alß dann so wer die
Kart gang vnd die glock gegossen. Sola-
ches alles weiß ich wol/ich habß offter-
mal von jhnen selbs gehört sagen / vnd
in sonderheit von dem Pfarherin von
Cappel/ Her: Lupi geheysen / welcher
einen Vers auß dem Alexandro ange-
zeigt/vnd darnach außgelegt hat / vnd
ist das der Vers:

Dant duo bos, impos, compos, custosq; sa-
cerdos.

Impos/ Die Bauwren. Dant/Sie
geben. Duo bos / Zween Ochsen. Sa-
cerdos / Dem Priester. Compos / Der
Gumpost. Custos / Dem Sigristen.
Darumb so müssen wir alle zeit Arme
K iij Sigris

Die Garten

Sigristen/ vnnnd sie reiche pfaffen sein/
liesse darmit von seiner klage/ vnd gien-
ge heym.

Wie stat vnd starck das
Ehelich band ist der Prie-
sterschafft.

Einmal ward ein armer
dorffspaff/ der was zu Beblingen
bey dem Newenmarckt daheym/
vonn dem Official gefragt/ Ob er auch
ein junge Magdt hette? Er sagt: Neyn
Herr/ ich darff mich nicht dreyen wagen/
Ich fürchte oberkeme ich eine/ so müste
ich mein lebenlang mit ihr / vnd sie mit
mir behencket sein / dann ich hab von
anderen guten alten Herren gehört /
das die Priesterliche Ehe also ein starck
band sey / das es nicht mag getrennet
oder gebrochen werden / solches hat
mich verzagt gemacht / darumb ich zu
kost gehn/ vnnnd nicht selbs haushalten
will. Der Official sprach: In einem al-
ten Buch hab ich gelesen/ wenn auff eis-
ner

einer dorffkirchweyh Ein vnd vierzig
einäugechter Sigristen / vngesefhrlich
zusamen kommen / die mögen mit hilff
acht Bader / die nie geschwizet / Sechs
Rosdäuscher die nie gelogen haben /
vnnnd vier Hirten / da jeder drey Jar des
Diechs auff dem feld gehütet / vnnnd nie
beregnet worden / sich darein schlagen /
vnd Priesterlichen Ehescheidung für-
nehmen vnd machen / vnd was sie dar-
inn handlen vnnnd beschliessen / darbey
soll mans on alles hinder sich sehen blei-
ben lassen. Vnnnd welche Fraw das bri-
chet / die soll zu straff mit blossen loch
in einen zuber mit schneewasser gesetzt
werden / bis ihr das hertz erfrewert. Der
Herz aber / der daran brüchig wurde / der
muß Herren spectli (also heyst der Sif-
cal) das gewölb küssen / so lang bis der
oberst bogen einfallt. Der Dorffspaff
sagete: Die straffen sind mir alle zu
schwer / darumb so will ich recht also
bleiben / bis mein fraw von Heydelberg
aus dem kalten Thal kompt.

Sind also von einander

der gescheiden.

R v

Wel

Die Garten
Welches die frommen
Müller sind.

Zu Biel was ein Müller auff
der stadtmüllern / zwischen Tüdaro
vnd Biel / lange Jar geseffen / der
hett also grausam sehr vnnnd tieff in die
seck griffen / das man in von der Mülen
jaget / vnnnd wer er nicht also ein gar al-
ter Mann gewesen / man würde in has-
sen durch ein hânffin fenster gelehrt se-
hen. Die Herren der Stadt trachteten
vmb ein andern Müller / da man an sei-
ner frombkeit kein zweiffel haben dörf-
te. Sie schrieben auß an die nachbaw-
ren vmb ein frommen Müller. Auff ein
zeit fraget ein Burgermeister von Bis-
el / den Schultheysen von Solothurn
vmb ein frommen Müller. Der Schult-
heys bedacht sich ein weil / vnd sagt: ja /
so ichs gedenc / vnser stadtmüllers
fraw zu Solothurn / die hat vorgestern
de müller ein jungen son geborn / ein jun-
gen müller / welcher gewislich vnd vn-
gezweiflet ganz from ist / wie gold / wen
euch

euch der werden möchte / so dörrften ihr
 ganz vnd gar / der armen leuth halben /
 kein sorg haben / sonst ist es mit den al-
 ten Müllern mißlich. Dann was man
 jung lernet vnd gewonet / das treibet
 man gern im alter. Wir müssen vnns es
 ben als wol leiden als ihr.

Christus lag in der Krip-
 pen / vnd aß ein ha-
 bernbrey.

Auff ein Wenhenacht tag predi-
 get ein vngelehrter Dorffspass / in
 ein dorff / nicht weit von Graben /
 da der Esel auff der horkirchē steht (der
 namen des dorffs ist mir empfallen) von
 der menschwerdung vnd geburt Chri-
 sti vnser Herz / vnd demnach er nün
 angezeigt / wie es dieselb nacht so kalt
 gewesen / Joseph vnd Maria das kind-
 lein in ein Kripp geleget haben / mit al-
 ten hosen gedecket. Saget er weiter: O
 ihr lieben freunt nemmet da ein glei-
 chnuß / gegen dem wie ihr ewere junge
 Kind

Die Garten

Kinder ziehen / die Mütterren müssen
am warmen hinder einem umbhang
sechs wochen kindbetth in liegen / gute
hüner essen / die kinder thut ihr gleich in
ein wiegen / legts in gute weiche wind-
len / küßlen vnd decklachen / eingewick-
let / vnd gebt jnen gut beppe / mit der be-
sten milch gekocht / zu essen. Maria die
Mütter Gottes die hats nicht also ge-
habt / sie ist am kalten gelegen in einem
stall / hat grob rindfleisch in rüben ge-
kocht gessen / vnd hat Joseph das kind-
lein in ein wiegen / sonder in ein krippe
geleget / mit haw vnnnd stro zügedeckt /
das jm der frost nicht geschadt / inn alte
hosen gewicklet / vnnnd gebunden / vnnnd
darnach jm einen guten dicken schwä-
bischen haberbrey gekocht / darmit hat
er das kindt auffgezogen biß inn sein al-
ter / darnon es auch gewachsen / vnd ein
starcker Man worden. Es ist auch sein
lebtage nie krank gewesen / biß ihn die
Juden gecreuzigt haben / da hat er wol
sterben müssen. Sonst das jr ewer kind-
der also zart ziehen / so werden nichts
dann eytel göwizen darauß / sind für
vnd

vnd für stätigs fürzfällig / Franch / vnd
sterben ehe zeit. Darumb lassets euch
ein warnung sein / so vberkompt vnd
behaltet ihr auch starcke junge kinder /
wenn jr inen solche gute starcke habers
brey zü essen gebt.

Von einem Kathsherrn zü Tübingen.



DIE Kathsherrn zü Tübina
gen/hettē auff ein zeit ein schwe
ren grossen handel/ mit dem Her
zogen von Wirtemberg/ außzurichten.
Vnd

Die Garten

Vnd als sie auff ein tag in dem rath saßen / den handel zu erwegen / auch demnach die vrtheil / wie sich jnen darinnen zu halten wer / geben wolten / vñ gleich die sach in der vrtheil stunde / vnd umbgefragt warde. Stunde einer vnter jhanen auff / der sprach: Lieben Herren / mein spruch den will ich eben geben haben / wie jhn mein Herz der Forstmeister hernach sagen vñnd geben wirdt / dann ich wil hinauß / vnd muß brungen / vnd ehe ich wider herein komme / so seyt jr schon fertig. Solcher vngereumpten reden / vnd groben anzeigen waren die Herren des raths vbel zu frieden / ließen jn außhin gehn. Als er aber wider hinein kam / ward er des raths sein lebtage entsetzt / vñ ein Sprichwort darauß gemacht: Lieben Herren / was der Forstmeister erkennen wirdt / das wil ich auch jetzt erkennen haben / dan ich muß hinauß brungen gehen. Das was ein witziger rathsherr / wußt noch nit / was der Forstmeister erkennen wollen / vñnd hat er schon sein vrtheil darauff gestellt.

Von

Von einem Schlosser/der
inn den Sattel gefro-
ren was.

EIN Schlosser saß zu Can-
stadt/der sagt/da er noch ein jun-
ger wandergsell gewesen/da hab
ihm ein Edelmann vonn Stutgart ein
gaul gebē / den er gen hohē Aurach hat
reiten sollen. Es was umb S. Niclaus
tag/vnd woz stein vñ bein als hart gefro-
rē / es mocht sich auch schier niemands
im feld des frosts erwehren. Als aber
der Schlosser gen hohē Aurach komen/
vñ herniden bey dē stelln abstehn wolt/
da woz er hart in den sattel gefroren/der
massen/das er vnd der sattel nit kōndtē
von einander kommen/ noch er auß dem
stegreyffen treten. Da war ein rath fun-
den/das die knecht in mit dem sattel ab
dem pferd heben/ also in die stuben hina-
der den Ofen tragen / allgemach nider
setzen solten/vnd auffgefrierē lassen/ dz
er darnach wider zu fuß kōndte heym
kommen. Also ist er mer als fünff stund
hinder

Die Garten

hinder dem Ofen im sattel gefessen/
samt den stegreyffen/ehe er auffgefros-
ren ist/darnach ist er allgemach wider
ghen Stutgarten gangen/vnnd ange-
zeigt/wie es im mit dem gefrorenen sat-
tel ergangen sey.

Einer ist wol fünff Tag
inn der Thonaw am boden
vnder dem Eiß geritten/biß
er wider herauß ist
kommen.

DA der groß Türckenzug ge-
wesen ist / vnnd man den ganz
kalten Winter inn Vngern
blieben / dazumal hat ein Behemischer
Herz dreyhundert pferd geführet / die
sind bey Krems an die Thonaw kom-
men/weren gern hinüber gewesen. Sie
was hart gefroren/aber die Reuter wa-
ren schwer angethon/dorfften dem eyß
vnnd der Bruck nicht wol vertrauen.
Sie schussen einen auß/der das Eys be-
reyten solt/ ob es hielte oder nicht / der
was auß

was auß dem Land zu Osterreich / wun-
ste weg vnnnd steg / der hieß sie warten /
am gestadt / biß er ihnen zurüffen wür-
de / so solten sie ihm als dann nachuol-
gen. Mit dem reyt er auff das Eys / biß
auff die mitte der Thonaw / da mochte
es in nicht ertragen / dann der fluß was
zu streng / vnd bricht das eys / fellt gaul
vnd Mann alles vnder das eys biß auff
den boden. Es was finster / er kont nit
vnder dem eys sehen / wo er im wasser
vñher ritte / trabet also gemach hin vñ
wider / biß an den fünfften tag / derselb
was hell vnd kalt / da sahe er einen klei-
nen glast / durch das hell eys scheinen.
Er reyt hinzu / gedacht das eys würde
nicht so dick sein an diesem orth als an-
derswo / name seinen reytspieß / vnnnd
stieß darmit ein loch durch das eys / vnd
da das loch groß gnüg ward / da sahe er
das er gar nahe am staden was. Er gab
be dem gaul die sporn / vnnnd sprang in
einem starcken sprung auff das Land /
da sahe er umb sich wo er was / befande
er / das er biß ghen Kloster Nemenburg
kommen war. Er ritte ins Kloster / gab
S dem

Die Garten

Dem pferd ein fütter / es hat in fünfftas
gen nichts gessen / aber zutrinken hat
es genüg gehabt / auch thet er sich auß/
trücknet die kleyder vnd den harnisch/
auff den abend komen seine Reuter zu
ihm / die waren zu Stein vber gezogen/
Als in die sahen / verwunderten sie sich/
fragten ihn / wie es ihm vnter dem was
ser gangen were? Da sagt er ihnen / wie
er so lang vnter dem wasser in gerittē/
sagt ihnen auch / wie es so finster vnter
dem Eis gewesen / ja also finster / es grif
fe einer dem andern iß loch / dz ers nicht
sehe. Demnach ritten sie miteinander
fort an die Türcken / vnd wisse sie der
reuter den weg / dan er kondt vnter dem
eiß auff dem landt reiten / ich glaub er
hab auch fliegen ohn ein S. können.

Von einem dem zu Masier
vnter dem thor mit dem schuß
gatter / der gaul am sattel hin
den abgeschossen ward.

In Buchtrucker vnd Burger
 zu Staßburg/ was reysig/ zohe in
 krieg/ (ich gedenck es sey Masier
 gewesen/) wie die belägerung lang we-
 ret/ vnd sich in der besatzung so dapffer
 geweret haben/ wolte dieser reuter / der
 hieß Martin Glach/ ein Ritterstück vor
 andern begehñ/ (dañ er gab sich für ein
 Edelmann auß/) thet sich an/ vnd ran-
 der Stadt zů / vermeynt einen feind in
 der Stadt zů fahen/ vnd mit ihm inß lã-
 ger zů bringen. Als man aber des ver-
 gangnē tags daruor zů beyden eheilen/
 einen ernstlichen vnd grossen scharmü-
 zel gehalten/ vnd viel auff der walstatt
 verwundt vnd todt ligen blieben/ vnter
 welchen verwundten einer Martin Gla-
 chen spieß gesell gewesen. Derselbig er-
 sicht in Martin auff seinem gaul daher
 reiten/ schreit ihm zů vnd sagt: O lieber
 Juncfheri Martin Glach / helffet mir
 vmb GOTTes willen der marter ab/
 dann ich kan weder sterben noch gene-
 sen. Juncfheri Martin Glach warde in
 barmhertzigkeit bewegt/ stiege von sein-
 gaul ab/ name sein schwerdt zů handen/
 S ü schlug

Die Garten

schlug dem verwundten das haupt ab.
Nun was geschah weilers. Der todt/
dem dz haupt abgeschlagen was/ sagt:
O nun danck euch Gott lieber Juncker
Martin Glach/ das jr mir der marter ab
geholfen habt/ solches will ich in ewig
Zeit nimmer in vergeß stellen. Nach sol
chem aber wolt er d Martin Glach von
seinem fürnemen noch nit abstehn/ sagt
sich wider auff seinen gaul/ vnd rannt
der statt zu. Wie er vnter die portē kom
met/ so laßt d auff dem Thurn den schutz
gatter fallen/ der trifft den gaul gerad
hinden am sattel vnd schlecht den hal
ben theil des gauls ab/ das es da ligen
blieb. Er rannt mit dem vordern theil
biß auff den marckt/ wirfft den gaul he
rumb/ vnd sagt: Dummel dich mutz/ so
sicht er erst das er nür ein halben gaul
hett/ dann das höuw hieng jm noch her
auß/ dz der mutz morgēs gefressen hatt.
Der güt Reuter erschrack/ der gaul fiel
vmb vnd starb. Er ward gefangen/ hat
sich mit sechs Monat solden/ wie er ge
saget/ lösen müssen/ ist also zu fuß wider
zu den seinen gelassen worden. Das ist
ein

ein gefehrliche wagung gewesen / hett
 der schutzgatter den gaul fornē troffen/
 vnd ihm den halß abgeschlagen / so hett
 er nit mehr sehen können wo er hin solte
 lauffen / er würd sich hefftig vñ vnbillich
 gestossen haben / ehe er wider in das lā-
 ger kommen wer zū den seinen. Als nūn
 sich begab / dz Martin Glach auß diesem
 zug heim kommen / hat es sich auffein
 Safft nacht begeben / das sein stieffvatter
 seine Drucker gesellen / sampt andern
 Herrn vñ gūten freunden / zū gast gela-
 de. Da sieng er Martin Glach an (seiner
 alten gewonheit nach) seine Mānliche
 thaten / wie vorgemelt zū rühmen / vnd
 sprach / wie er in ein zug ein Senderich
 were gewesen. Darauß sprach sein stieff
 vatter / mit vrlaub zū reden: Es ist erlo-
 gen / (dann er one das an ihm gewont/
 dz er on ein S. gar höflich vñ meisterlich
 fliegen kondt.) Darbey saß aber ein gar
 grosser speyuogel / Wendling von Mar-
 le genant / ein setzer / der sprach: Ja Herr
 ich glaubs / vnd ist auch war / Es gescha-
 he an einem Sonntag / auff einem Dorff/
 als der Pfarier mit dem Weyhwasser
 S iij vmb

Die Garten

wasser vñ die Kirch gehn wolt/da was
kein baur vorhanden / der das Jänlin
tragen wolt / da erwünscht er Martin
dasselbig / vñnd trügs vñb die Kirch/
dieselbig zeit vñnd weil ist er ein Jender
rich gewesen. Solches speywercks mü-
sten sie alle lachen/ vñnd ward selchs als
les in ein schimpff vñd gespey gezogen/
vñd das gloch / mit lachen vñd freuden
volendt.

Ein Pfaff hadert gern/vñnd
gewan allzeit daran.

DMeran/ was ein balgerischer
Pfaff/ der für vñd für hendel haben
müß. Er was auch nimmer so arm/
er hett etwan drey oder vier wunden/
vñd was dem Scherer viel nützer/ dann
ein melckende Rüh. Eins mals ward er
gefragt / ob ihm die pfründ zu Meran/
oder die außwendigen gedingten Vilia-
lia/dz sind die dorff Caplaneyen/an dem
nützlichsten Jars weren/ oder waran er
seinen besten gewin jārlichs habē möch-
te?

möchte? Sagt er: Die pfründ die ich hie
 hab/die ist güt/Die Caplaneyen die sind
 aber besser/dann jr sind viel/die machen
 ein feine summa. Aber meinen besten vnd
 größten gewin den ichs Jars hab / den
 vberkomme ich / vnd wirdt mir von dem
 Ergknappen / dann so oft vnd dick ich
 mit ihnen balg / so wirdt mir allwegen
 für ein wund oder kapp / die ich ihnen
 gib/drey oder vier/da gewinn ich am be
 sten an. Den anderen gewin von den
 pfründen / den hab ich / derselbig wirdt
 dann aller dem Scherer vñ dem Würt/
 damit hat der Scherer vñnd Würt den
 besten gewin an meinen pfründen / vnd
 ich den besten gewin an den Erg
 Knappen/wenn ich mich mit ihnen
 kawat / darzu ich dann allzeit
 mein besunderen lust
 hab.

Ein Würtin gab einem gast
 Brunk für Maluasier zu
 tricken.

S üß

Ein

Die Garten

En läuffers Bott kam von
Vlin ghen Geyßlingen/ inn einer
witwen hauß/ die ein Herrn Würtin was / er hielte sich gar verwehnt/
was man ihm für wein bracht/ der was
ihm aller nicht güt / fordert allezeit ein
bessern. Zuletzt kam er an Maluasier/
vnd wolt denselben haben / Gott geb
was es kostet. So die Würtin sihet/ das
jm kein sattel gerecht was / vnd jm kein
Wein gefallen wolt/ sondern schrey für
vnd für / man solte jm Maluasier bring
gen / nam sie ein groß glaß / bruntzet es
voll/ ließ kalt werden/ vnd brachts ihm.
Er sahe das Trancß im glaß/ saget: die
farb ist güt vnd hübsch/ setzt ihn an das
maul/ vñ thüt ein gütē starcken trunck/
ehe vnd er empfand woz es für ein trancß
war. So baldt er das Glaß von dem
maul thet/ sprach er: Frau Würtin der
Wein schmeckt nach dem Faß/ die lägel
ist nit wol vnd sauber gewäschē. Ja
saget die Würtin / es möchte sein / aber
auff diß mal habt jr meine besten Wein
alle versuchet / die Lāgel wil ich auch
schier etwann ins bad schicken / vnd
wol

wol wäschen lassen/ es schimlet ein wenig / darzû ist lang nicht drauß getruncken worden. Der Bott sprach : Ich hab es wol geschmeckt/ glaub gantzlich es sey hienor Vermût wein darinn gewesen/er reucht als were er verdumpffen gelegen/ dan er sticht auff ein herbe bittere art/doch so machet mir die zech/ ich wil weiter reysen. Sie machet ihm die zech vmb zehen Creutzer / ließ in ziehen/da hett er viererley wein/ vñ ein gûten trunck Witwen bruntz getruncken/ dann da ihm kein Wein gût gnüg was/ da hat er mit Seych/ für Maluasier zû trincken/beschliessen müssen. Der Bott zohe hin / die Würtin hat das gelt/waren beyde wol zû frieden / vñnd hette er schimligen vnd verdumpfften Maluasier getruncken/der seinen geschmack mit gebracht/nach dem er auch ein Keller gehabt hat.

Die Garten
Hensel von Singen des
Marggraffen Narz wolt mit an-
andern zweyen Narren
nicht essen.



Wen Herren kamen eins mals
gē Mülberg zū Marggraff Philip
sen vō Baden / vñ brachte jeglicher
seinen Narren mit ihm / ihnen ward zū
samt Henseln von Singen / des Marg
graffen narren / allen dreyen / da man es
sen

sen wolt / nür ein Tisch gedeckt / das sie
mit einander essen solten. Da das Hens-
sel von Singen des Marggraffen Taz
sah / lieff er hinweg / müßten die zween
frembden Narren allein essen / dann es
kont niemand Henssel von Singen fin-
den. Der Marggraff hett ein hund / der
sucht in / fand in / vnd bracht in mit im.
Der Taz ward gefragt / wo er gewesen
were? Er sagt: Im dorff. Ward weiter
gefragt / Warumb er nit mit den zwey-
en gessen hett? Botz martel / sprach er /
meynt ihr das ich mit den Narren essen
wolt / weñ jr mir schon hetten eitel weiß-
brot / hönig / milch / vnd gebraten Rāb-
hüner geben / danoch wolt ich mit jnen
nit gessen haben. Meynt jr / das ich mit
Narren essen wolt / vnd bin ein König /
hetten jr nür acht darauff genommen /
vnd gesehen / so hetten jhrs wol gese-
hen / was für vnflätige / wüste / rozige
nasen sie gehabt haben / die Kengel sind
in schier heraussen gehangē / ich vermag
mich der narren nit / ich wil auch nit es-
sen / allweil sie hie sind. Also müß man den
narren morgens bereden / sie weren hin-
weg /

Die Garten

weg/er hett sich sonst wider verkrocht.
Es ist ein Sprichwort: Es thut nicht
güt/ zween Narren in ein hauß/da wa-
ren irer drey/Wie kondten sich dann die
vergleichē mögen mit einander/ja frey-
lich selzam.

Von obberürtem Narren/
wie er durch ein bach
gieng.

Emelter Hensel vō Singen/
da er noch jung was/ da gieng er
ein mal durch ein bach mit sein
hund/ der auff in wartet/vnd da er hin-
durch kommen/ sagt er zu seinem hund/
O hörstu wie habe ich so Narrisch ge-
than / das ich durch das wasser gangen
bin/were ich also darin ertruncken/vnd
hetts mein Vatter erfahren(den Marg-
graffen nennet er sein Vatter) so würd
er mirs nicht nachgelassen haben / ich
hett mich müssen aber mit rüthen strei-
chen lassen/ Ich bitt dich drum/sag es
niemande / himnacht so wil ich dir mein
theil

theil gebratens halber geben. Der hund
hat das gebratens wol verdient/ daß er
hat niemand nichts daruō gesagt/ es ist
im auch wordē/ das er geschwigen hat.

Ein dieb den wolt man hen-
cken/ der bat den Pfarherrn/
er solt das Nachtmal für
ihn essen.



3 V Bamberg ward ein dieb ge-
fangen/ der was von Oringen/ am
Odenwald / der ward peinlich ge-
fragt/

Die Garten

fragt/ er bekant also vil/ das er züm tod
vnd Galgen/ verurtheilt warde. Man
fürth ihn auß/ vnd wolt ihn henccken/ der
Pfarther: gieng mit ihm/ vnnnd tröstet
ihn / sprach / das er die straff wol ver-
verdient hette/ vnd der schandlich tod/
der were jm ein abnehmung seiner sün-
den / vnnnd ein grosse fürdernuß zü dem
ewigen leben/ dan er bey Gott dem All-
mechtigen zü nacht essen würd/ des solt
er sich versehen. So baldt der Dieb das
horte / wandt er sich heruñ züm Pfar-
ther: vnd saget: Ist es war lieber Herr?
Ja sprach der Pfarther: ich wil dir des-
sen mein seel zü pfand geben. So bit ich
euch sagt der dieb/ jr wöllt so wol thün/
das Nachtmal für mich essen vnd gast
sein/ ich wil euch warlich zween grosch-
en zü steur geben/ Ich hett sonst wol nö-
tiger geschafft außzurichten/ dz ich eben
des Gelds oder Gasterey wol entperen
möchte. Das was dem Pfarthern nicht
gelegē/ ließ den henccker mit jm fürfarē/
damit war er verdienter straff nach ge-
genck̃t / Gott geb wer gast züm nachts-
mal gewesen oder nicht.

Vom

Von einem Studenten zu
 Francffurt an der Oder/ wie
 er so höflich bey seiner Schwe-
 ster Hochzeit was.

En student studiert zu Franck-
 furt an der Oder/ der was ein ges-
 berner Düring/ von ehrlichē leu-
 then erboren/ demselben ward von sei-
 nen eltern geschrieben/ er solt heym ko-
 men/ sein schwester wer vermählet/ vnd
 würde auff ein bestimpten tag die hoch-
 zeit ihren fūrgang haben/ das er dar-
 bey were. Der Jung Gesell rüstet sich/
 wie sich gebürt/ das er auff seiner Schwe-
 ster Hochzeit/ nicht der wenigest wolte
 gesehen sein. Der tag der Hochzeit was
 kommen/ der Brüder was noch nicht
 da. Als der Kirchgang beschehen/ vnd
 man eben vbern tisch saß/ das essen auff
 dem Tisch stund/ so kompt der student/
 der Braut Brüder/geritten. So balde
 das gesaget ward/ man empfienge den
 gaul von jm/nam jn in stiffel vñ sporen/
 wolt jm nit so vil zeit lassen/ das er sich
 bett

Die Garten

hett mögen außziehen / sonder er müßte
eilendts zum essen gehen.

Er gieng recht hin / er schampt sich /
wie dann ein junger gesell thut / nam
wasser vber die hend / mā setzt in neben
sein Schwester die Braut (da dan auch
sonst viel ehrlicher leut / vom Adel vnd
sonst Mann / Frauen / vnd Jungfraw
en lassen.) Der gut gesell ward seines
außbleibens / vnn langsam erscheinens
befragt / er zeigt aller handt vrsachen
an / darzu das der weg et was fer /
von Franckfurt an der Ader / biß dahin
wer / auch der zeit böß reiten gewesen.
Also legt man ihm ein Henn für / die er
zerlegen solt / vnn anderen auch (dies
weil er der Braut brüder sey) fürlegen.
Er nam die Henn / vnd zerlegt die fein
höflich / wil seiner Schwester der Braut
daruon fürlegen / so empfelt es ihm vn-
ter den tisch.

Mit deßer weniger behelt er das an
der als noch auff dem teller / nimmet
das messer / buckt sich / wil es wider auff
hebē. Wie er den kopff vnter dem tisch
hat / so gehet ihm das vnter theil auff /
vnd

vnd ließ ein grossen scheiß. Er erschri-
 cket/ richt sich eilendts auff/ so ritschet
 er mit dem wammes ermel das ander-
 theil von der Hennen auch vnter den
 tisch. Bald was ein hund da/ der erwün-
 schet es vnd mit daruon / die hund bis-
 sen einander vmb die Henn / vnter dem
 tisch. Der güt gesell wolt dannoch se-
 hen / ob er etwas noch daruon auff he-
 ben möchte/ stoß den tisch von ihm / so
 schütt er zwey gläser voll rotes weins/
 in die supp vnd auff den tisch / das die
 gläser zerbrachen. Wer was in grösser
 lästen dann eben der güt from jung stu-
 dent / er was gar erschrocken / es wolt
 kein glück auff seiner seitē den tag sein/
 steht gleich behend vō tisch auff/ dorff-
 te niemands mehr recht ansehen / vnd
 wolt hinweg gehen. Wie er vber die
 bancß schreiten wil / so behengt er mit
 den sporen in dem tischlachen. In dem
 selbigen eilenden vbersteigen vber die
 bancß / so reißet er das tischtüch / blat-
 ten/ gläser/ becher/ teller/ brodt/ vnd den
 wunden allen mit dem tischlachen von
 dem tisch / alles ihm nach/ je mehr er ei-
 let/

Die Garten

let/je mehr ihm das tischtruch in den sporen hangende nachuolgt / vnd ihm wie ein fenlin an den sporen behienge. Da er auß dem Saal kam / da macht ers erst loß / ließ ligen / auff sein gaul / vnd macht sich darvon als wenn man ihn jagt. Die guten freund / die Juncfern vnd Herin / sampt der braut vnd ihren Jungfrauen / wolten sie nit an der erden essen / das hin der Brüder mit der Hennen vnnnd sporen angericht hett / müßten sie den leiden wol wider auff heben lassen / die tisch auff ein newes deckē / ein newe mal zeit anrichten / vnd einander frölich machen. Aber gnüg war des guten frommen Studenten gelacht / dann alles das er den tag anfieng oder für sich nam / das wolt ihm nit schneiden / oder ein für gang haben / wiewol ers gern gut gesehen hett. Also war die hochzeit zü letst mit freuden geendet / vngeacht das der Student vnter vnd neben dem tisch angerichtet hett.

Ein Jungfraw sagt ein mal
warumb ihr der hinder so
groß were.



In Stadtschreiber / welchen
ich beschreiber diß büchs / wol ge-
kennet hab. Der saß auff ein zeit
bey einem gütten freund vor seiner thür
ren züschweigen / so gehet in solchem ein
Jungfraw vor dem hauß anhin / zü des
ren derselb Stadtschreiber / nach ande-
ren grüßbaren reden sager: Jungfraw /
Wie kumpt es das ihr so wol / hindem
T ij herum

Die Garten

herumb gebrüst seyet? Sie verstunds
bald/vnd fragt wider/sagt:Wie gemey
net ihs / warum ich also ein grossen arß
hab? Ja sagt der Stadtschreiber / ich
meyns also. Darauff gab sie behend ant
wort/(dan sie ohn das bald gerüst war
antwort zugeben/)vnd sagt:O hetten
ihr so viel darein geblasen/ als ich her
auffer geblasen hab / lieber Her: Stadte
schreiber/ so wer er noch so dick worden
als er jeczunder ist. Ey nün blaß dir gös
zen Jäckel drein/ sagt der Stadtschrei
ber/vnnd nam vergüt/seiner frag nach
war ihm geantwort worden / vnd was
auch ihm nicht vnrecht geschehen.

Wie man in den wald rüfft/also
gibt er wider antwort/(ist
ein gemeyn sprich
wort.)

Von den jungen Katho
herren zu Rom / die ihre Vät
ter all todt schlägen / das sie
allein regieren wolten/
die lest Histori.

Nach

Nach dem die altē Rōmer/ mit
 weißheit vnd zwang/ also lange
 zeit vnd jar/ den gemeynen nutz/
 ihr Reich/ Commun vnd Keyserthumb
 erhalten/ gemehrt vñ geweitert haben/
 kamen auff ein zeit die jungen Raths-
 herren vber ein/ das sie die strengen ord-
 nung vnd statuten ihrer Vätter nit len-
 ger dulden wolten / sonder erkandten
 gemeiniglich / das jeglicher solt seinen
 eignen Vatter todt schlagen / das solt
 auff einen bestimpten tag/ zeit vñ stund
 beschehen. Nū was einer vnter den jun-
 gen Rōmern / der kam zū seinem Vate-
 ter/ den er nū fast lieb hett/ hielt im sol-
 ches sein sterben für. Der Vatter erkent
 den heimlichen rath der jungē Rōmer/
 auch das streng vrtheil wol / sprach zū
 seinem Son: O lieber Son/ nū mercke
 mich/ dz geschicht darauß/ das ihr selbs
 wolt regieren/ so sag ich / es wirdt euch
 darzū kommen/ das jr durch solche ver-
 derbung ewrer vätter/ werdt Rom mit
 allem ihrem gewalt/ Land/ Leut/ vñ
 ewer eigen groß erholte ehr/ verlieren.
 Der Son sagt: Das ist nit möglich vat-

Die Garten

ter/dz solchs geschicht. Wolan/ der vater
ter wolt des Sons zorn nit lenger züge-
ben/ vnnd sagt: Also lieber Son/ sollen
dann alle alte Römer todt geschlagen
werden/ so ist doch allein mein bitt/ lie-
ber Son an dich/ laß mich leben/ vnd be-
schleuß mich ein/ verwar mich wol/ also
das ich nit entrinnen möge/ biß das du
mich selbs mit grosser bitt wirst heissen
herfür gehen. Der Son was on das vn-
mütig/ dann der vatter was ihm von
herzen lieb/ ward durch diese getrewe
red seines vatters bewegt/ ließ in leben/
erneret in sonst in der stille/ heimlich vnd
wol. Demnach vber etlich Jar/ da kam
ein grosser König auß frembden landen
gezogē/ (Quia surfixit Rex post Regem.) der
hett vernomen/ das die jungen Römer
ire vätter hettē todt geschlagen/ vnd al-
so das Regiment allein innen hetten/ so
were also auch die weißheit darmit ver-
loren oder außgetilget worden. Darum
er ihnen schreiben thet/ zwey ding solten
sie im außlegen/ vñ darinn rath geben/
oder er wolte sie gewaltiglich vberzie-
hen/ vnd ihm vnterthenig machen. Die
erste

erste frag was dieses: Es wer ihm in sei-
nem Land/in all sein Saltz würm kom-
men / darzü begerte er raths / wie er die
vertreiben möchte. Die jungen Römer
giengen zu rath / die alten waren all biß
ohn einen erschlagen. Sie riechen wol
acht tag / kondten oder mochten dem
König kein antwort zu geben. Mitter
zeit gehet der vorgemelt Son/so er heim
kompt/zü seinem Vatter / hielt ihm sol-
ches für/sagt ihm auch / das sie alle dar-
auff nit wüßten zu antworten. Also lie-
ber Son/sagt der Vatter / ist die Weiß-
heit mit ewern Vättern vntergangen/
vnd verloschen / Aber dein heyl das ste-
het bey mir/So du morgen in den Rath
gehest / vnd die frag wider fürgehalten
wirdt / so sag: Lieben Herren auß dem
Senat / wisset das kein Wurm in das
Saltz kompt / dann das Saltz frisset die
Würm. So ist mein rath / das man dem
König schreib/ vnd rath gebe / die wür-
me im Saltz zu vertreiben / Nemlich/
das er Maulesels milch nemme / vnd
es auff das Saltz sprengt/ so werden die
Würm alle darvon sterben. (Nun hat
T üij aber

Die Garten

aber kein Maulesel kein milch / Quia mulus sterilis est, & nō habens lac. Solcher weiser rath ward von den jungen Rathsherren gemerckt vñ angenommen / auch für groß gehalten / das er sie also erlöset hett. Dem König ward diese antwort zugesendet / der nam der grossen weisheit wunder / begert sie aber in ein andern weg zū versuchen / Ließ ihnen vier büchstaben verzeichnen / schickt ihnen die zū / begert darbey / sie solten ihm dieselbigen auflegen / oder wolt sie im zinsbar machen. Vñnd waren diß die vier büchstaben / Q. M. R. N. Die heissen auff Teutsch: Wer ist mechtiger vnserm König? vñd zū Latein: Quis Maior Rege Nostro?

Da nūn die Römer die brieff wider von dem König empfiengen sampt den vier büchstaben / Q. M. R. N. vñnd kein auflegung darbey / da waren sie widerumb gesteckt / giengen etliche tag zū rath / sie kondten vñd mochten aber nit darauff oder zū der auflegung kōmen / sagten gemeinglich zū dē jungen rathsherren / der jnen vorhin durch seins vatters

ters rath geholffen / das er auch hierinn
rath suchet / wie dem König wider zů
schreiben were / vnd was die vier büch-
staben bedeuten / sie wölten jm ein we-
nig gedächtnuß machen / vnd darzů
grosse geschenke thun. Der jung raths-
herr was betrübt / das jm die handlung
vnd das heyl der ganzen Stadt Rom/
allein auffgelegt was / hett doch ein gü-
te hoffnung zů seinem Vatter. Als er
nün heym kam / verzoge er nicht lang/
gieng zů seinem Vatter / hielt ihm sol-
ches für / der sagt gleich. Die vier büch-
staben bedeuten: Wer ist mechtiger vn-
serem König? dann sie heysen: Quis Ma-
ior Rege nostro? So schreibet jr dem Kö-
nig widerumb in seinen brieff / zů diesen
euch vberschickten vier büchstaben S. P.
Q. R. Das heyst: Der Römisch Senat
vñ das Römisch Volck / vñ heyst in La-
tein: Senatus, Populusq; Romanus. Da dem
König die brieff vberantwort worden/
zohe er gleich ab / sprechende: Thun sihe
ich wol / das die Römer noch stercker
mit irer weißheit sind / dan ich mit mei-
nem grossen volck vñ mechtigem zeug.

Die Garten

So baldt die Römer den abschied vnd nachlassung des Königs erfüren/sanden sie nach dem jungen Rathsherrn/der müßt jnen anzeygen/von wem er solche weißheit bekommen hett. Er begeret gnad. Sie ward jm zügelassen. Da stelt er seinē Vatter in den Senat/sagt: Das Rom durch des alten Manns weißheit auff das mal erledigt worden were. Da erkannten sie gemeynlich den alten Römer wider zü jnen in den Senat / bekanten jr vngerechtigkeit / so sie an den alten Römern begangen hetten / dan wo der alt Rathsherr allein nicht gewesen were/ vnd Rom durch sein einige weißheit erlediget worden/so were nit möglich gewesen daruor zü sein/Rom müßt sein freyheit vbergebē haben/ vñ einem frembden König vnterthänig worden. Darumb soll allzeit ein junger bey dem alten rath auffgezogen vnd gebraucht werden/auff das/wo die alten abgehn/die jungen ihrer geübter weißheit/gebreuch/arten vñ gewonheiten als denn wol erkündiget vnd erfahren / also auch der regierung vnd Administration/des gemeynen

gemeynen nutz/ Städt/ Land vnd Leut
 dester stattlicher darmit zu erhalten/
 heylsamlich nachfolgen mögen. Wel-
 ches Gott der Herz allen regierenden/
 Fürsten/ Herren/ vnd allen andern Res-
 genten/ zu fried/ sühn/ allem wolstand/
 glück vnd heyl der gantzen Christen-
 heit/ zu rüh vnd einigung/ auch
 vns allen andern gnedig-
 lich verleihen vnd
 geben wölle/
 Amen.



Register diser Fabulen vnd Historien der Gartengesell- schafft Kurtz zů finden.

Von einem groben nãrrischen bawren/
der wolt junge Genß außbrüten/am
ersten blat.

Von den Bawren / die ein lebendigen
Herigott haben wolten.

Ein Judin hielt vil mehr vō dem Tauff
dann von der Beschneidung.

Von ein Schůhmacher der ein Baw-
ren die füß beschneiden wolt.

Von einem Türcken/der in der Christen
Kirchen zů Opffer gieng.

Ein Jungkfrau ward zů Costentz im
Concilio eins Kinds schwanger.

Es wolt einer auff dem seyl gehen/ vnd
fiel herab.

Von einem vngelehrten Schůlmeister/
der das Agnus Dei außlegt.

Von einem verdorbnē Můller der bett-
len gieng.

Von einem gar alten Mann / der eines
jungen mädglins zů der ehe begert.

Von

Register.

Von einem Bawren der sterben wolt/
vnd klagt/ das er ziehen müßt / vnnnd
hette noch vier güter pferde im stall.

14

Ein Jud ward ein Christ/verdarb/vnd
ward wider reich.

16

Die Bawren von Garburg wolten ei-
nem Tussbaum zütrincen geben.

18

Von einem Bannwarten / der forcht
weñ er in den Weyssen gieng/ so the-
te er schadē/aber vier müßten in dar-
ein tragen.

19

Ein vngelehrter Pfaff verkünd seinem
bawren wed Fastnacht/Fasten/ noch
Ostern.

20

Ein Koch begert das in sein Herz zu ei-
nem Esel machte.

21

Von einem der sich beklagt er wer be-
raubt / vnnnd behielt noch den besten
rock an.

22

Ein Curtisan sagt züm Papst/ er hette
ein bösen kopff.

23

Ein Bawer gab seinem Nachbawren
einen rath/ der güt für alles fallen
was.

24

Von einem gauckler der fligen wolt.

25
Ein

Register.

Ein Mann vnd Fraw wurden eins / sie
solt mann mit der arbeyt / so wolt er
fraw mit haußhalten sein / damit jes
des die geschafft beyde kōndte ein an
dermal aufrichten. 26

Ein pfaffenmagd wolt lernē auff dem
rucken auff die kirchweyhe gehen. 31

Ein karger haußschaffner tranck brüg
für Cardobenedicten Wein. 32

Von einem Arzt / der mit sechs pillulen
einen verlornen Esel wider fand. 34

Es wolt einer tausent güldē geben / das
man in in aller Welt kannt. 36

Von einer tochter / die irer mütter in all
weg nachschlug. 37

Von zweyen bösen zencfische weibern. 38

Vom ein der seiner gemeyn gauch er
hielt / vñ im der Wolffein pferd dar
über fraß. eodem

Von ein der niemands dan seines Vaters
Narz wolt sein. 40

Von einem reichen pfarrhern / der sagt
man solt Gott nit zu viel vertrauen. eodem

Von einem Landfknecht / der einem al
tem

Register.

- ten Münche beicht et. 42
Von einem kargen Bauwren / der ein
Schwein wolt messen. eodem
Von einem Stationierer mit S. Sebas-
tians brüderschaft. 43
Ein pfaff lehret zu abend / vnnnd schiffe
hinder den Ofen. 44
Ein vngelchrter pfaff gab den Bauw-
ren ein heyn von einem todten Esel/
für heylthumb zu küssen für die Pes-
tilenz. 45
Von einem Bauwren / der seinen pfaria-
herren vber studiert. 46
Von eins Bauwren son der auff die Sassa-
nacht zum Wein was gangen. 48
Ein bawr hett groß leyd vmb sein weib
vñ kind die jm gestorben waren. eod.
Mit vnserm Herigott kriegt ein bawr
vmb des wetters willen / das er nicht
håw machen kondt. 49
Ein bawr klagt den andern von seines
Vatters tod vñ absterben wegen. 50
Von einer Jungfrawen wie sie ein al-
ten Mann ein antwort gab. 51
Warumb der Edelleuten kinder so heß-
lich / vnnnd der Kauffleuth vnd Bura-
gers

Register.

- gers Kinder so hübsch sind. 52
Ein Landknecht theilet mit einem
Münch. 53
Ein Beyrischer Pfaff prediget seinen
Bawren. 54
Wo der Landknecht wohnung sein
wirdt/wenn sie gesterben. 55
Von einem andern/ der nit in den Him-
mel wolt/ darum das er vernam/ das
sein Weib darinnen was. 57
Ein esel ist gedultiger wed ein Münch. 58
Von einer Frawen / die nicht wolt das
man Gott für jren Mañ bitten solt. 59
Von einem groben vngehobleten baw-
ren. 60
Von einem Herren/ der das vbel schwe-
ren verbieten ließ. 61
Von einem der sein frauen stetigs ein
hür schalte/ vnd sie ihm darüber ant-
wort gab. 62
Von einer güten dirnen/wie sich die ver-
antwortet. 63
Von einem Burgermeister zu Hechin-
gen/ wie man in zu Rotenburg nicht
kennen

Register.

Kennen wolt.

64

Ein Schultheys von Hausbergen wu-
ste nit ob er gezwagen hette oder nit.

65

Ein Frauw begeret / das die Orgel zu
Straßburg zu jr in jr hauß gehn In-
geheim kommen solte. eodem

Ein bawr wolt die Dreyfaltigkeit nit
glauben / Vatter vnd Sohn glaubet
er / wolt aber den heiligen Geist nicht
glauben.

66

Von einem der sich für ein Edelmann
außgab / vnd doch keiner was.

67

Ein voller brüder fordert in sewers nö-
ten Wein / vnd kein wasser.

68

Von einem Pfaffen der ein kind tauft.

69

Ein Wolff starb in einem kalten Win-
ter zu Grödelbrück im Breuschthal /
die Bawren fragten vmb / was die
ursach were. eodem

Ein Pfaffenmagd trat in ein Dorn. 71

Von einem armen Schüler der gen Pa-
ryß zoge / vnd ein Witwe meynt / er
zög ins Paradyß.

72

Ein Pfarher zeyget seinen Bawren
die

Die Gärten

- Die arßkerb für Heylcumb. 73
Von einem Krancken / der von Gott an
die zwölffboten appelliert hat. 74
Von eines bauren son / der zwei Begy-
nen schwanger macht. 75
Von einem der dem Herren von Mon-
teiß ein Habich gebracht. 77
Von ein Edelmann / der alles geschirz
zum fenster auß / von dem tisch warf
fe. 78
Ein Scherer erwünscht sein Frawen im
Ehbruch. 79
Ein reiche Burgerin zohe in das Wild
bad / hette gern Kinder gehabt. 80
Von ein Bauren der sterben wolt. 81
Ein pfarrer taufft ein Kind / vnd leßt
die Hebamm ein furz darzu. 82
Wie ein Fürsprech seine Kinder gema-
chet hat. 83.
Ein Beurin gab einem Reuter kurze
antwort. 84
Von einem Bauren / der den Bañwar-
ten ein antwort gab. eodem
Von einer Frawen / die gern ein wacke-
ren Esel gehabt hette. 85
Ein gar alter Mann nam ein junge toch-
ter

Register.

ter zu der Ehe.

eodem

Von einer Goldschmidin zu Augspurg/
vnnnd ein jungen Edelmann/wie sie
im ein güldin Ketten ab erbület vnnnd
wider gab 86

Ein Scharzgraber vermeynet er hette
einen scharz gefunden/ da hett er das
beth voll gehosiert. 88

Ein Teutscher Edelmann macht ei-
nē Welschen Cardinal lust am tisch
auff sein weiß / vnnnd der Teutschen
monier. 89

Von einer Frawen die wolt den kopff
decken/ vnd ließ jr in das forder Ren-
sterlein / vnnnd hinder gewölß sehen.
90

Viel Kaufleut wündschten mancher-
ley reichthumb vnnnd Herrschafften.
91

Von einem Prediger der Sant Chris-
stoffel so hoch lobet. 92

Von einer vngetrewen schwiger. 93

Von vergleichung der straaff des todts
schlags zwischen den Genuesern vnd
den Griechen. 94

Ein Witfraw begert ein alten Mann/
V ij doch

Register.

- doch das er nicht schwach were. 96
Ein Bischoff aß Rābhüner an einem
Freitag für Fisch. 97
Von einem Bischoff der vier füß hett. 98
Von Sanct Franciscen bruch / wie die
auff einer Frawen beth funden wor-
den. 99
Von einem Narren / den wundert / das
die Frawen dz wasser behalten möch-
ten. 100
Von einem Büler / der seinen bülen für
den arß küßet. 102
Zwen Studentē betrogen einē Schar-
wechter. 103
Von dreyen Studenten / die ein dreck
in der milch funden. 104
Ein pfaffen magdt thet alle ding ehe
sie es geheissen ward. 105
Ein junge klosterfraw gehüb sich vbel/
das jr das haar an der tochter wach-
sen wolt. 106
Von nachtfertigen geistern. 107
Von einer reichen Witwe zu Canstat. 109
Von ein pfarrherren / der nit wolt / das
die

Register.

- die Bawren die trög in die Kirchen
stelten. 112
- Ein Augustiner Münch wolte kein
Münch/sonder ein hengst sein. 112
- Von einem Doctor der Arzney. eodem
- Ein Bawr nam vrlaub von der frucht
die zu nehen / vnd vor den vngeschick
tern ließ er das vrlaub bleiben. 113
- Ein Redner ließ vor der Hertzogin von
Osterreich ein furz. 114
- Von einem der sein lebtage nie in der fin-
stermetten was gewesen. 115
- Gebürliche straff ist ein Trumenschlas-
ger vnd Pfeiffer begegnet. eodem
- Ein alt weib ließ ein starcken furz. 117
- Ein Jud vnd ein Christ disputierten
mit einander von dem glauben. eod.
- Ein anderer Jud disputiert auch von
Christo vnserm Herrn. 118
- Von einem priester der einem anderen
priester sein vollsauffen gebeichtet
hat. 119
- Von einem trunckenen Sigristen / der
in ein Keller fiel. 120
- Von einem frawenbrüder Münch/der
den Einritt vnser H. Erren gen Jer-
usalem
- V iij

Register.

- rusalem/ geprediget. 121
- Von einem hincfenden Schneider/ wie
der in den Himmel kam. 122
- Ein Sergenweber hat einem ein serg
gemacht/ die was jm allweg zu klein.
123
- Von einem Bawren der Schuldtheyß
ward. 124
- Von ein Landfknecht/ dem sein frauw
kinder machet / wann er schon nit da-
heym was. 126
- Von einem Bawren / der vnser lieben
Frawen geburt für die beschneidung
verstund. 127
- Von einem Sigristen der sich beklaget
von den pfaffen. 128
- Wie stät vn starck das Ehlich band ist
der priesterschafft. 129
- Welchs die frommen Müller sind. 130
- Christus lag in der Krippen/ vnd aß ein
haberbrey. 131
- Von einē Rathsherrn zu Tübingen. 132
- Von einem Schlosser der in den Sattel
gefroren was. 133
- Einert ist wol fünff tag in der Thonaw
am boden vnter dem eiß jr geritten/
biß

Register.

bis er wider herauß ist komen. eodem
Von einem dem zu Masier vnter dem
Thor/mit dem schutzgatter/der gaul
am sattel hinden abgeschossen war.

135

Ein pfaff balget gern vnd gawan all
zeit daran.

136

Ein Würtin gab ein Gast bruntz für
Maluasier zutrincen.

137

Hensel von Singen des Marggraffen
Narz / wolt mit andern zweyen nar-
ren nit essen.

138

Von obberürtem Narren/ wie er durch
ein Bach gieng.

139

Ein dieb den wolt man hencfē/ der bat
den pfarrherren / er solt das Nacht-
mal für in essen.

140

Von einem studenten zu Franckfurt an
der Oder/ wie der so höflich bey seiner
schwester hochzeit was.

141

Ein Jungfraw sagt ein mal ein / war-
umb jr der hinder so groß were.

142

Von den jungen Rathßherren zu Rom/
die ihre Vätter all zu todt schlügen/
das sie allein regieren wolten.

143

Ende des Registers.

2016-B213..



PAULI
MITHO

PAULI
MITHO

PAULI
MITHO

PAULI
MITHO

PAULI
MITHO

PAULI
MITHO

PAULI
MITHO